

唐中天竺沙門般刺密諦 譯

# 大佛頂首楞嚴經

附科判 (二〇〇一年十二月 更正版)

佛陀教育基金會 印贈

一切佛經，及闡揚佛法諸書，無不令人趨吉避凶，改過遷善。明三世之因果，識本具之佛性。出生死之苦海，生極樂之蓮邦。讀者必須生感恩心，作難遭想。淨手潔案，主敬存誠。如面佛天，如臨師保。則無邊利益，自可親得。若肆無忌憚，任意褻瀆。及固執管見，妄生毀謗，則罪過彌天，苦報無盡。奉勸世人，當遠罪求益，離苦得樂也。

# 大佛頂首楞嚴經卷數目錄

楞嚴經卷第一	：：：：：：：：：：：：：：：：：：：	（如是我聞，起）	：：：：：：：：：：：：：：：：：：：	：：：：：：：：：：：：：：：：：：：	：：：：：：：：：：：：：：：：：：：	：：：：：
楞嚴經卷第二	：：：：：：：：：：：：：：：：：：：	（爾時阿難，及諸大眾，起）	：：：：：：：：：：：：：：：：：：：	：：：：：	：：：：：	：四三
楞嚴經卷第三	：：：：：：：：：：：：：：：：：：：	（復次，阿難！起）	：：：：：：：：：：：：：：：：：：：	：：：：～	：：：：～	：九七
楞嚴經卷第四	：：：：～	（爾時富樓那彌多羅尼子，起）	：：：：～	：：：：～	：：：：～	：一五三
楞嚴經卷第五	：：～	（阿難白佛言：世尊！起）	：：～	：：～	：：～	：二〇五
楞嚴經卷第六	：～	（爾時觀世音菩薩，起）	：～	：～	：～	：二四五
楞嚴經卷第七	：～	（阿難！汝問攝心，起）	：～	：～	：～	：二八九
楞嚴經卷第八	：～	（阿難！如是眾生，起）	：～	：～	：～	：三三七
楞嚴經卷第九	：～	（阿難！世間一切，起）	：～	：～	：～	：三九九
楞嚴經卷第十	：～	（阿難！彼善男子，起）	：～	：～	：～	：四四一



# 大佛頂如來密因修證了義諸菩薩萬行首楞嚴經

(卷第一)

唐中天竺沙門般刺密諦譯

烏菴國沙門彌伽釋迦譯語

羅浮山南樓寺沙門懷迪證譯

菩薩戒弟子前正議大夫同中書門下

平章事清河房融筆受

別解文義 分三

乙初、序分

二、正宗分

三、流通分

乙初 分二

丙初、證信序

二、發起序

丙初 又二

丁初、先明五義

二、廣列聽眾 今初

如是我聞，一時，佛在室羅筏城，祇桓精舍。

丁二、廣列聽眾 分三

戊初、聲聞眾

二、緣覺眾

三、菩薩眾

戊初

分三

己初、據迹標數 二、顯本歎德 三、列上首名 今初

與大比丘眾，千二百五十人俱。

己二、顯本歎德

皆是無漏大阿羅漢。佛子住持，善超諸有，能於國土，成就威儀。從佛轉輪，妙堪遺囑；嚴淨毘尼，弘範三界，應身無量，度脫眾生，拔濟未來，越諸塵累。

己三、列上首名

其名曰：大智舍利弗，摩訶目犍連、摩訶拘絺羅、富樓那彌多羅尼子、須菩提、優婆尼沙陀等，而爲上首。

戊二、緣覺眾

復有無量，辟支無學，並其初心，同來佛所，屬諸比丘，休夏自恣。

戊三、菩薩眾 分二

己初、自恣先集眾

二、聞音後至眾

今初

十方菩薩，咨決心疑，欽奉慈嚴，將求密義。即時如來，敷座宴安，爲諸會中，宣示深奧，法筵清眾，得未曾有！

己二、聞音後至眾

迦陵仙音，徧十方界；恆沙菩薩，來聚道場，文殊師利而爲上首。

丙二、發起序

丁初、王臣設供

二、佛僧赴請

三、阿難示墮

四、如來垂救

今初

時波斯匿王，爲其父王諱日營齋，請佛宮掖，自迎如來，廣設珍饈，無上妙味，兼復親延，諸大菩薩。城中復有長者居士，同時飯僧，佇佛來應。

丁二、佛僧赴請

佛敕文殊，分領菩薩，及阿羅漢，應諸齋主。

丁三、阿難示墮

分二

戊初、將墮之由

二、正墮之事

今初

唯有阿難，先受別請，遠遊未還，不遑（即不及也）僧次；既無

上座，及阿闍黎，途中獨歸。其日無供，即時阿難，執持應器，於所遊城，次第循乞。心中初求，最後檀越，以爲齋主，無問淨穢，剎利尊姓，及旃陀羅，方行等慈，不擇微賤，發意圓成，一

切眾生，無量功德。阿難已知，如來世尊，訶須菩提，及大迦葉，爲阿羅漢，心不均平。欽仰如來，開闡無遮，度諸疑謗。

戊二、正墮之事

經彼城隍，徐步郭門，嚴整威儀，肅恭齋法。爾時阿難，因乞食次，經歷姪室，遭大幻術，摩登伽女，以娑毗迦羅先梵天咒，攝入姪席。姪躬撫摩，將毀戒體。

丁四、如來垂救 分二 戊初、速歸說咒 二、遣往救脫 今初

如來知彼，姪術所加，齋畢旋歸，王及大臣、長者、居士，俱來隨佛，願聞法要。於時世尊，頂放百寶無畏光明，光中出生千葉寶蓮，有佛化身，結跏趺坐，宣說神咒。

戊二、遣往救脫

敕文殊師利，將咒往護，惡咒銷滅，提獎阿難，及摩登伽，歸來佛所。

乙二、正宗分 分二

丙初、正脩具示成佛妙定 二、助道別詳護定要法

丙初分三

丁初、阿難請定 二、如來答定 三、當機獲益

丁初分二

戊初、悔聞請定 二、會眾願聞今初

阿難見佛，頂禮悲泣，恨無始來，一向多聞，未全道力。殷勤啓請：十方如來，得成菩提，妙奢摩他、三摩、禪那，最初方便。

戊二、會眾願聞

於時復有，恆沙菩薩，及諸十方大阿羅漢、辟支佛等，俱願樂

聞。退坐默然，承受聖旨。

丁二、如來答定 分二 戊初、正說妙定始終 二、通示全經名目 戊初

分四

己初、示佛定總名令知諸佛修因剋果 二、說奢摩他路令悟密因

大開圓解 三、說三摩修法令從耳根一門深入 四、說禪那證位令住圓

定直趣菩提 今初

爾時世尊，在大眾中，舒金色臂，摩阿難頂，告示阿難，及諸大眾：有三 （去聲） 摩提名大佛頂，首楞嚴王，具足萬行；十方如來，一門超出，妙莊嚴路。汝今諦聽！阿難頂禮，伏受慈旨。

己二、說奢摩他路令悟密因 大開圓解 分二 庚初、初銷倒想說空如來藏

二、審除細惑說二如來藏 庚初分二 辛初、如來破妄顯真 二、阿難

明心生信 辛初又分二

壬初、斥破所執妄心以開奢摩他路 二、顯示

所遺真性令見如來藏體

壬初又分三

癸初、取心定判 二、正與斥破

三、終歸其判

癸初又分二

子初、問取見相發心 二、普判眾生誤認

今初

佛告阿難：汝我同氣，情均（同也）天倫，當初發心，於我法

中，見何勝相，頓捨世間，深重恩愛？阿難白佛，我見如來三十

二相，勝妙殊絕，形體映徹，猶如琉璃。常自思惟：此相非是欲

愛所生，何以故？欲氣羸濁，腥臊交遘（合也）。膿血雜亂，不

能發生，勝淨妙明，紫金光聚。是以渴仰，從佛剝落。

子二、普判眾生誤認

佛言：善哉阿難！汝等當知：一切眾生，從無始來，生死相續，皆由不知常住真心，性淨明體，用諸妄想，此想不真，故有輪轉。

癸二、正與斥破

分二

子初、如來備破三迷

二、大眾知非無辯

子初

又分三

丑初、破妄識無處

二、斥妄識非心

三、推妄識無體

丑初

又分四

寅初、教以直心應徵

二、雙徵能見能愛

三、徵詰心目所在

四、所執七處咸非 今初

汝今欲研無上菩提，真發明性，應當直心，酬我所問。十方如來，同一道故，出離生死，皆以直心；心言直故，如是乃至，終始地位，中間永無諸委曲相。

寅二、雙徵能見能愛

阿難，我今問汝：當汝發心，緣於如來三十二相，將何所見？誰爲愛樂？（去聲）  
阿難白佛言：世尊！如是愛樂，用我心目；由目觀見，如來勝相，心生愛樂！故我發心，願捨生死。

寅三、徵詰心目所在

佛告阿難：如汝所說，真所愛樂，因於心目，若不識知，心目所在，則不能得，降伏塵勞。譬如國王，爲賊所侵，發兵討除，是兵要當，知賊所在。使汝流轉，心目爲咎，吾今問汝：唯心與目，今何所在？

寅四、所執七處咸非 分七

卯初、執心在身內

二、執心在身外 三、

執心潛眼根 四、執心分明暗 五、執心則隨有 六、執心在中間

七、執心乃無著 卯初分二 辰初、阿難引十生同計在內 二、如來以

不見身中為破 今初 （此段經文方依園瑛法師「楞嚴經講義」科判釋置此處，原經文應是第十二頁五行處）

阿難白佛言：世尊，一切世間，十種異生，同將識心，居在身內；縱觀如來，青蓮華眼，亦在佛面。我今觀此浮根四塵，祇在我面，如是識心，實居身內。

辰二、如來以不見身中為破 分五 巳初、舉例辯定 二、仍存原文

三、即例反難 四、就例攻破 五、正與結破

佛告阿難：汝今現坐如來講堂，觀祇陀林，今何所在？世尊！此大重閣，清淨講堂，在給孤園；今祇陀林，實在堂外。阿難，汝

今堂中先何所見？世尊！我在堂中，先見如來；次觀大眾；如是外望，方矚林園。阿難，汝矚林園，因何有見？世尊！此大講堂，戶牖開豁（通也），故我在堂，得遠瞻見。

已二、仍存原文

爾時世尊，在大眾中，舒金色臂，摩阿難頂，告示阿難及諸大眾：有三摩提，名大佛頂，首楞嚴王，具足萬行；十方如來，一門超出，妙莊嚴路。汝今諦聽！阿難頂禮，伏受慈旨。

已三、即例反難

佛告阿難：如汝所言：身在講堂，戶牖開豁，遠矚林園。亦有眾生，在此堂中，不見如來，見堂外者？阿難答言：世尊！在堂不

見如來，能見林泉，無有是處。阿難，汝亦如是。

巳四、就例攻破

汝之心靈，一切明了。若汝現前，所明了心，實在身內，爾時先合了知內身，頗有眾生，先見身中，後觀外物？縱不能見心、肝、脾、胃、爪生、髮長（上聲）、筋轉、脈搖，誠合明了，如何不知？必不內知，云何知外？

巳五、正與結破

是故應（平聲）知，汝言覺了能知之心，住在身內，無有是處。

卯二、執心在身外 分二

辰初、阿難引燈喻自決同佛 二、如來以身心

相知為破 今初

阿難稽首，而白佛言：我聞如來，如是法音，悟知我心，實居身外。所以者何？譬如燈光，然於室中，是燈必能先照室內，從其室門，後及庭際，一切眾生，不見身中，獨見身外，亦如燈光，居在室外，不能照室。是義必明，將無所惑，同佛了義，得無妄耶？

辰二、如來以身心相知為破 分三

巳初、喻明無干 二、驗非無干

三、正與結破 今初

佛告阿難：是諸比丘，適來從我室羅筏城，循乞搏食，歸祇陀林，我已宿齋。汝觀比丘，一人食時，諸人飽不？阿難答言：不也，世尊！何以故？是諸比丘，雖阿羅漢，軀命不同，云何一

人，能令眾飽？佛告阿難：若汝覺了知見之心，實在身外；身心相外，自不相干，則心所知，身不能覺；覺在身際，心不能知。

巳二、驗非無干

我今示汝兜羅棉手，汝眼見時，心分別不？阿難答言：如是世尊。佛告阿難：若相知者，云何在外？

巳三、正與結破

是故應知，汝言覺了能知之心，住在身外，無有是處。

卯三、執心潛眼根 分二

辰初、阿難以瑠璃合眼為喻 二、佛以法喻不

齊為破 今初

阿難白佛言：世尊！如佛所言，不見內故，不居身內，身心相

知，不相離故，不在身外，我今思惟：知在一處。佛言：處今何在？阿難言：此了知心，既不知內，而能見外，如我思忖，潛伏根裡。猶如有人：取瑠璃椀，合其兩眼，雖有物合，而不留礙；彼根隨見，隨即分別。然我覺了能知之心，不見內者，爲在根故；分明矚（瞻視也）外，無障礙者，潛根內故。

辰二、如來以法喻不齊為破 分三 巳初、正辨不齊 二、雙開兩破

三、正為結破 今初

佛告阿難：如汝所言，潛根內者，猶如瑠璃。彼人當以瑠璃籠（罩也）眼，當見山河，見瑠璃否？如是世尊，是人當以瑠璃籠眼，實見瑠璃。佛告阿難：汝心若同瑠璃合者，當見山河，何不

見眼？

巳二、雙開兩破

若見眼者，眼即同境，不得成隨；若不能見，云何說言，此了知心，潛在根內，如瑠璃合？

巳三、正與結破

是故應知：汝言覺了能知之心，潛伏根裡，如瑠璃合，無有是處。

卯四、執心分明暗分二

辰初、阿難以見明暗分內外 二、如來以不成

見內為破 今初

阿難白佛言：世尊！我今又作如是思惟：是眾生身，腑臟在中，

竅穴居外，有藏則暗，有竅則明。今我對佛，開眼見明，名爲見外；閉眼見暗，名爲見內，是義云何？

辰二、如來以不成見內爲破

分三

巳初、破所見非內

二、破能見非實

三、正與結破 今初

佛告阿難：汝當閉眼見暗之時，此暗境界，爲與眼對？爲不眼對？若與眼對，暗在眼前，云何成內？若成內者，居暗室中，無日、月、燈，此室暗中，皆汝焦腑？若不對者，云何成見？

巳二、破能見非實

若離外見，內對所成，合眼見暗，名爲身中；開眼見明，何不見面？若不見面，內對不成；見面若成，此了知心，及與眼根，乃

在虛空，何成在內？若在虛空，自非汝體，即應如來，今見汝面，亦是汝身？汝眼已知，身合非覺。必汝執言：身眼兩覺。應有二知，即汝一身，應成兩佛？

巳三、正與結破

是故應知：汝言見暗，名見內者，無有是處。

卯五、執心則隨有 分二

辰初、阿難計心隨合隨有 二、如來破其無體

無定

阿難言：我嘗聞佛，開示四眾：由心生故，種種法生；由法生故，種種心生。我今思惟：即思惟體，實我心性。隨所合處，心則隨有，亦非內、外、中間三處。

辰二、如來破其無體無定 分三

巳初、約無體破

二、約有體破

三、

正與結破 今初

佛告阿難：汝今說言，由法生故，種種心生，隨所合處，心隨有者。是心無體，則無所合；若無有體，而能合者，則十九界，因七塵合，是義不然。

巳二、約有體破

若有體者，如汝以手，自捏（捏也）

其體，汝所知心，爲復內

出？爲從外入？若復內出，還見身中；若從外來，先合見面。阿難言：見是其眼，心知非眼，爲見非義。佛言：若眼能見，汝在室中，門能見不？則諸已死，尚有眼存，應皆見物，若見物者，

云何名死？阿難！又汝覺了能知之心，若必有體，爲復一體？爲有多體？今在汝身，爲復徧體，爲不徧體？若一體者，則汝以手捏一支時，四支應覺，若感覺者，捏應無在；若捏有所，則汝一體，自不能成。若多體者，則成多人，何體爲汝？若徧體者，同前所捏；若不徧者，當汝觸頭，亦觸其足，頭有所覺，足應無知，今汝不然。

巳三、正與結破

是故應知，隨所合處，心則隨有，無有是處。

卯六、執心在中間 分二

辰初、阿難執心在根塵之中 二、如來以兼二

不兼為破 辰初分三

巳初、引教泛計中間 二、如來確定中相 三、

阿難別出己見 今初

阿難白佛言：世尊！我亦聞佛，與文殊等，諸法王子，談實相時，世尊亦言：心不在內，亦不在外。如我思惟：內無所見，外不相知；內無知故，在內不成；身心相知，在外非義，今相知故，復內無見，當在中間。

已二、如來確定中相

佛言：汝言中間，中必不迷，非無所在。今汝推中：中何爲在？爲復在處！爲當在身！若在身者，在邊非中，在中同內；若在處者，爲有所表？爲無所表？無表同無，表則無定。何以故？如人以表，表爲中時，東看則西，南觀成北，表體既混，心應雜亂。

巳三、阿難別出己見

阿難言：我所說中，非此二種，如世尊言：眼色爲緣，生於眼識，眼有分別，色塵無知，識生其中，則爲心在。

辰二、如來以兼二不兼爲破 分三 巳初、雙開兩途 二、兩途俱非

三、正與結破 今初

佛言：汝心若在根塵之中，此心之體，爲復兼二？爲不兼二？

巳二、兩途俱非

若兼二者，物體雜亂，物非體知，成敵兩立，云何爲中？兼二不成，非知不知，即無體性，中何爲相？

巳三、正與結破

是故應知，當在中間，無有是處。

卯七、執心乃無著 分二

辰初、阿難以不著一切為心

二、如來以心相

有無為破

阿難白佛言：世尊！我昔見佛，與大目連、須菩提、富樓那、舍利弗四大弟子，共轉法輪，常言：覺知分別心性，既不在內，亦不在外，不在中間，俱無所在，一切無著，名之為心。則我無著，名為心不？

辰二、如來以心相有無為破 分三

巳初、雙徵有無 二、雙示不成

三、正與結破 今初

佛告阿難：汝言覺知，分別心性，俱無在者，世間虛空，水、

陸、飛行，諸所物象，名爲一切，汝不著者，爲在爲無？

巳二、雙示不成

無則同於龜毛、兔角，云何不著？有不著者，不可名無；無相則無，非無則相，相有則在，云何無著？

巳三、正與結破

是故應知，一切無著，名覺知心，無有是處？

丑二、斥妄識非心 分二

寅初、阿難責躬請教 二、如來顯發非心 今

初

爾時阿難，在大眾中，即從座起，偏袒右肩，右膝著地，合掌恭敬，而白佛言：我是如來最小之弟，蒙佛慈愛，雖今出家，猶恃

憍憐，所以多聞，未得無漏，不能折伏，娑毘羅咒，爲彼所轉，溺於淫舍。當由不知，實際所詣！惟願世尊，大慈哀愍，開示我等，奢摩他路，令諸闡提，墮彌戾車。作是語已，五體投地。及諸大眾，傾渴翹佇，欽聞示誨。

寅二、如來顯發非心 分三

卯初、光表破顯諸相 二、發明真妄二本

三、正斥妄識非心 今初

爾時世尊，從其面門，放種種光，其光晃曜，如百千日！普佛世界，六種震動，如是十方微塵國土，一時開現。佛之威神，令諸世界，合成一界。其世界中，所有一切，諸大菩薩，皆住本國，合掌承聽。

卯二、發明真妄二本 分二

辰初、舉過出由喻顯

二、徵釋二本名體

今初

佛告阿難：一切眾生，從無始來，種種顛倒，業種自然，如惡叉聚。諸修行人，不能得成無上菩提，乃至別成聲聞、緣覺，及成外道，諸天魔王，及魔眷屬。皆由不知二種根本，錯亂修習。猶如煮沙，欲成嘉饌，縱經塵劫，終不能得。

辰二、徵釋二本名體

云何二種？阿難：一者無始生死根本。則汝今者，與諸眾生，用攀緣心，爲自性者。二者無始菩提涅槃，元清淨體。則汝今者，識精元明，能生諸緣，緣所遺者。由諸眾生，遺此本明，雖終日

行，而不自覺，枉入諸趣。

卯三、正斥妄識非心 分三

辰初，如來重徵直呵

二、阿難驚索名目

三、如來指名出過 今初

阿難，汝今欲知，奢摩他路，願出生死今復問汝。即時如來舉金色臂，屈五輪指，語阿難言：汝今見不？阿難言：見。佛言：汝何所見？阿難言：我見如來舉臂屈指，爲光明拳，耀我心目。佛言：汝將誰見？阿難言：我與大眾，同將眼見。佛告阿難：汝今答我，如來屈指，爲光明拳，耀汝心目。汝目可見，以何爲心，當我拳耀？阿難言：如來現今徵心所在，而我以心推窮尋逐，即能推者，我將爲心。佛言：咄！阿難此非汝心。

辰二、阿難驚索名目

阿難矍然！避座合掌，起立白佛：此非我心，當名何等？

辰三、如來指名出過

佛告阿難：此是前塵，虛妄相想，惑汝真性，由汝無始，至於今生，認賊爲子，失汝元常，故受輪轉。

丑三、推妄識無體 分二

寅初、阿難述怖求示

二、如來安慰顯發 今

初

阿難白佛言：世尊！我佛寵弟，心愛佛故，令我出家。我心何獨供養如來，乃至徧歷恆沙國土，承事諸佛，及善知識，發大勇猛，行諸一切難行法事，皆用此心；縱令謗法，永退善根，亦因

此心。若此發明，不是心者，我乃無心，同諸土木？離此覺知，更無所有，云何如來，說此非心？我實驚怖！兼此大眾，無不疑惑。惟垂大悲，開示未悟。

寅二、如來安慰顯發

分四

卯初、標垂教深意

二、示常說妙心

三、

況真心有體

四、顯妄識無體

今初

爾時世尊開示阿難，及諸大眾，欲令心入無生法忍。

卯二、示常說妙心

於師子座摩阿難頂，而告之言：如來常說：諸法所生，唯心所現：一切因果，世界微塵，因心成體。

卯三、況真心有體

阿難：若諸世界，一切所有，其中乃至草葉縷結。詰其根元。咸有體性，縱令虛空，亦有名貌。何況清淨，妙淨明心，性一切心，而自無體？

卯四、顯妄識無體

若汝執恡分別覺觀，所了知性，必爲心者，此心即應離諸一切色、香、味、觸諸塵事業，別有全性。如汝今者，承聽我法，此則因聲，而有分別。縱滅一切見、聞、覺、知，內守幽閒，猶爲法塵，分別影事。我非敕汝，執爲非心，但汝於心，微細揣摩，若離前塵，有分別性，即真汝心。若分別性，離塵無體，斯則前塵，分別影事。塵非常住，若變滅時，此心則同龜毛兔角；則汝

法身，同於斷滅。其誰修證，無生法忍？

子二、大眾知非無辯

即時阿難，與諸大眾，默然自失！

癸三、結歸其判

佛告阿難：世間一切諸修學人，現前雖成九次第定，不得漏盡成阿羅漢，皆由執此生死妄想，誤爲真實。是故汝今雖得多聞，不成聖果。

壬二、顯示所遺真性令見如來藏體 分二 癸初、阿難捨妄求真 二、如

來極顯真體 癸初分二 子初、悲感痛悔 二、表迷求示 今初

阿難聞已，重復悲淚！五體投地長跪合掌，而白佛言：自我從

佛，發心出家。恃佛威神，常自思惟，無勞我修，將謂如來，惠我三昧，不知身心本不相代，失我本心，身雖出家，心不入道；譬如窮子，捨父逃逝。今日乃知：雖有多聞。若不修行，與不聞等；如人說食，終不能飽。

子二、表迷求示

世尊！我等今者，二障所纏，良由不知寂常心性，惟願如來，哀愍窮露，發妙明心，開我道眼。

癸二、如來極顯真體 分二

子初、光表許說 二、正顯即真 今初

即時如來，從胸卍字，湧出寶光，其光晃昱，有百千色。十方微塵，普佛世界，一時周徧，徧灌十方，所有寶剎，諸如來頂，旋

至阿難，及諸大眾。告阿難言：吾今爲汝，建大法幢；亦令十方，一切眾生獲妙微密性，淨明心，得清淨眼。

子二、正顯即真 分三

丑初、剋就根性直指真心

二、會通四科即性常

住 三、圓彰七大即性周徧

丑初又分二

寅初、帶妄顯真 二、剖妄

出真 今初

寅初、帶妄顯真 分十

卯初、顯見是心

二、顯見不動

三、顯見不減

四、顯見不失

五、顯見無還

六、顯見不雜

七、顯見無礙

八、顯

見不分

九、顯見超情

十、顯見離見

卯初、顯見是心 分五

辰初、雙舉法喻現前

二、雙陳法喻令審

三、

辨明無眼有見

四、辨明矚暗成見

五、辨定眼見是心

今初

阿難，汝先答我，見光明拳。此拳光明，因何所有？云何成拳？汝將誰見？阿難言：由佛全體，閻浮檀金，絕如寶山，清淨所生，故有光明：我實眼觀；五輪指端，屈握示人，故有拳相。

辰二、雙陳法喻令審

佛告阿難：如來今日，實言告汝；諸有智者，要以譬喻，而得開悟。阿難，譬如我拳，若無我手，不成我拳；若無汝眼，不成汝見；以汝眼根，例我拳理，其義均（同也）否？阿難言：唯然，世尊！既無我眼，不成我見；以我眼根（所成見）例如來（手所成）拳，事義相類。

辰三、辨明無眼有見

佛告阿難：汝言相類，是義不然。何以故？如無手人，拳畢竟滅；彼無眼者，非見全無。所以者何？汝試於途，詢問盲人：汝何所見？彼諸盲人，必來答汝：我今眼前，惟見黑暗，更無他矚。以是義觀，前塵自暗，見何虧損？

辰四、辨明矚暗成見

阿難言：諸盲眼前，惟覩（見也）黑暗，云何成見？佛告阿難：諸盲無眼，惟覩黑暗，與有眼人，處於暗室，二黑有別？爲無有別？如是世尊：此暗中人，與彼群盲，二黑較量，曾無有異。

辰五、辨定眼見是心 分二

巳初、例明眼見之謬 二、結中心見正義

今初

阿難：若無眼人，全見前黑，忽得眼光，還於前塵，見種種色，名眼見者，彼暗中人，全見前黑，忽獲燈光，亦於前塵，見種種色，應名燈見。若燈見者，燈能有見，自不名燈；又則燈觀，何關汝事？

巳二、結申心見正義

是故當知：燈能顯色，如是見者，是眼非燈；眼能顯色，如是見性，是心非眼。

卯二、顯見不動

分四

辰初、敘眾望示

二、辨定客塵

三、正顯不動

四、普責迷認 今初

阿難雖復得聞是言，與諸大眾，口已默然，心未開悟。猶冀

（希

望也)

如來，慈音宣示。合掌清心，佇佛悲誨。

辰二、辨定客塵分二

巳初、如來詢究原悟

二、陳那詳答佛印 今初

爾時世尊，舒兜羅繇網相光手，開五輪指，誨敕阿難，及諸大眾：我初成道，於鹿園中，爲阿若多五比丘等，及汝四眾言：一切眾生不成菩提，及阿羅漢，皆由客塵煩惱所誤。汝等當時，因何開悟，今成聖果？

巳二、陳那詳答佛印

時憍陳那，起立白佛：我今長老，於大眾中，獨得解名，因悟客塵二字成果。世尊！譬如行客，投寄旅亭，或宿、或食，宿、食事畢，俶裝前途，不遑安住；若實主人，自無攸往。如是思惟：

不住名客，住名主人，以不住者，名爲客義。又如新霽，清暘升天，光入隙中，發明空中，諸有塵相。塵質搖動，虛空寂然。如是思惟：澄寂名空，搖動名塵，以搖動者，名爲塵義。佛言：如是！

辰三、正顯不動 分二

巳初、對外境顯不動 二、對內身顯不動 今初

即時如來，於大眾中，屈五輪指，屈已復開，開已又屈，謂阿難言：汝今何見？阿難言：我見如來，百寶輪掌，眾中開合。佛告阿難：汝見我手，眾中開合，爲是我手，有開有合？爲復汝見，有開有合？阿難言：世尊寶手眾中開合，我見如來，手自開合，非我見性，有開有合。佛言：誰動？誰靜？阿難言：佛手不住，

而我見性，尚無有靜，誰爲無住？佛言：如是。

巳二、對內身顯不動

如來於是，從輪掌中，飛一寶光，在阿難右，即時阿難迴首右盼；又放一光，在阿難左，阿難又則迴首左盼。佛告阿難：汝頭今日何因搖動？阿難言：我見如來出妙寶光，來我左右，故左右觀，頭自搖動。阿難，汝盼佛光，左右動頭，爲汝頭動？爲復見動？世尊！我頭自動，而我見性，尚無有止，誰爲搖動？佛言：如是。

辰四、普責迷認 分三

巳初、取昔所悟客塵 二、令觀現前主空 三、

怪責自取流轉 今初

於是如來，普告大眾：若復眾生，以搖動者，名之爲塵；以不住者，名之爲客。

已二、令觀現前主空

汝觀阿難，頭自搖動，見無所動；又汝觀我，手自開合，見無舒卷。

已三、怪責自取流轉

云何汝今，以動爲身？以動爲境？從始泊終，念念生滅？遺失真性，顛倒行事，性心失真，認物爲己，輪迴是中，自取流轉。



大佛頂如來密因修證了義諸菩薩萬行首楞嚴經  
(卷第二)

卯三、顯見不滅分四

辰初、會眾作意啓請

二、匿王出詞別請

三、

如來徵顯不滅

四、王等極為慶喜 今初

爾時阿難，及諸大眾，聞佛示誨，身心泰然！念無始來，失却本心，妄認緣塵，分別影事。今日開悟，如失乳兒，忽遇慈母，合掌禮佛。願聞如來，顯出身心，真妄虛實，現前生滅，與不生滅，二發明性。

辰二、匿王出詞別請

時波斯匿王，起立白佛：我昔未承諸佛誨教，見迦旃延，毘羅胝子。咸言：此身死後斷滅，名爲涅槃。我雖值佛，今猶狐疑，云何發揮證知此心，不生滅地？今此大眾，諸有漏者，咸皆願聞。

辰三、如來徵顯不滅

分二

巳初

顯身有遷變

二、指見無生滅

巳初

分二

午初、略彰變滅

二、詳敘變滅

今初

佛告大王：汝身現在，今復問汝：汝此肉身，爲同金剛，常住不朽？爲復變壞？世尊！我今此身，終從變滅。佛言：大王！汝未曾滅，云何知滅？世尊！我此無常變壞之身，雖未曾滅，我觀（去聲）現前念念遷謝，新新不住，如火成灰，漸漸銷殞，殞亡不息，決知此身，當從滅盡。佛言：如是！

午二、詳敘變滅 分三

未初、較量老少

二、詳敘變狀

三、總結必滅

今初

大王！汝今生齡，已從衰老，顏貌何如童子之時？世尊！我昔孩孺，膚腴潤澤；年至長成，血氣充滿；而今頹齡，迫於衰老，形色枯悴，精神昏昧，髮白面皺，逮將不久！如何見比，充盛之時？

未二、詳敘變狀

佛言：大王！汝之形容，應不頓朽？王言：世尊！變化密移，我誠不覺，寒暑遷流，漸至於此。何以故？我年二十，雖號年少，顏貌已老初十歲時；三十之年，又衰二十；於今六十，又過於

二，觀五十時，宛然強壯。世尊！我見密移，雖此殂落，其間流易，且限十年；若復令我微細思惟，其變寧惟一紀、二紀，實惟年變；豈惟年變？亦兼月化；何直月化？兼又日遷；沉思諦觀，剎那剎那，念念之間，不得停住。

未三、總結必滅

故知我身，終從變滅。

已二、指見無生滅分三

午初、徵定許說

二、所見不變

三、能見不

滅 今初

佛告大王：汝見變化，遷改不停，悟知汝滅；亦於滅時，汝知身中，有不滅耶？波斯匿王，合掌白佛：我實不知。佛言：我今示

汝，不生滅性。

午二、所見不變

大王！汝年幾時，見恆河水？王言：我生三歲，慈母攜我，謁耆婆天，經過此流，爾時即知，是恆河水。佛言：大王！如汝所說，二十之時，衰於十歲，乃至六十，日月歲時，念念遷變；則汝三歲，見此河時，至年十三，其水云何？王言：如三歲時，宛然無異；乃至於今，年六十二，亦無有異。

午三、能見不滅

佛言：汝今自傷，髮白面皺，其面必定皺於童年；則汝今時觀此恆河，與昔童時，觀河之見，有童耄不？王言：不也，世尊！佛

言：大王！汝面雖皺，而此見精，性未曾皺；皺者爲變，不皺非變。變者受滅，彼不變者，元無生滅，云何於中，受汝生死？而猶引彼末伽黎等，都言此身，死後全滅。

辰四、王等極為慶喜

王聞是言，信知身後，捨生趣生。與諸大眾，踴躍歡喜，得未曾有！

卯四、顯見不失 分三

辰初、阿難因悟反疑前語

二、如來發明因倒說

失 三、深責迷倒結合前喻 今初

阿難即從座起，禮佛合掌，長跪白佛：世尊！若此見聞，必不生滅，云何世尊，名我等輩，遺失真性，顛倒行事？願興慈悲，洗

我塵垢。

辰二、如來發明因倒說失分二 巳初、即臂倒無失為喻 二、以心倒無

失合喻 巳初分三 午初、定臂之倒相 二、定臂之正相 三、明顯倒

非失 今初

即時如來，垂金色臂，輪手下指，示阿難言：汝今見我母陀羅手  
（此云印手），爲正爲倒？阿難言：世間眾生，以此爲倒，而我  
不知，誰正誰倒。

午二、定臂之正相

佛告阿難：若世間人以此爲倒，即世間人，將何爲正？阿難言：  
如來豎臂，兜羅繇手，上指於空，則名爲正。

午三、明顛倒非失

佛即豎臂，告阿難言：若此顛倒，首尾相換，諸世間人，一倍瞻視！

巳二、以心倒無失合喻 分三

午初、標名合定

二、身無正倒 三、正

倒從心 今初

則知汝身，與諸如來，清淨法身，比類發明，如來之身，名正徧知；汝等之身，號性顛倒。

午二、身無正倒

隨汝諦觀，汝身佛身，稱顛倒者，名字何處，號爲顛倒？於時阿難，與諸大眾，瞪瞞瞻佛，目睛不瞬，不知身心，顛倒所在。

午三、正倒從心 分三 未初、標如來慈悲告眾 二、引昔教以明正相

三、責遺認以明正相 今初

佛興慈悲，哀愍阿難，及諸大眾，發海潮音，徧告同會：

未二、引昔教以明正相

諸善男子！我常說言：色心諸緣，及心所使，諸所緣法，唯心所現。汝身汝心，皆是妙明，真精妙心中所現物。

未三、責遺認以明正相 分三 申初、怪責遺真認妄 二、法說認遺之相

三、喻說遺認之相 今初

云何汝等，遺失本妙，圓妙明心，寶明妙性，認悟中迷？

申二、法說認遺之相

晦昧爲空，空晦暗中，結暗爲色。色雜妄想，想相爲身。聚緣內搖，趣外奔逸，昏擾擾相，以爲心性。一迷爲心，決定惑爲色身之內。不知色身，外洎山河，虛空大地，咸是妙明，真心中物。

申三、喻說遺認之相

譬如澄清，百千大海，棄之，惟認一浮漚體。目爲全潮，窮盡瀛渤。

辰三、深責迷倒結合前喻

汝等即是迷中倍人，如我垂手，等無差別，如來說爲可憐愍者！

卯五、顯見無還

分四

辰初、阿難求決取捨 二、如來力為破顯 三、

承前判決取捨 四、結歎自述淪溺 今初

阿難承佛悲救深誨，垂泣叉手，而白佛言：我雖承佛如是妙音，悟妙明心，元所圓滿，常住心地。而我悟佛，現說法音，現以緣心，允所瞻仰。徒獲此心，未敢認爲本元心地。願佛哀愍，宣示圓音，拔我疑根，歸無上道。

辰二、如來力為破顯

分二

巳初、破緣心有還

二、顯見性無還

巳初

分三

午初、破所緣之法

二、破能緣之心

三、指各有所還

今初

佛告阿難：汝等尚以緣心聽法，此法亦緣，非得法性。如人以手指月示人，彼人因指，當應看月。若復觀指，以爲月體，此人豈惟亡失月輪，亦亡其指，何以故？以所標指，爲明月故。豈惟亡指，亦復不識明之與暗。何以故？即以指體，爲月明性，明、暗

二性，無所了故。汝亦如是！

午二、破能緣之心

若以分別，我說法音，爲汝心者，此心自應離分別音，有分別性；譬如有客，寄宿旅亭，暫止便去，終不常住，而掌亭人，都無所去，名爲亭主。此亦如是：若真汝心，則無所去，云何離聲，無分別性？斯則豈惟聲分別心；分別我容，離諸色相，無分別性。如是乃至，分別都無，非色非空，拘舍離等，昧爲冥諦，離諸法緣，無分別性。

午三、指各有所還

則汝心性，各有所還，云何爲主？

已二、顯見性無還 分二 午初、阿難求示無還 二、如來詳與顯示 今

初

阿難言：若我心性，各有所還，則如來說，妙明元（本也）心，云何無還？惟垂哀愍，爲我宣說。

午二、如來詳與顯示 分四 未初、指喻見精切真 二、許示無還之旨

三、備彰八相皆還 四、獨顯見性無還 今初

佛告阿難：且汝見我，見精明元，此見雖非妙精明心，如第二月，非是月影。

未二、許示無還之旨

汝應諦聽！今當示汝無所還地：

未三、備彰八相皆還

阿難！此大講堂，洞開東方，日輪升天，則有明曜；中夜黑月，雲霧晦暝，則復昏暗；戶牖之隙，則復見通；牆宇之間，則復觀壅；分別之處，則復見緣；頑虛之中，徧是空性；鬱埒之象，則紆昏塵；澄霽斂氛，又觀清淨。阿難，汝咸看此諸變化相，吾今各還本所因處。云何本因？阿難！此諸變化，明還日輪，何以故？無日不明，明因屬日，是故還日。暗還黑月，通還戶牖，壅還牆宇，緣還分別，頑虛還空，鬱埒還塵，清明還霽，則諸世間，一切所有，不出斯類。

未四、獨顯見性無還

汝見八種見精明性，當欲誰還？何以故？若還於明，則不明時，無復見暗，雖明暗等，種種差別，見無差別。

辰三、承前判決取捨

諸可還者，自然非汝，不汝還者，非汝而誰？

辰四、結歎自述淪溺

則知汝心，本妙明淨。汝自迷悶，喪本受淪，於生死中，常被漂溺，是故如來，名可憐愍！

卯六、顯見不雜 分二  
辰初、阿難以物見混雜疑自性 二、如來以物見

分明顯自性 今初

阿難言：我雖識此見性無還，云何得知，是我真性？

辰二、如來以物見分明顯自性 分四 巳初、標定能所 二、就中揀擇

三、物見分明 四、責疑自性 今初

佛告阿難，吾今問汝：今汝未得無漏清淨，承佛神力，見於初禪，得無障礙；而阿那律，見閻浮提，如觀掌中，菴摩羅果。諸菩薩等，見百千界；十方如來，窮盡微塵，清淨國土，無所不矚；眾生洞視，不過分寸。阿難！且吾與汝，觀四天王所住宮殿，中間徧覽，水、陸、空行，雖有昏明，種種形像，無非前塵，分別留礙。

巳二、就中揀擇

汝應於此，分別自他，今吾將汝，擇於見中，誰是我體？誰爲物

象？

巳三、物見分明

分四

午初、正明物不是見

二、正明見不是物

三、

反辨見不是物

四、反辨物不是見

今初

阿難！極汝見源，從日月宮，是物非汝；至七金山。周徧諦觀，雖種種光，亦物非汝；漸漸更觀，雲騰鳥飛，風動塵起，樹木山川，草芥人畜，咸（皆也）物非汝。

午二、正明見不是物

阿難！是諸近遠，諸有物性，雖復差殊，同汝見精，清淨所矚，則諸物類，自有差別，見性無殊，此精妙明，誠汝見性。

午三、反辨見不是物

若見是物，則汝亦可，見吾之見？若同見者，名爲見吾，吾不見時何不見吾不見之處？若見不見，自然非彼不見之相；若不見吾不見之地，自然非物，云何非汝？

午四、反辨物不是見

又則汝今見物之時，汝既見物，物亦見汝。體性紛雜，則汝與我，並諸世間，不成安立。阿難！若汝見時，是汝非我。見性周徧，非汝而誰？

巳四、責疑自性

云何自疑，汝之真性，性汝不真，取我求實？

卯七、顯見無礙

分二

辰初、阿難因塵疑礙

二、如來顯性無礙

今初

阿難白佛言：世尊！若此見性，必我非餘。我與如來，觀四天王，勝藏寶殿，居日月宮，此見周圓，徧娑婆國，退歸精舍，祇見伽藍，清心戶堂，但瞻簷廡。世尊！此見如是，其體本來周徧一界，今在室中，唯滿一室？爲復此見，縮大爲小？爲當牆宇，夾令斷絕？我今不知斯義所在，願垂弘慈，爲我敷演。

辰二、如來顯性無礙 分五

巳初、明不定由塵 二、教忘塵自徧

三、以反難顯謬 四、出成礙之由 五、教轉物自在 今初

佛告阿難：一切世間，大小內外，諸所事業，各屬前塵，不應說言，見有舒縮。譬如方器，中見方空。吾復問汝：此方器中，所見方空，爲復定方？爲不定方？若定方者，別安圓器，空應不

圓？若不定者，在方器中，應無方空？汝言：不知斯義所在。義性如是，云何爲在？

已二、教亡塵自徧

阿難！若復欲令入無方圓，但除器方，空體無方，不應說言，更除虛空，方相所在。

已三、以反難顯謬

若如汝問，入室之時。縮見令小，仰觀日時，汝豈挽見，齊於日面？若築牆宇，能夾見斷，穿爲小竇，寧無續迹？是義不然。

已四、出成礙之由

一切眾生，從無始來，迷己爲物，失於本心，爲物所轉，故於是

中，觀大觀小。

巳五、教轉物自在

若能轉物，則同如來。身心圓明，不動道場。於一毛端，徧能含受，十方國土。

卯八、顯見不分 分二

辰初、阿難疑身見各體

二、如來明萬法一體

今初

阿難白佛言：世尊！若此見精，必我妙性，今此妙性，現在我前。見必我真，我今身心，復是何物？而今身心，分別有實；彼見無別，分辨我身。若實我心，令我今見，見性實我而身非我？何殊如來，先所難言：物能見我。惟垂大慈，開發未悟。

辰二、如來明萬法一體 分六 巳初、直斥妄擬 二、正遣是見 三、轉

遣非見 四、眾懼俯慰 五、文殊啓請 六、如來慈示 今初

佛告阿難：汝今所言，見在汝前，是義非實。

巳二、正遣是見 分三 午初、如來問 二、阿難答 三、佛印證 今初

若實汝前，汝實見者，則此見精，既有方所，非無指示。且今與汝，坐祇陀林，徧觀林渠，及與殿堂，上至日月，前對恆河。汝今於我師子座前，舉手指陳是種種相：陰者是林，明者是日，礙者是壁，通者是空，如是乃至草樹纖毫，大小雖殊，但可有形，無不指著。若必其見，現在汝前，汝應以手，確實指陳，何者是見？阿難當知：若空是見，既已成見，何者是空？若物是見，既

已是見，何者爲物？汝可微細，披剝萬象，析出精明，淨妙見元，指陳示我。同彼諸物，分明無惑。

午二、阿難答

阿難言：我今於此，重閣講堂，遠泊（音暨）恆河，上觀日月，舉手所指，縱目所觀，指皆是物，無是見者。世尊！如佛所說，況我有漏，初學聲聞；乃至菩薩，亦不能於萬物象前，剖出精見，離一切物，別有自性。

午三、佛印證

佛言：如是！如是！

巳三、轉遣非見 分三

午初、如來問

二、阿難答

三、佛印證

今初

佛復告阿難：如汝所言，無有見精，離一切物，別有自性，則汝所指，是物之中，無是見者。今復告汝：汝與如來，坐祇陀林，更觀林苑，乃至日月，種種象殊，必無見精，受汝所指，汝又發明，此諸物中，何者非見？

午二、阿難答

阿難言：我實徧見，此祇陀林，不知是中，何者非見。何以故？若樹非見，云何見樹？若樹即見，復云何樹？如是乃至，若空非見，云何見空？若空即見，復云何空？我又思惟：是萬象中，微細發明，無非見者。

午三、佛印證

佛言：如是！如是！

巳四、眾懼俯慰

於是大眾，非無學者，聞佛此言，茫然不知，是義終始。一時惶悚，失其所守。如來知其魂慮變懼，心生憐愍，安慰阿難，及諸大眾：諸善男子！無上法王，是真實語，如所如說，不誑不妄，非末伽黎，四種不死，矯亂論議；汝諦思惟，無忝哀慕！

巳五、文殊啓請 分二

午初、舉疑代問

二、揀過求示

今初

是時文殊師利法王子，愍諸四眾，在大眾中，即從座起，頂禮佛足，合掌恭敬，而白佛言：世尊！此諸大眾，不悟如來，發明二種精見，色、空，是、非是義。世尊！若此前緣色空等象，若是

見者，應有所指，若非見者，應無所矚。而今不知是義所歸，故有驚怖！

午二、揀過求示

非是疇昔，善根輕渺（音鮮），惟願如來，大慈發明，此諸物

象，與此見精，元是何物？於其中間，無是非是。

巳六、如來慈示 分二 午初、曉以無是非之故 二、教以出是非之法

午初分四 未初、明一真無是非 二、喻一真索是非 三、答本真無二

相 四、總以法而合喻 今初

佛告文殊及諸大眾：十方如來，及大菩薩，於其自住三摩地中，見與見緣，並所相，如虛空華，本無所有。此見及緣，元是菩

提，妙淨明體，云何於中，有是非是？

未二、喻一真索是非

文殊，吾今問汝：如汝文殊，更有文殊，是文殊者爲無文殊？

未三、答本真無二相

如是世尊！我真文殊，無是文殊。何以故？若有是者，則二文殊，然我今日，非無文殊，於中實無，是非二相。

未四、總以法而合喻

佛言：此見妙明，與諸空塵，亦復如是。

午二、教以出是非之法 分三

未初、曲顯真妄二相 二、別舉真妄二喻

三、以法各合二喻 今初

本是妙明，無上菩提，淨圓真心，妄爲色、空、及與聞見。

未二、別舉真妄二喻

如第二月，誰爲是月？又誰非月？文殊，但一月真，中間自無是月非月。

未三、以法各合二喻

是以汝今，觀見與塵，種種發明，名爲妄想，不能於中，出是非。由是真精，妙覺明性，故能令汝，出指非指。

卯九、顯見超情

分四

辰初、正遣自然

二、正遣因緣

三、迭拂妄情

四、責其滯情

辰初分二

巳初、阿難約徧常義疑自然

二、如來約隨

緣義以破之

巳初分三

午初、領性徧常

二、疑濫外計

三、疑違自

宗 今初

阿難白佛言：世尊！誠如法王所說，覺緣徧十方界，湛然常住，性非生滅。

午二、疑濫外計

與先梵志，娑毘迦羅，所談冥諦，及投灰等，諸外道種，說有真我，徧滿十方，有何差別？

午三、疑違自宗

世尊亦曾於楞伽山，爲大慧等，敷演斯義：彼外道等，常說自然，我說因緣，非彼境界。我今觀此：覺性自然，非生非滅，遠離一切虛妄顛倒，似非因緣，與（同也）彼自然；云何開示，不

入羣邪，獲真實心，妙覺明性？

巳二、如來約隨緣義以破之 分二 午初、責惑索體 二、詳與詰破 今

初

佛告阿難：我今如是，開示方便，真實告汝，汝猶未悟，惑爲自然！阿難！若必自然，自須甄明，有自然體。

午二、詳與詰破

汝且觀此，妙明見中，以何爲自。此見爲復以明爲自？以暗爲自？以空爲自？以塞爲自？阿難！若明爲自，應不見暗；若復以空爲自體者，應不見塞；如是乃至，諸暗等相，以爲自者，則於明時，見性斷滅，云何見明？

辰二、正遣因緣 分二 巳初、阿難翻自然而疑因緣 二、如來約不變義

以破之 今初

阿難言：必此妙見，性非自然，我今發明，是因緣生。心猶未明，咨詢如來，是義云何，合因緣性？

巳二、如來約不變義以破之 分二 午初、約因破 二、約緣破 今初

佛言：汝言因緣，吾復問汝：汝今因見，見性現前，此見爲復因明有見？因暗有見？因空有見？因塞有見？阿難！若因明有，應不見暗；如因暗有，應不見明；如是乃至，因空、因塞，同於明暗。

午二、約緣破

復次，阿難！此見又復緣明有見？緣暗有見？緣空有見？緣塞有見？阿難！若緣空有，應不見塞；若緣塞有，應不見空；如是乃至緣明、緣暗，同於空、塞。

辰三、迭拂忘情

當知如是精覺妙明，非因非緣，亦非自然。非不自然，無非、不非，無是、非是。離一切相，即一切法。

辰四、責其滯情

汝今云何，於中措心，以諸世間，戲論名相，而得分別？如以手掌，撮摩虛空，祇益自勞，虛空云何，隨汝執捉？

卯十、顯見離見 分四

辰初、引教質問

二、明昔是權

三、辨今非緣

四、正顯離見 今初

阿難白佛言：世尊！必妙覺性，非因非緣，世尊云何常與比丘宣說：見性具四種緣？所謂因空、因明、因心、因眼，是義云何？

辰二、明昔是權

佛言：阿難！我說世間，諸因緣相，非第一義。

辰三、辨今非緣

阿難！吾復問汝：諸世間人，說我能見，云何名見？云何不見？阿難言：世人因於日、月、燈光，見種種相，名之爲見；若復無此三種光明，則不能見。阿難！若無明時，名不見者，應不見暗！若必見暗，此但無明，云何無見？阿難！若在暗時，不見明

故，名爲不見；今在明時，不見暗相，還名不見！如是二相，俱名不見。若復二相，自相陵奪，非汝見性，於中暫無。如是則知，二俱名見，云何不見？

辰四、正顯離見 分三

巳初、先定離緣第一義

二、例成離見第一義

三、詰責勸勉善思惟 今初

是故阿難！汝今當知：見明之時，見非是明；見暗之時，見非是暗；見空之時，見非是空；見塞之時，見非是塞。

巳二、例成離見第一義

四義成就！汝復應知：見見之時，見非是見；見猶離見，見不能及。云何復說因緣、自然，及和合相？

已三、詰責勸勉善思惟

汝等聲聞，狹劣無識，不能通達，清淨實相。吾今誨汝，當善思惟，無得疲怠，妙菩提路。

寅二、剖妄出真 分三

卯初、述迷請示

二、佛慈許宣

三、分別開示

今初

阿難白佛言：世尊！如佛世尊，爲我等輩，宣說因緣，及與自然；諸和合相，與不和合，心猶未開。而今更聞，見見非見，重增迷悶！伏願弘慈，施大慧目，開示我等，覺心明淨。作是語已，悲淚頂禮，承受聖旨。

卯二、佛慈許宣

爾時世尊，憐愍阿難，及諸大眾，將欲敷演，大陀羅尼，諸三摩提，妙修行路。告阿難言：汝雖強記，但益多聞。於奢摩他，微密觀照，心猶未了，汝今諦聽，吾當爲汝，分別開示。亦令將來，諸有漏者，獲菩提果。

卯三、分別開示 分二 辰初、釋其迷悶 二、開其未開 辰初分三 巳

初、雙標二見 二、各舉易例 三、進退合明 今初

阿難！一切眾生，輪迴世間，由二顛倒，分別見妄，當處發生。當業輪轉。云何二見？一者眾生別業妄見；二者眾生同分妄見。

巳二、各舉易例 分二 午初、別業妄見 二、同分妄見 午初分五 未

初、徵陳所見 二、審難即離 三、詳示妄因 四、喻明所以 五、以

法合喻 今初

云何名爲別業妄見？阿難！如世間人，目有赤眚，夜見燈光，別有圓影，五色重疊。

未二、審難即離

於意云何？此夜燈明，所現圓光，爲是燈色？爲當見色？阿難！此若燈色，則非眚人，何不同見？而此圓影唯眚之觀？若是見色，見已成色，則彼眚人，見圓影者，名爲何等？復次，阿難！若此圓影，離燈別有，則合傍觀，屏、帳、几、筵有圓影出？離見別有，應非眼矚，云何眚人，目見圓影？

未三、詳示妄因

是故當知：色實在燈，見病爲影；影、見俱眚，見眚非病，終不應言：是燈是見；於是中有非燈非見。

未四、喻明所以

如第二月，非體非影。何以故？第二之觀，捏所成故。諸有智者，不應說言：此捏根元，是形、非形，離見、非見。

未五、以法合顯

此亦如是，目眚所成，今欲名誰，是燈是見？何況分別，非燈非見？

午二、同分妄見 分二

未初、徵陳所見 二、了無其實 今初

云何名爲同分妄見？阿難！此閻浮提，除大海水，中間平陸有三

千洲。正中大洲，東西括量，大國凡有二千三百，其餘小洲，在諸海中，其間或有三兩百國，或一、或二，至於三十、四十、五十。阿難！若復此中，有一小洲，只有兩國，惟一國人，同感惡緣。則彼小洲，當土眾生，覩（見也）諸一切，不詳境界：或見二日，或見兩月，其中乃至暈、適、珮、玦、彗、孛、飛、流、負、耳、虹、蜺，種種惡相。

未二、了無其實

但此國見，彼國眾生，本所不見，亦復不聞。

已三、進退合明

分二

午初、總標

二、別明

今初

阿難！吾今爲汝，以此二事，進、退合明。

午二、別明 分二 未初、例明別業 二、例明同分 未初又分三 申

初、舉能例法牒定青妄 二、就所例法進別合別 三、結見見即離釋迷

悶 今初

阿難！如彼眾生，別業妄見，矚燈光中，所現圓影，雖現似境，終彼見者，目眚所成。眚即見勞，非色所造。然見眚者，終無見咎。

申二、就所例法進別合別 分二 酉初、總成例意 二、詳應前文 今初

例汝今日：以目觀見，山河國土，及諸眾生，皆是無始，見病所成。

酉二、詳應前文

見與見緣，似現前境，元我覺明，見所緣眚，覺見即眚。本覺明心，覺緣非眚。

申三、結見見即釋離迷悶 分二

酉初、令取上義轉釋 二、令對目前會

釋 今初

覺所覺眚，覺非眚中。此實見見，云何復名，覺、聞、知、見？

酉二、令對目前會釋

是故汝今，見我及汝，並諸世間，十類眾生，皆即見眚，非見眚者。彼見真精，性非眚者，故不名見。

未二、例明同分 分三

申初、舉能例法退同合別 二、就所例法進同合

同 三、結離見即覺教取證 今初

阿難！如彼眾生，同分妄見，例彼妄見，別業一人。一病目人，同彼一國，彼見圓影，眚妄所生。此眾同分，所見不祥，同見業中，瘴惡所起。俱是無始，見妄所生。

申二、就所例法進同合同

例閻浮提，三千洲中，兼四大海，娑婆世界，並洎十方，諸有漏國，及諸眾生。同是覺明，無漏妙心，見聞覺知，虛妄病緣，和合妄生，和合妄死。

申三、結離見即覺教取證

若能遠離諸和合緣，及不和合，則復滅除諸生死因。圓滿菩提，不生滅性。清淨本心，本覺常住。

辰二、開其未開 分二 巳初、躡前悟與未悟 二、正破和合俱非 今初

阿難，汝雖先悟，本覺妙明，性非因緣，非自然性；而猶未明如是覺元，非和合生，及不和合。

巳二、正破和合俱非 分二 午初、先破和合 二、破非和合 午初又分

二 未初、總舉妄惑 二、別為破斥 今初

阿難！吾今復以前塵問汝：汝今猶以一切世間，妄想和合，諸因緣性而自疑惑，證菩提心和合起者。

未二、別為破斥 分二 申初、破和 二、破合 今初

則汝今者，妙淨見精，為與明和？為與暗和？為與通和？為與塞和？若明和者，且汝觀明，當明現前，何處雜見？見相可辨，雜

何形像？若非見者，云何見明？若即見者，云何見見？必見圓滿，何處和明？若明圓滿，不合見和！見必異明，雜則失彼性、明名字，雜失明、性，和明非義。彼暗與通，及諸群塞，亦復如是。

申二、破合

復次，阿難！又汝今者，妙淨見精，爲與明合？爲與暗合？爲與通合？爲與塞合？若明合者，至於暗時，明相已滅，此見即不與諸暗合，云何見暗？若見暗時，不與暗合，與明合者，應非見明！既不見明，云何明合，了明非暗？彼暗與通，及諸群塞，亦復如是。

午二、破非和合 分二  
未初、承示轉惑 二、別為破斥 今初

阿難白佛言：世尊！如我思惟：此妙覺元，與諸緣塵，及心念慮，非和合耶？

未二、別為破斥 分二  
申初、破非和 二、破非和 今初

佛言：汝今又言，覺非和合。吾復問汝：此妙見精，非和合者，爲非明和？爲非暗和？爲非通和？爲非塞和？若非明和，則見與明，必有邊畔！汝且諦觀：何處是明？何處是見？在見在明，自何爲畔？阿難！若明際中，必無見者，則不相及，自不知其明相所在，畔云何成？彼暗與通，及諸群塞，亦復如是！

申二、破非合

又妙見精，非和合者，為非明合？為非暗合？為非通合？為非塞合？若非明合，則見與明，性、相乖角，如耳與明，了不相觸。見且不知，明相所在，云何甄明，合、非合理？彼暗與通，及諸群塞，亦復如是！

丑二、會通四科即性常住 分二 寅初、總標即妄即真 二、別明即妄即

真 寅初分二 卯初、明幻化相即真 二、會四科法即真 今初

阿難！汝猶未明，一切浮塵，諸幻化相，當處出生，隨處滅盡，幻妄稱相，其性真為妙覺明體。

卯二、會四科法即真

如是乃至：五陰、六入，從十二處至十八界，因緣和合，虛妄有

生；因緣別離，虛妄名滅。殊不能知，生滅去來，本如來藏，常住妙明，不動周圓，妙真如性。性真常中，求於去、來、迷、悟、生死，了無所得。

寅二、別明即妄即真

分四

卯初、會五陰即藏性

二、會六入即藏性

三、會十二處即藏性

四、會十八界即藏性

卯初分二

辰初、總徵

二、別釋 今初

阿難！云何五陰，本如來藏，妙真如性？

辰二、別釋 分五

巳初、色陰

二、受陰

三、想陰

四、行陰

五、

識陰

巳初分三

午初、舉喻合法

二、就喻詳辨

三、結妄歸真

今

初

阿難！譬如有人，以清淨目，觀晴空，惟一晴空，迴無所有。其人無故，不動目睛，瞪以發勞，則於虛空，別見狂華，復有一切，狂亂非相。色陰當知，亦復如是！

午二、就喻詳辨

阿難！是諸狂華，非從空來，非從日出。如是，阿難！若空來者，既從空來，還從空入，若有出入，即非虛空，空若非空，自不容其華相起滅；如阿難體，不容阿難。若日出者，既從日出，還從日入。即此華性，從日出故，當合有見！若有見者，去既華空，旋合見眼？若無見者，出既翳空，旋當翳眼！又見華時，目應無翳，云何晴空，號清明眼？

午三、結妄歸真

是故當知：色陰虛妄，本非因緣，非自然性。

巳二、受陰 分三

午初、舉喻合法

二、就喻詳辨

三、結妄歸真 今

初

阿難！譬如有人，手足宴安，百骸調適，忽如忘生，性無違順。

其人無故以二手掌，於空相摩，（於二手中）妄生澀、滑、冷、

熱諸相。受陰當知，亦復如是！

午二、就喻詳辨

阿難！是諸幻觸，不從空來，不從掌出。如是，阿難！若空來者，既能觸掌，何不觸身？不應虛空選擇來觸！若從掌出，應非

待合？又掌出故，合則掌知，離則觸入，臂、腕、骨、髓，應亦覺知入時蹤跡！必有覺心，知出知入，自有一物，身中往來，何待合知，要名爲觸？

午三、結妄歸真

是故當知：受陰虛妄，本非因緣，非自然性。

巳三、想陰 分三

午初、舉喻合法

二、就喻詳辨

三、結妄歸真

今

初

阿難！譬如有人，談說酢梅，口中水出；思蹋懸崖，足心酸澀。想陰當知，亦復如是！

午二、就喻詳辨

阿難！如是醉說，不從梅生，非從口入。如是，阿難！若梅生者，梅合自談，何待人說？若從口入，自合口聞，何須待耳？若獨耳聞，此水何不耳中而出？思踏懸崖，與說相類。

午三、結妄歸真

是故當知：想陰虛妄，本非因緣，非自然性。

巳四、行陰分三

午初、舉喻合法 二、就喻詳辨 三、結妄歸真 今

初

阿難！譬如暴流，波浪相續，前際後際，不相踰越。行陰當知，亦復如是！

午二、就喻詳辨

阿難！如是流性，不因空生；不因水有；亦非水性，非離空、水。如是，阿難！若因空生，則諸十方，無盡虛空，成無盡流，世界自然，俱受淪溺！若因水有，則此暴流，性應非水。有所有相，今應現在。若即水性，則澄清時，應非水體，若離空、水，空非有外，水外無流。

午三、結妄歸真

是故當知：行陰虛妄，本非因緣，非自然性。

巳五、識陰 分三

午初、舉喻合法

二、就喻詳辨

三、結妄歸真

今

初

阿難！譬如有人，取頻伽瓶，塞其兩孔，滿中擎空，千里遠行，

用餉他國。識陰當知，亦復如是！

午二、就喻詳辨

阿難！如是虛空，非彼方來，非此方入。如是，阿難！若彼方來，則本瓶中，既貯空去，於本瓶地，應少虛空！若此方入，開孔倒瓶，應見空出！

午三、結妄歸真

是故當知：識陰虛妄，本非因緣，非自然性。

〇九六

首楞嚴經卷第二

大佛頂如來密因修證了義諸菩薩萬行首楞嚴經  
(卷第三)

卯二、會六入即藏性 分二  
辰初、總徵 二、別釋 今初

復次，阿難！云何六入，本如來藏，妙真如性？

辰二、別釋 分六  
巳初、眼入 乃至六意入 巳初分四 午初、舉例顯

妄 二、辨妄無體 三、無所從來 四、結妄歸真 今初

阿難！即彼目睛，瞪發勞者，兼目與勞，同是菩提，瞪發勞相。

午二、辨妄無體

因於明、暗。二種妄塵，發見居中，吸此塵象，名爲見性。此見

離彼明、暗二塵，畢竟無體。

午三、無所從來

如是，阿難！當知是見，非明暗來，非於根出，不於空生。何以故？若從明來，暗即隨滅，應非見暗；若從暗來，明即隨滅，應無見明。若從根生，必無明、暗；如是見精，本無自性。若於空出，前矚塵象，歸當見根，又空自觀，何關汝入？

午四、結妄歸真

是故當知：眼入虛妄，本非因緣，非自然性。

巳二、耳入 分四

午初、舉例顯妄 二、辨妄無體 三、無所從來

四、結妄歸真 今初

阿難！譬如有人，以兩手指，急塞其耳，耳根勞故，頭中作聲。兼耳與勞，同是菩提，瞪發勞相。

午二、辨妄無體

因於動、靜二種妄塵，發聞居中，吸此塵象，名聽聞性。此聞離彼動、靜二塵，畢竟無體。

午三、無所從來

如是，阿難！當知是聞，非動、靜來，非於根出，不於空生。何以故？若從靜來，動即隨滅，應非聞動！若從動來，靜即隨滅，應無覺靜！若從根生，必無動、靜，如是聞體，本無自性。若於空出，有聞成性，即非虛空；又空自聞，何關汝入？

午四、結妄歸真

是故當知：耳入虛妄，本非因緣，非自然性。

巳三、鼻入分四 午初、舉例顯妄 二、辨妄無體 三、無所從來

四、結妄歸真 今初

阿難！譬如有人，急畜其鼻，畜久成勞，則於鼻中，聞有冷觸；因觸分別，通、塞、虛、實，如是乃至，諸香臭氣。兼鼻與勞，同是菩提，瞪發勞相。

午二、辨妄無體

因於通、塞，二種妄塵，發聞居中，吸此塵象，名齟聞性。此聞離彼通、塞二塵，畢竟無體。

午三、無所從來

當知是聞，非通塞來，非於根出，不於空生，何以故？若從通來，塞則聞滅，云何知塞？如因塞有，通則無聞，云何發明，香、臭等觸？若從根生，必無通、塞。如是聞機，本無自性。若從空出，是聞自當迴顛汝鼻；空自有聞，何關汝入？

午四、結妄歸真

是故當知：鼻入虛妄，本非因緣，非自然性。

巳四、舌入 分四  
午初、舉例顯妄 二、辨妄無體 三、無所從來

四、結妄歸真 今初

阿難！譬如有人，以舌舐吻，熟舐令勞。其人若病，則有苦味。

無病之人，微有甜觸。由甜與苦，顯此舌根，不動之時，淡性常在。兼舌與勞，同是菩提，瞪發勞相。

午二、辨妄無體

因甜，苦、淡，二種妄塵，發知居中，吸此塵象，名知味性。此知味性，離彼甜，苦及淡二塵，畢竟無體。

午三、無所從來

如是，阿難！當知如是嘗苦、淡知，非甜、苦來；非因淡有；又非根出；不於空生。何以故？若甜、苦來，淡則知滅，云何知淡？若從淡出，甜即知亡，復云何知，甜、苦二相？若從舌生，必無甜、淡，及與苦塵。斯知味根，本無自性。若從空出，虛空

自味，非汝口知；又空自知何關汝入？

午四、結妄歸真

是故當知：舌入虛妄，本非因緣，非自然性。

巳五、身人 分四

午初、舉例顯妄 二、辨妄無體 三、無所從來

四、結妄歸真 今初

阿難，譬如有人，以一冷手，觸於熱手，若冷勢多，熱者從冷；若熱功勝，冷者成熟。如是以此，合覺之觸，顯於離知，涉勢若成，因於勞觸。兼身與勞，同是菩提，瞪發勞相。

午二、辨妄無體

因於離、合，二種妄塵，發覺居中，吸此塵象，名知覺性。此知

覺體，離彼離、合違順二塵，畢竟無體。

午三、無所從來

如是，阿難！當知是覺，非離、合來，非違順有，不於根出，又非空生。何以故？若合時來，離當已滅，云何覺離？違順二相，亦復如是。若從根出，必無離、合、違、順四相。則汝身知，元無自性。必於空出，空自知覺，何關汝入？

午四、結妄歸真

是故當知：身入虛妄，本非因緣，非自然性。

巳六、意入 分四

午初、舉例顯妄 二、辨妄無體 三、無所從來

四、結妄歸真 今初

阿難！譬如有人，勞倦則眠，睡熟便寤；覽塵斯憶，失憶爲忘。是其顛倒，生、住、異、滅，吸習中歸，不相踰越，稱意知根。兼意與勞，同是菩提，瞪發勞相。

午二、辨妄無體

因於生、滅二種妄塵，集知居中；吸撮（取也）內塵，見、聞逆流，流不及地，名覺知性。此覺知性，離彼寤、寐生滅二塵，畢竟無體。

午三、無所從來

如是，阿難！當知如是，覺知之根，非寤寐來；非生滅有；不於根出；亦非空生。何以故？若從寤來，寐即隨滅，將何爲寐？必

生時有，滅即同無，令誰受滅？若從滅有，生即滅無，誰知生者？若從根出，寤、寐二相，隨身開合，離斯二體，此覺知者。

同於空華，畢竟無性。若從空出，自是空知，何關汝入？

午四、結妄歸真

是故當知：意入虛妄，本非因緣，非自然性。

卯三、會十二處即藏性 分二

辰初、總徵 二、別破 今初

復次，阿難！云何十二處，本如來藏，妙真如性？

辰二、別破 分六

巳初、眼色處 至六 意法處

巳初分四

午初、標舉二

處 二、雙以徵起 三、分文難破 四、結妄歸真 今初

阿難！汝且觀此，祇陀樹林，及諸泉池。

午二、雙以徵起

於意云何？此等爲是，色生眼見？眼生色相？

午三、分文難破 分二 未初、破眼見生色 二、破色生眼見 今初

阿難！若復眼根生色相者，見空非色，色性應銷，銷則顯發一切都無；色相既無，誰明空質？空亦如是。

未二、破色生眼見

若復色塵生眼見者，觀空非色，見即銷亡，亡則都無，誰明空、色？

午四、結妄歸真

是故當知：見與色、空，俱無處所。即色與見，二處虛妄，本非

因緣，非自然性。

巳二、耳聲處 分四 午初、標舉二處 二、雙以徵起 三、分文難破

四、結妄歸真 今初

阿難！汝更聽此，祇陀園中，食辦擊鼓，眾集撞鐘，鐘鼓音聲，前後相續。

午二、雙以徵起

於意云何？此等爲是聲來耳邊？耳往聲處？

午三、分文難破 分三 未初、聲來耳邊 二、耳往聲處 三、無來無往

今初

阿難！若復此聲來於耳邊，如我乞食，室羅筏城，在祇陀林，則

無有我；此聲必來，阿難耳處，目連迦葉，應不俱聞。何況其中，一千二百五十沙門，一聞鐘聲，同來食處？

未二、耳往聲處

若復汝耳，往彼聲邊，如我歸住祇陀林中，在室羅城，則無有我。汝聞鼓聲，其耳已往擊鼓之處，鐘聲齊出，應不俱聞！何況其中，象、馬、牛、羊，種種音響？

未三、無來無往

若無來往，亦復無聞。

午四、結妄歸真

是故當知：聽與音聲，俱無處所。即聽與聲，二處虛妄，本非因

緣，非自然性。

巳三、鼻香處 分四

午初、標舉二處 二、詳以徵起 三、分文難破

四、結妄歸真 今初

阿難！汝又覲此，爐中旃檀，此香若復然於一銖，室羅筏城四十里內，同時聞氣。

午二、詳以徵起

於意云何？此香爲復生旃檀木；生於汝鼻；爲生於空？

午三、分文難破 分三

未初、破從鼻生 二、破從空生 三、破從香生

今初

阿難！若復此香，生於汝鼻，稱鼻所生，當從鼻出，鼻非旃檀，

云何鼻中有旃檀氣？稱汝聞香，當於鼻入，鼻中出香，說聞非義？

未二、破從空生

若生於空，空性常恒，香應常在，何藉爐中，爇此枯木？

未三、破從香生

若生於木，則此香質，因爇成煙，若鼻得聞，合蒙煙氣！其煙騰空，未及遙遠，四十里內，云何已聞？

午四、結妄歸真

是故當知：香鼻與聞，俱無處所。即嗅與香，二處虛妄，本非因緣，非自然性。

巳四、舌味二處 分四

午初、標舉二處

二、詳以徵起

三、分文難破

四、結妄歸真 今初

阿難！汝常二時，眾中持鉢，其間或遇酥、酪、醍醐，名爲上味。

午二、詳以徵起

於意云何？此味爲復生於空中？生於舌中？爲生食中？

午三、分文難破 分三

未初、破從舌生

二、破從味生

三、破從空生

今初

阿難！若復此味，生於汝舌，在汝口中，祇有一舌，其舌爾時，已成酥味，遇黑石蜜，應不推移？若不變移，不名知味；若變移

者，舌非多體，云何多味，一舌之知？

未二、破從味生

若生於食，食非有識，云何自知？又食自知，即同他食，何預於汝，名味之知？

未三、破從空生

若生於空，汝噉虛空，當作何味？必其虛空，若作鹹味，既鹹汝舌，亦鹹汝面？則此界人，同於海魚！既常受鹹，了不知淡。若不識淡，亦不覺鹹，必無所知，云何名味？

午四、結妄歸真

是故當知：味、舌與嘗，俱無處所。即嘗與味，二俱虛妄，本非

因緣，非自然性。

已五、身觸二處 分四

午初、標舉二處

二、約二觸破

三、約一觸破

四、結妄歸真 今初

阿難！汝常晨朝，以手摩頭。

午二、約二觸破

於意云何？此摩所知，誰爲能觸？能爲在手？爲復在頭？若在於手，頭則無知，云何成觸？若在於頭，手則無用，云何名觸？若各各有，則汝阿難，應有二身？

午三、約一觸破

若頭與手，一觸所生，則手與頭，當爲一體！若一體者，觸則無

成。若二體者，觸誰爲在（屬也）？在能非所？在所非能？不應

虛空，與汝成觸？

午四、結妄歸真

是故當知：覺觸與身，俱無處所。即身與觸，二俱虛妄，本非因緣，非自然性。

巳六、意法二處 分四

午初、標舉二處 二、雙以徵起 三、就法辨妄

四、結妄歸真 今初

阿難！汝常意中所緣，善、惡、無記三性，生成法則。

午二、雙以徵起

此法爲復即心所生？爲當離心，別有方所？

午三、就法辨妄 分二

未初、破即心所生

二、破離心別有 今初

阿難！若即心者，法則非塵，非心所緣，云何成處？

未二、破離心別有

若離於心，別有方所，則法自性，爲知非知？知則名心，異汝非塵，同他心量。即汝即心，云何汝心更二於汝？若非知者，此塵既非色、聲、香、味、離、合、冷、暖，及虛空相，當於何在？今於色、空，都無表示，不應人間，更有空外。心非所緣，處從誰立？

午四、結妄歸真

是故當知：法則與心，俱無處所。則意與法，二俱虛妄，本非因

緣，非自然性。

卯四、會十八界即藏性 分二 辰初、總徵 二、別釋 今初

復次，阿難！云何十八界，本如來藏，妙真如性？

辰二、別釋 分六 巳初、眼色識界 至六 意法識界 巳初又分四 午初、

標舉三界 二、雙以徵起 三、分合難破 四、結妄歸真 今初

阿難！如汝所明，眼色爲緣，生於眼識。

午二、雙以徵起

此識，爲復因眼所生，以眼爲界？因色所生，以色爲界？

午三、分合難破 分三 未初、破因眼生 二、破因色生 三、破和合生

今初

阿難！若因眼生，既無色空，無可分別；縱有汝識，欲將何用？  
汝見又非青、黃、赤、白，無所表示，從何立界？

未二、破因色生

若因色生，空無色時，汝識應滅？云何識知，是虛空性？若色變  
時，汝亦識其色相遷變，汝識不遷，界從何立？從變則變，界相  
自無；不變則恆，既從色生，應不識知，虛空所在？

未三、破和合生

若兼二種，眼、色共生，合則中離，離則兩合，體性雜亂，云何  
成界？

午四、結妄歸真

是故當知：眼色爲緣，生眼識界，三處都無。則眼與色，及色界三，本非因緣，非自然性。

巳二、耳聲識界 分四

午初、標舉三界

二、雙以徵起

三、分合難破

四、結妄歸真 今初

阿難！又汝所明，耳聲爲緣，生於耳識。

午二、雙以徵起

此識爲復因耳所生，以耳爲界？因聲所生，以聲爲界？

午三、分合難破 分三

未初、破因耳生

二、破因聲生

三、破和合生

今初

阿難！若因耳生，動靜二相，既不現前，根不成知，必無所知，

知尚無成，識何形貌？若取耳聞，無動靜故，聞無所成；云何耳形，雜色觸塵，名爲識界？則耳識界，復從誰立？

未二、破因聲生

若生於聲，識因聲有，則不關聞。無聞則亡聲相所在？識從聲生，許聲因聞，而有聲相；聞應（平聲）聞識！不聞非界；聞則

同聲；識已被聞，誰知聞識？若無知者，終如草木。

未三、破和合生

不應聲聞，雜成中界。界無中位，則內外相，復從何成？

午四、結妄歸真

是故當知：耳聲爲緣，生耳識界，三處都無。則耳與聲，及聲界

三，本非因緣，非自然性。

巳三、鼻香識界

分四

午初、標舉三界

二、雙以徵起

三、分合難破

四、結妄歸真

今初

阿難！又汝所明，鼻香爲緣，生於鼻識。

午二、雙以徵起

此識爲復因鼻所生，以鼻爲界？因香所生，以香爲界？

午三、分合難破

分三

未初、破因鼻生

二、破因香生

三、破和合生

今初

阿難！若因鼻生，則汝心中，以何爲鼻？爲取肉形雙爪之相？爲取顛知動搖之性？若取肉形，肉質乃身，身知即觸，名身非鼻；

名觸即塵，鼻尚無名，云何立界？若取齷知，又汝心中，以何爲知？以肉爲知，則肉之知，元觸非鼻。以空爲知，空則自知，肉應非覺。如是則應虛空是汝！汝身非知，今日阿難，應無所在。以香爲知，知自屬香，何預於汝？若香臭氣，必生汝鼻，則彼香、臭二種流氣，不生伊蘭，及旃檀木？二物不來，汝自齷鼻，爲香爲臭？臭則非香，香應非臭。若香、臭二俱能聞者，則汝一人，應有兩鼻？對我問道，有二阿難，誰爲汝體？若鼻是一，香臭無二，臭既爲香，香復成臭，二性不有，界從誰立？

未二、破因香生

若因香生，識因香有，如眼有見，不能觀眼；因香有故，應不知

香。知即非生，不知非識。香非知有，香界不成；識不知香，因界則非從香建立。

未三、破和合生

既無中間，不成內外，彼諸聞性，畢竟虛妄。

午四、結妄歸真

是故當知：鼻香爲緣，生鼻識界，三處都無。則鼻與香，及香界三，本非因緣，非自然性。

巳四、舌味識界 分四

午初、標舉三界

二、雙以徵起

三、分合難破

四、結妄歸真 今初

阿難！又汝所明，舌味爲緣，生於舌識。

午二、雙以徵起

此識爲復因舌所生，以舌爲界？因味所生，以味爲界？

午三、分合難破 分四

未初、破因舌生

二、破因味生

三、破因空生

四、破和合生 今初

阿難！若因舌生，則諸世間，甘蔗、烏梅、黃連、石鹽、細辛、薑、桂，都無有味，汝自嘗舌，爲甜爲苦？若舌性苦，誰來嘗舌？舌不自嘗，孰爲知覺？舌性非苦，味自不生，云何立界？

未二、破因味生

若因味生，識自爲味，同於舌根，應不自嘗，云何識知，是味非味？又一切味，非一物生，味既多生，識應多體？識體若一，體

必味生，鹹、淡、甘、辛，和合俱生，諸變異相，同爲一味，應無分別？分別既無，則不名識，云何復名，舌味識界？

未三、破因空生

不應虛空，生汝心識？

未四、破和合生

舌味和合，即於是中，元無自性，云何界生？

午四、結妄歸真

是故當知：舌味爲緣，生舌識界，三處都無。則舌與味，及舌界三，本非因緣，非自然性。

巳五、身觸識界

分四

午初、標舉三界

二、雙以徵起

三、分合難破

四、結妄歸真 今初

阿難，又汝所明，身觸爲緣，生於身識。

午二、雙以徵起

此識爲復因身所生，以身爲界？因觸所生，以觸爲界？

午三、分合難破 分三  
未初、破因身生 二、破因觸生 三、破和合生

今初

阿難，若因身生，必無離合，二覺觀緣，身何所識？

未二、破因觸生

若因觸生，必無汝身，誰有非身，知合離者？

未三、破和合生

阿難，物不觸知，身知有觸。知身即觸，知觸即身；即觸非身，即身非觸。身觸二相，元無處所，合身即爲，身自體性；離身即是，虛空等相。內外不成，中云何立？中不復立，內外性空。則汝識生從誰立界？

午四、結妄歸真

是故當知：身觸爲緣，生身識界，三處都無。則身與觸，及身界三，本非因緣，非自然性。

巳六、意法識界

分四

午初、標舉三界

二、雙以徵起

三、分文各破

四、結妄歸真

今初

阿難，又汝所明，意法爲緣，生於意識。

午二、雙以徵起

此識，爲復因意所生，以意爲界，因法所生，以法爲界？

午三、分文各破 分二 未初、破因意生 二、破因法生 今初

阿難，若因意生，於汝意中，必有所思，發明汝意；若無前法，意無所生。離緣無形，識將何用？又汝識心，與諸思量，兼了別性，爲同爲異？同意即意，云何所生？異意不同，應無所識。若無所識，云何意生？若有所識，云何識意？唯同與異，二性無成，界云何立？

未二、破因法生

若因法生，世間諸法，不離五塵，汝觀色法，及諸聲法、香法、

味法、及與觸法，相狀分明，以對五根，非意所攝。汝識決定依於法生，汝今諦觀，法法何狀？若離色空，動靜、通塞、合離、生滅、越此諸相，終無所得。生、則色空諸法等生，滅、則色空諸法等滅。所因既無，因生有識，作何形相？相狀不有，界云何生？

午四、結妄歸真

是故當知：意法爲緣，生意識界，三處都無。則意與法，及意界三，本非因緣，非自然性。

丑三、圓彰七大即性周徧 分二

寅初、阿難轉疑雙非 二、如來進示圓

旨 今初

阿難白佛言：世尊！如來常說，和合因緣，一切世間，種種變化，皆因四大和合發明。云何如來，因緣、自然，二俱排擯？我今不知，斯義所屬！惟垂哀愍，開示眾生，中道了義，無戲論法。

寅二、如來進示圓旨 分三

卯初、責迷許說

二、總喻性相

三、別詳

七大 今初

爾時世尊，告阿難言：汝先厭離，聲聞、緣覺，諸小乘法，發心勤求，無上菩提，故我今時，爲汝開示，第一義諦。如何復將世間戲論，妄想因緣，而自纏繞！汝雖多聞，如說藥人，真藥現前，不能分別，如來說爲，真可憐愍！汝今諦聽，我當爲汝分別

開示；亦令當來，修大乘者，通達實相。阿難默然，承佛聖旨。

卯二、總喻性相

阿難，如汝所言：四大和合，發明世間，種種變化。阿難，若彼大性，體非和合，則不能與諸大雜和，猶如虛空，不和諸色。若和合者，同於變化，始終相成，生滅相續；生死死生，生生死死，如旋火輪，未有休息。阿難，如水成冰，冰還成水。

卯三、別詳七大 分七

辰初、地大 乃至

七識大

辰初地大分四

巳初、

標性約析

二、就析詳辨

三、結顯體用

四、變拂二計

今初

汝觀地性：麤爲大地，細爲微塵，至鄰虛塵，析彼極微，色邊際相，七分所成，更析鄰虛，即實空性。

巳二、就析詳辨

阿難，若此鄰虛，析成虛空，當知虛空，出生色相。汝今問言：由和合故，出生世間，諸變化相。汝且觀此：一鄰虛塵，用幾虛空，和合而有？不應（平聲）鄰虛，合成鄰虛。又鄰虛塵，析入空者，用幾色相，合成虛空？若色合時，合色非空；若空合時，合空非色；色猶可析，空云何合？

巳三、結顯體用

汝元不知：如來藏中，性色真空，性空真色，清淨本然，周徧法界。隨眾生心，應所知量。

巳四、雙拂二計

循業發現。世間無知，惑爲因緣，及自然性。皆是識心，分別計度，但有言說，都無實義。

辰二、火大 分四

巳初、標性約求 二、就求詳辨 三、結顯體用

四、雙拂二計 今初

阿難，火性無我，寄於諸緣。汝觀：城中未食之家，欲炊爨時，手執陽燧，日前求火。

巳二、就求詳辨

阿難，名和合者，如我與汝，一千二百五十比丘，今爲一眾；眾雖爲一，詰其根本，各各有身，皆有所生，氏族名字。如舍利弗，婆羅門種；優樓頻螺，迦葉波種；乃至阿難，瞿曇種姓。阿

難，若此火性，因和合有，彼手執鏡，於日求火，此火爲從鏡中而出？爲從艾出？爲於日來？阿難，若日來者，自能燒汝手中之艾，來處林木，皆應受焚。若鏡中出，自能於鏡，出然於艾，鏡何不鎔？紆（屈也）汝手執，尙無熱相，云何融泮？若生於艾，何藉日鏡，光明相接，然後火生？汝又諦觀：鏡因手執，日從天來，艾本地生，火從何方，遊歷於此？日、鏡相遠，非和非合；不應火光，無從自有？

巳三、結顯體用

汝猶不知：如來藏中，性火真空，性空真火，清淨本然，周徧法界。隨眾生心，應所知量。阿難，當知世人，一處執鏡，一處火

生；徧法界執，滿世間起。起徧世間，寧有方所？

巳四、雙拂二計

循業發現。世間無知，惑爲因緣，及自然性，皆是識心，分別計度，但有言說，都無實義。

辰三、水大

分四

巳初、標性約求 二、就求詳辨 三、結顯體用

四、雙拂二計 今初

阿難，水性不定，流息無恆。如室羅城，迦毘羅仙、斫迦羅仙、及鉢頭摩、訶薩多等，諸大幻師，求太陰精，用和幻藥，是諸師等，於白月晝，手執方諸，承月中水。

巳二、就求詳辨

此水爲復從珠中出？空中自有？爲從月來？阿難，若從月來，尙能遠方，令珠出水，所經林木，皆應吐流，流則何待方珠所出？不流，明水非從月降。若從珠出，則此珠中，常應（平聲）流

水，何待中宵，承白月晝？若從空生，空性無邊，水當無際，從人洎（及也）天，皆同滔溺，云何復有，水、陸、空行？汝更諦觀：月從天陟，珠因手持，承珠水盤，本人敷設，水從何方，流注於此？月、珠相遠，非和非合；不應水精，無從自有！

已三、結顯體用

汝尙不知：如來藏中，性水真空，性空真水，清淨本然，周徧法界。隨眾生心，應所知量。一處執珠，一處水出；徧法界執，滿

法界生，生滿世間，寧有方所？

巳四、雙拂二計

循業發現。世間無知，惑爲因緣，及自然性，皆是識心，分別計度，但有言說，都無實義。

辰四、風大 分四

巳初、標性約拂 二、就拂詳辨 三、結顯體用

四、雙拂二計 今初

阿難，風性無體，動、靜不常；汝常整衣，入於大眾，僧伽黎角，動及傍人，則有微風，拂彼人面。

巳二、就拂詳辨

此風爲復出袈裟角？發於虛空？生彼人面？阿難，此風若復出袈

袈角，汝乃披風，其衣飛搖，應離汝體。我今說法，會中垂衣，汝看我衣，風何所在？不應衣中，有藏風地？若生虛空，汝衣不動，何因無拂？空性常住，風應常生，若無風時，虛空當滅；滅風可見，滅空何狀？若有生滅，不名虛空；名爲虛空，云何風出？若風自生被拂之面，從彼面生，當應拂汝？自汝整衣，云何倒拂？汝審諦觀：整衣在汝；面屬彼人；虛空寂然，不參流動；風自誰方，鼓動來此？風、空性隔，非和非合；不應風性，無從自有？

巳三、結顯體用

汝宛不知：如來藏中，性風真空，性空真風，清淨本然，周徧法

界。隨眾生心，應所知量。阿難，如汝一人，微動服衣，有微風出；徧法界拂，滿國土生，周徧世間，寧有方所？

巳四、雙拂二計

循業發現。世間無知，惑爲因緣，及自然性，皆是識心，分別計度，但有言說，都無實義。

辰五、空大 分五

巳初、標性約鑿 二、就鑿詳辨 三、合會警悟

四、結顯體用 五、雙拂二計 今初

阿難，空性無形，因色顯發：如室羅城，去河遙處，諸剎利種，及婆羅門，毘舍、首陀、兼頗羅墮、旃陀羅等。新立安居，鑿井求水，出土一尺，於中則有一尺虛空；如是乃至出土一丈。中間

還得一丈虛空，虛空淺深，隨出多少。

已二、就鑿詳辨

此空爲當因土所出？因鑿所有？無因自生？阿難，若復此空，無因自生，未鑿土前，何不無礙？惟見大地，迴無通達。若因土出，則土出時，應見空入，若土先出，無空入者，云何虛空，因土而出？若無出入，則應空土，原無異因；無異則同，則土出時，空何不出？若因鑿出，則鑿出空，應非出土？不因鑿出，鑿自出土，云何見空？汝更審諦，諦審諦觀：鑿從人手，隨方運轉，土因地移，如是虛空，因何所出？鑿、空虛實，不相爲用，非和非合；不應虛空，無從自出。

已三、合會警悟

若此虛空，性圓周徧，本不動搖，當知現前，地、水、火、風，均（同也）名五大，性真圓融，皆如來藏，本無生滅。阿難，汝心昏迷，不悟四大，元如來藏，當觀虛空：爲出？爲入？爲非出入？

已四、結顯體用

汝全不知：如來藏中，性覺真空，性空真覺，清淨本然，周徧法界。隨眾生心，應所知量。阿難，如一井空，空生一井；十方虛空，亦復如是，圓滿十方，寧有方所。

已五、雙拂二計

循業發現。世間無知，惑爲因緣，及自然性，皆是識心，分別計度，但有言說，都無實義。

辰六、見大 分五

巳初、標性約塵

二、就塵詳辨

三、合會警悟

四、結顯體用 五、雙拂二計 今初

阿難，見覺無知，因色空有。如汝今者，在祇陀林，朝明夕昏；設居中宵，白月則光，黑月便暗，則明暗等，因見分析。

巳二、就塵詳辨

此見爲復，與明暗相，並太虛空，爲同一體？爲非一體？或同、非同？或異、非異？阿難，此見若復與明與暗，及與虛空，元一體者，則明與暗，二體相亡。暗時無明，明時無暗。若與暗一，

明則見亡；必一於明，暗時當滅。滅則云何見明見暗？若明暗殊，見無生滅，一云何成？若此見精，與暗與明，非一體者，汝離明暗，及與虛空，分析見元，作何形相？離明離暗，及離虛空，是見元同龜毛、兔角；明、暗、虛空三事俱異，從何立見？明暗相背，云何或同？離二元無，云何或異？分空分見，本無邊畔，云何非同？見暗見明，性非遷改，云何非異？汝更細審，微細審詳，審諦審觀：明從太陽，暗隨黑月，通屬虛空，壅歸大地，如是見精，因何所出？見覺空頑（以空攝色），非和非合；不應見精，無從自出？

巳三、合會警悟

若見、聞、知，性圓周徧，本不動搖，當知無邊不動虛空，併其動搖地、水、火、風，均名六大，性真圓融，皆如來藏，本無生滅。阿難，汝性沉淪，不悟汝之見、聞、覺、知，本如來藏，汝當觀此：見、聞、覺、知，爲生爲滅？爲同爲異？爲非生滅？爲非同異？

巳四、結顯體用

汝曾不知：如來藏中，性見覺明，覺精明見，清淨本然，周徧法界。隨眾生心。應所知量。如一見根，見周法界。聽、嗅、嘗觸、覺觸覺知，妙德瑩然，徧周法界，圓滿十虛，寧有方所？

已五、雙拂二計

循業發現。世間無知，惑爲因緣，及自然性，皆是識心，分別計度，但有言說，都無實義。

辰七、識大 分五

已初、標約根塵

二、就根塵辨

三、合會警悟

四、結顯體用

五、雙拂二計

今初

阿難，識性無源，因於六種根塵妄出。汝今徧觀：此會聖眾，用目循歷，其目周視，但如鏡中，無別分析。汝識於中，次第標指，此是文殊，此富樓那，此目犍連，此須菩提，此舍利弗。

已二、就根塵辨

此識了知，爲生於見？爲生於相？爲生虛空？爲無所因，突然而

出？阿難，若汝識性，生於見中，如無明暗，及與色空，四種必無。元無汝見，見性尚無，從何發識？若汝識性，生於相中，不從見生？既不見明，亦不見暗，明暗不矚（視也）即無色空，彼

相尚無，識從何發？若生於空，非相非見，非見無辨，自不能知，明暗色空？非相滅緣，見、聞、覺、知，無處安立？處此二非，空則同無，有非同物，縱發汝識，欲何分別？若無所因，突然而出，何不日中，別識明月？汝更細詳，微細詳審：見託汝睛，相推前境，可狀成有，不相成無，如是識緣，因何所出？識動、見澄，非和非合，聞、聽、覺、知，亦復如是；不應識緣，

無從自出？

巳三、合會警悟

若此識心，本無所從，當知了別，見、聞、覺、知，圓滿湛然，性非從所，兼彼虛空，地、水、火、風，均名七大，性真圓融，皆如來藏，本無生滅。阿難，汝心麤浮，不悟見聞，發明了知，本如來藏。汝應觀此：六處識心，爲同爲異？爲空爲有？爲非同異？爲非空有？

巳四、結顯體用

汝元不知：如來藏中，性識明知，覺明真識，妙覺湛然，徧周法界。含吐十虛，寧有方所？

巳五、雙拂二計

循業發現。世間無知，惑爲因緣，及自然性，皆是識心，分別計度，但有言說，都無實義。

辛二、阿難明心生信 分三

壬初、承示開悟 二、讚謝獲益 三、發廣

大心 壬初分二

癸初、敘承示 二、敘開悟 今初

爾時阿難，及諸大眾，蒙佛如來，微妙開示。

癸二、敘開悟 分二

子初、敘心蕩然 二、敘身蕩然 今初

身心蕩然，得無罣礙，是諸大眾，各各自知，心徧十方，見十方空，如觀手中，所持葉物。一切世間，諸所有物，皆即菩提，妙明元心。心精徧圓，含裹十方。

子二、敘身蕩然

反觀父母，所生之身，猶彼十方虛空之中，吹一微塵，若存若亡。如湛巨海，流一浮漚，起滅無從，了然自知，獲本妙心，常住不滅。

壬二、讚謝獲益 分二

癸初、讚謝佛法 二、悟獲法身 今初

禮佛合掌，得未曾有！於如來前，說偈讚佛：妙湛總持不動尊，首楞嚴王世稀有！

癸二、悟獲法身

銷我億劫顛倒想，不歷僧祇獲法身。

壬三、發廣大心 分五

癸初、發願報恩 二、誓度眾生 三、求除細惑

四、速成正覺 五、申述不退 今初

願今得果成寶王，還度如是恆沙眾，將此深心奉塵刹，是則名爲報佛恩。

癸二、誓度眾生

伏請世尊爲證明，五濁惡世誓先入，如一眾生未成佛，終不於此取泥洹。

癸三、求除細惑

大雄大力大慈悲，希更審除微細惑。

癸四、速成正覺

令我早登無上覺，於十方界坐道場。

癸五、申述不退

舜若多性可銷亡，鑠迦羅心無動轉。



大佛頂如來密因修證了義諸菩薩萬行首楞嚴經  
(卷第四)

庚二、除細惑辨性相以開解 分三 辛初、滿慈躡前以起二疑 二、如來

次第以除二惑 三、大眾領悟讚善謝益 辛初又分四 壬初、讚歎如來

妙示 二、泛敘自他疑情 三、確陳二種深疑 四、望佛大慈開示 今

初

爾時富樓那彌多羅尼子，在大眾中，即從座起，偏袒右肩，右膝著地，合掌恭敬，而白佛言：大威德世尊！善為眾生，敷演如來

第一義諦。

壬二、泛敘自他疑情

世尊常推說法人中，我爲第一。今聞如來微妙法音，猶如聾人，逾百步外，聆於蚊蚋，本所不見，何況得聞？佛雖宣明，令我除惑。今猶未詳，斯義究竟，無疑惑地。世尊！如阿難輩，雖則開悟，習漏未除。我等會中，登無漏者，雖盡諸漏，今聞如來，所說法音，尙紆疑悔。

壬三、確陳二種深疑 分二

癸初、疑萬法生續之因 二、疑五大圓融之

故 今初

世尊！若復世間，一切根塵，陰、處、界等，皆如來藏，清淨本然，云何忽生，山河大地，諸有爲相？次第遷流，終而復始？

癸二、疑五大圓融之故

又如來說：地、水、火、風，本性圓融，周徧法界，湛然常住。世尊！若地性徧，云何容水？水性周徧，火則不生，復云何明，水火二性，俱徧虛空，不相陵滅？世尊！地性障礙，空性虛通，云何二俱，周徧法界？而我不知，是義攸往。

壬四、望佛大慈開示

惟願如來，宣流大慈，開我迷雲，及諸大眾。作是語已，五體投地，欽渴如來，無上慈誨。

辛二、如來次第以除二惑分二

壬初、令益許說

二、正為宣說 今初

爾時世尊，告富樓那，及諸會中漏盡無學，諸阿羅漢：如來今

日，普爲此會，宣勝義中，真勝義性。令汝會中，定性聲聞，及諸一切未得二空，回向上乘。阿羅漢等。皆獲一乘，寂滅場地，真阿練若，正修行處。汝今諦聽，當爲汝說。富樓那等，欽佛法音，默然承聽。

壬二、正爲宣說 分二

癸初、正答滿慈 二、兼示阿難

癸初分二

子

初、先說不空藏以示生續之由 二、說空不空藏以示圓融之故 子初又

二 丑初、正答初問 二、兼釋轉難 丑初又五 寅初、牒定所疑

二、舉真勘問 三、審得其惑 四、正明生續 五、雙關結答 今初

佛言富樓那：如汝所言，清淨本然，云何忽生山河大地？

寅二、舉真勘問

汝常不聞：如來宣說，性覺妙明，本覺明妙？富樓那言：唯然世尊，我常聞佛，宣說斯義。

寅三、審得其惑

佛言：汝稱覺明，爲復性明，稱名爲覺？爲覺不明，稱爲明覺？富樓那言：若此不明，名爲覺者，則無所明。佛言：若無所明，則無明覺。有所非覺，無所非明。無明又非覺湛明性。性覺必明，妄爲明覺。

寅四、正明生續 分二

卯初、初之忽生 二、後之相續

卯初分二 辰

初、無明不覺生三細

二、境界為緣長六麤 今初

覺非所明，因明立所；所既妄立，生汝妄能。無同異中，熾然成

異；異彼所異，因異立同；同異發明，因此復立，無同無異。

辰二、境界為緣長六麤

如是擾亂，相待生勞。勞久發塵，自相渾濁，由是引起，塵勞煩惱。起為世界，靜成虛空，虛空為同，世界為異，彼無同異，真有為法。

卯二、後之相續 分三

辰初、世界相續 二、眾生相續 三、業果相續

辰初又分三

巳初、生能成四大 二、生所成四居 三、結成種相續

今初

覺明空昧，相待成搖，故有風輪，執持世界。因空生搖，堅明立礙，彼金寶者，明覺立堅，故有金輪，保持國土。堅覺寶成，搖

明風出，風金相摩，故有火光，爲變化性。寶明生潤，火光上蒸，故有水輪，含十方界。

巳二、生所成四居

火騰水降，交發立堅，溼爲巨海，乾爲洲渾。以是義故，彼大海中，火光常起，彼洲渾中，江河常注。水勢劣火，結爲高山，是故山石，擊則成燄，融則成水。土勢劣水，抽爲草木，是故林藪，遇燒成土，因絞成水。

巳三、結成種相續

交妄發生，遞相爲種，以是因緣，世界相續。

辰二、眾生相續 分三

巳初、六妄成就 二、四生感應 三、結成相續

今初

復次富樓那，明妄非他，覺明爲咎。所妄既立，明理不踰；以是因緣，聽不出聲，見不超色。色、香、味、觸，六妄成就，由是分開，見、覺、聞、知。

巳二、四生感應

同業相纏，合離成化。見明色發，明見想成。異見成憎，同想成愛，流愛爲種，納想爲胎。交遘發生，吸引同業，故有因緣，生羯羅藍，遏蒲曇等。胎、卵、溼、化，隨其所應。卵惟想生，胎因情有，溼以合感，化以離應。

巳三、結成相續

情想合離更相變易。所有受業，逐其飛沉，以是因緣，眾生相續。

辰三、業果相續 分三

巳初、業果指本 二、業債酬償 三、結成相續

今初

富樓那，想愛同結，愛不能離，則諸世間，父母子孫，相生不斷。是等則以，欲貪爲本。貪愛同滋，貪不能止，則諸世間，卵、化、溼、胎，隨力強弱，遞相吞食，是等則以，殺貪爲本。以人食羊，羊死爲人，人死爲羊。如是乃至十生之類，死死生生，互來相噉，惡業俱生，窮未來際。是等則以盜貪爲本。

巳二、業債酬償

汝負我命，我還汝債，以是因緣，經百千劫，常在生死。汝愛我心，我憐汝色；以是因緣，經百千劫，常在纏縛。

巳三、結成相續

惟殺、盜、淫，三爲根本，以是因緣，業果相續。

寅五、雙關結答

富樓那，如是三種，顛倒相續，皆是覺明，明了知性，因了發相，從妄見生，山河大地，諸有爲相，次第遷流，因此虛妄，終而復始。

丑二、兼釋轉難 分二

寅初、滿慈執因疑果

二、佛分真妄喻釋

今初

富樓那言：若此妙覺，本妙覺明，與如來心，不增不減。無狀忽

生，山河大地，諸有爲相。如來今得妙空明覺，山河大地，有爲習漏，何當復生？

寅二、佛分真妄喻釋 分二

卯初、喻妄不復生 二、喻真不復變

卯初

分二

辰初、無明本空 二、萬法現無 今初

佛告富樓那：譬如迷人，於一聚落，惑南爲北。此迷爲復因迷而有？因悟而出？富樓那言：如是迷人，亦不因迷，又不因悟。何以故？迷本無根，云何因迷？悟非生迷，云何因悟？佛言：彼之迷人，正在迷時，倏有悟人，指示令悟。富樓那！於意云何？此人縱迷於此聚落，更生迷不？不也！世尊。富樓那！十方如來，亦復如是。此迷無本，性畢竟空，昔本無迷，似有迷覺；覺迷迷

滅，覺不生迷。

辰二、萬法現無分三

巳初、舉喻

二、辨定

三、法合

今初

亦如翳人，見空中華，翳病若除，華於空滅。忽有愚人，於彼空華所滅空地，待華更生。

巳二、辨定

汝觀是人，爲愚爲慧？富樓那言，空元無華，妄見生滅，見華滅空，已是顛倒，敕令更出，斯實狂癡，云何更名，如是狂人，爲愚爲慧？

巳三、法合

佛言：如汝所解。云何問言：諸佛如來，妙覺明空，何當更出

(生也) 山河大地？

卯二、喻真不復變 分二 辰初、總舉二喻 二、總合二法 今初

又如金鑛，雜於精金，其金一純，更不成雜；如木成灰，不重爲木。

辰二、總合二法

諸佛如來，菩提涅槃，亦復如是。

子二、說空不空藏以示圓融之故 分二 丑初、正答次問 二、兼釋轉難

丑初分二 寅初、牒定五大以釋疑 二、圓彰三藏以勸修 寅初又五

卯初、按定所疑 二、喻明性相 三、難釋相妄 四、以法合喻 五、

申義釋疑 今初

富樓那！又汝問言：地、水、火、風，本性圓融，周徧法界，疑水、火性，不相陵滅，又徵虛空，及諸大地，俱徧法界，不合相容。

卯二、喻明性相

富樓那！譬如虛空，體非群相，而不拒彼諸相發揮。所以者何？富樓那！彼太虛空，日照則明，雲屯則暗，風搖則動，霽澄則清，氣凝則濁，土積成霾，水澄成映。

卯三、難釋相妄

於意云何？如是殊方，諸有爲相，爲因彼生？爲復空有？若彼所生，富樓那！且日照時，既是日明，十方世界，同爲日色，云何

空中，更見圓日？若是空明，空應自照，云何中宵，雲霧之時，不生光耀？當知是明，非日非空，不異空日。

卯四、以法合喻

真妙覺明，亦復如是。汝以空明，則有空現；地、水、火、風，各各發明，則各各現；若俱發明，則有俱現。云何俱現？富樓那！如一水中，現於日影，兩人同觀，水中之日，東西各行，則各有日隨二人去，一東一西先無準的。不應難言：此日是一，云何各行？各日既雙，云何現一？宛轉虛妄，無可憑據。

卯五、申義釋疑

觀相元妄，無可指陳。猶邀空華，結爲空果，云何詰其相陵滅

義？觀性元真，惟妙覺明。妙覺明心，先非水火，云何復問，不  
相容者？

寅二、圓彰三藏以勸修 分三

卯初、極顯圓融

二、普責思議

三、結

喻推失

卯初分二

辰初、依迷悟心對辨緣起

二、依本來心圓彰藏性

辰初分二

巳初、依染緣起執成有礙

二、依淨緣起融成無礙

今初

富樓那！汝以色空，相傾相奪，於如來藏。而如來藏，隨爲色  
空，周徧法界。是故於中，風動、空澄，日明、雲暗，眾生迷  
悶，背覺合塵，故發塵勞，有世間相。

巳二、依淨緣起融成無礙

我以妙明，不滅不生，合如來藏。而如來藏，惟妙覺明，圓照法

界。是故於中，一爲無量，無量爲一；小中現大，大中現小。不動道場，徧十方界；身含十方，無盡虛空；於一毛端，現寶王剎；坐微塵裡，轉大法輪。滅塵合覺，故發真如，妙覺明性。

辰二、依本來心圓彰藏性

分三

巳初、圓彰空藏一切皆非 二、彰不空

藏一切皆即 三、彰空不空即非圓融 今初

而如來藏，本妙圓心。非心、非空、非地、非水、非風、非火、非眼、非耳、鼻、舌、身、意，非色、非聲、香、味、觸、法，非眼識界，如是乃至，非意識界。非明、無明、明無明盡；如是乃至，非老、非死，非老死盡。非苦、非集、非滅、非道、非智、非得。非檀那，非尸羅，非毘黎耶，非羼提，非禪那，非般

刺若、非波羅密多。如是乃至，非怛闍阿竭，非阿羅訶，非三耶三菩，非大涅槃，非常、非樂、非我、非淨。

已二、彰不空藏一切皆即

以是俱非，世出世故，即如來藏，元明心妙。即心、即空、即地、即水、即風、即火、即眼、即耳、鼻、舌、身、意，即色、即聲、香、味、觸、法，即眼識界，如是乃至，即意識界。即明、無明，明、無明盡；如是乃至，即老、即死，即老死盡。即苦，即集，即滅，即道，即智，即得。即檀那、即尸羅、即毘黎耶、即羼提、即禪那、即般刺若、即波羅密多。如是乃至，即怛闍阿竭、即阿羅訶、三耶三菩、即大涅槃、即常、即樂、即我、

即淨。

巳三、彰空不空即非圓融

以是俱即，世出世故，即如來藏，妙明心元。離即、離非、是即、非即。

卯二、普責思議

如何世間，三有眾生，及出世間，聲聞、緣覺，以所知心，測度（音鐸）如來，無上菩提。用世語言，入佛知見。

卯三、結喻推失

譬如琴、瑟、笙、篳、琵琶，雖有妙音，若無妙指，終不能發。汝與眾生，亦復如是。寶覺真心，各各圓滿，如我按指，海印發

光，汝暫舉心，塵勞先起。由不勤求，無上覺道，愛念小乘，得少爲足。

丑二、兼釋轉難 分二

寅初、滿慈索妄因而擬進修 二、如來拂深情而

示頓歇 今初

富樓那言：我與如來，寶覺圓明，真妙淨心，無二圓滿。而我昔遭無始妄想，久在輪迴，今得聖乘，猶未究竟；世尊諸妄，一切圓滅，獨妙真常。敢問如來：一切眾生，何因有妄，自蔽妙明，受此淪溺？

寅二、如來喻無因而示頓歇 分四

卯初、喻明無因 二、以法合喻

三、示令頓歇 四、結喻非失 今初

佛告富樓那：汝雖除疑，餘惑未盡，吾以世間，現前諸事，今復問汝：汝豈不聞？室羅城中，演若達多，忽於晨朝，以鏡照面，愛鏡中頭，眉目可見；瞋責己頭，不見面目，以爲魑魅，無狀狂走。於意云何？此人何因，無故狂走？富樓那言：是人心狂，更無他故。

卯二、以法合喻

佛言：妙覺明圓，本圓明妙，既稱爲妄，云何有因？若有所因，云何名妄？自諸妄想，展轉相因，從迷積迷，以歷塵劫，雖佛發明。猶不能返。如是迷因，因迷自有，識迷無因，妄無所依，尙無有生，欲何爲滅？得菩提者，如寤時人，說夢中事，心縱精

明，欲何因緣，取夢中物？況復無因，本無所有。如彼城中演若達多，豈有因緣，自怖頭走？忽然狂歇，頭非外得，縱未歇狂，亦何遺失？富樓那！妄性如是，因何爲在？

卯三、示令頓歇

汝但不隨分別，世間、業果、眾生，三種相續，三緣斷故，三因不生。則汝心中，演若達多，狂性自歇，歇即菩提。勝淨明心，本周法界，不從人得，何藉劬勞，肯綮修證。

卯四、結喻非失

譬如有人：於白衣中，繫如意珠，不自覺知，窮露他方，乞食馳走，雖實貧窮，珠不曾失。忽有智者，指示其珠，所願從心，致

大饒富。方悟神珠，非從外得。

癸二、兼示阿難

分二

子初、阿難躡佛語而執因緣

二、如來拂深情而

責執悞

即時阿難，在大眾中，頂禮佛足，起立白佛：世尊，現說殺、盜、淫業，三緣斷故，三因不生，心中達多，狂性自歇，歇即菩提，不從人得。斯則因緣，皎然明白，云何如來，頓棄因緣？我從因緣，心得開悟。世尊！此義何獨我等年少，有學聲聞；今此會中，大目犍連，及舍利弗，須菩提等，從老梵志，聞佛因緣，發心開悟，得成無漏。今說菩提，不從因緣。則王舍城，拘舍黎等，所說自然，成第一義。唯垂大悲，開發迷悶。

子二、如來拂深情而責執恪分六 丑初、就喻拂情伸意 二、疊拂諸情

令盡 三、直斥耽著戲論 四、現證戲論無功 五、正勸勤修無漏

六、更舉劣機激責

佛告阿難：即如城中，演若達多，狂性因緣，若得除滅，則不狂性，自然而出，因緣、自然，理窮如是。阿難！演若達多，頭本自然，本自其然，無然非自，何因緣故，怖頭狂走？若自然頭，因緣故狂；何不自然，因緣故失？本頭不失，狂怖妄出，曾無變易，何藉因緣？本狂自然，本有狂怖；未狂之際，狂何所潛？不狂自然，頭本無妄，何爲狂走？若悟本頭，識知狂走，因緣、自然，俱爲戲論。是故我言：三緣斷故，即菩提心。

丑二、疊拂諸情令盡

菩提心生，生滅心滅，此但生滅。滅生俱盡，無功用道。若有自然，如是則明自然心生，生滅心滅，此亦生滅。無生滅者：名爲自然；猶如世間，諸相雜和，成一體者，名和合性，非和合者，稱本然性。本然非然，和合非合，合然俱離，離合俱非，此句方名，無戲論法。

丑三、直斥耽著戲論

菩提、涅槃，尙在遙遠，非汝歷劫，辛勤修證。雖復憶持，十方如來，十二部經，清淨妙理，如恆河沙，祇益戲論。

丑四、現證戲論無功

汝雖談說，因緣、自然，決定明了，人間稱汝多聞第一。以此積劫多聞熏習，不能免離，摩登伽難。何須待我，佛頂神咒，摩登伽心，姪火頓歇，得阿那含？於我法中，成精進林，愛河乾枯，令汝解脫？

丑五、正勸勤修無漏

是故阿難，汝雖歷劫憶持如來，秘密妙嚴，不如一日，脩無漏業，遠離世間，憎、愛二苦。

丑六、更舉劣機激責

如摩登伽，宿爲姪女，由咒神力，銷其愛欲，法中今名，性比丘尼。與羅睺母，耶輸陀羅，同悟宿因。知歷世因，貪愛爲苦！一

念熏脩，無漏善故，或得出纏，或蒙授記；如何自欺，尙留觀聽。

辛三、大眾領悟讚善謝益

阿難及諸大眾，聞佛示誨，疑惑銷除，心悟實相，身意輕安，得未曾有！重復悲淚！頂禮佛足，長跪合掌，而白佛言：無上大悲，清淨寶王，善開我心，能以如是種種因緣，方便提獎，引諸沉冥，出於苦海。

己三、說三摩脩法令從耳根一門深入 分二 庚初、選根直入 二、道場

加行 庚初分三 辛初、阿難說喻求門得入 二、如來教令一門深入

三、大眾承示開悟證入 辛初又分二 壬初、述領佛旨 二、喻屋求門

今初

世尊！我今雖承，如是法音，知如來藏，妙覺明心，徧十方界，含育如來，十方國土，清淨寶嚴，妙覺王剎。如來復責，多聞無功，不逮修習。

壬二、喻屋求門

我今猶如，旅泊之人，忽蒙天王，賜與華屋；雖獲大宅，要因門入。惟願如來，不捨大悲，示我在會，諸蒙暗者，捐捨小乘，畢獲如來無餘涅槃，本發心路。令有學者，從何攝伏，疇昔攀緣，得陀羅尼，入佛知見！作是語已，五體投地。在會一心，佇佛慈旨！

辛二、如來教示一門深入 分四 壬初、分門以定二義 二、驗證以釋二

疑 三、縮中以示倫次 四、冥授以選本根 壬初分二 癸初、標開妙

修行路 二、教明二決定義 今初

爾時世尊，哀愍會中，緣覺、聲聞，於菩提心，未自在者，及爲當來，佛滅度後，末法眾生，發菩提心，開無上乘，妙修行路。

癸二、教明二決定義 分二 子初、宣示總徵 二、分判二義 今初

宣示阿難，及諸大眾，汝等決定發菩提心，於佛如來，妙三摩提，不生疲倦，應當先明發覺初心，二決定義。云何初心，二義決定？

子二、分判二義 分二 丑初、決定以因同果澄濁入涅槃義 二、決定從

根解結脫纏入圓通義

丑初分三

寅初、令審觀因果

二、示所除五濁

三、明伏斷證極 今初

阿難！第一義者：汝等若欲捐捨聲聞，脩菩薩乘，入佛知見，應當審觀因地發心，與果地覺，爲同爲異？阿難！若於因地，以生滅心，爲本修因，而求佛乘，不生不滅。無有是處。以是義故，汝當照明，諸器世間，可作之法，皆從變滅。阿難！汝觀世間，可作之法，誰爲不壞？然終不聞，爛壞虛空。何以故？空非可作，由是始終，無壞滅故。

寅二、示所除五濁 分三

卯初、尅示濁體

二、總喻濁相

三、別列濁

名 今初

則汝身中。堅相爲地，潤溼爲水，煖觸爲火，動搖爲風。由此四纏，分汝湛圓妙覺明心，爲視、爲聽、爲覺、爲察，從始入終，五疊渾濁。

卯二、總喻濁相

云何爲濁？阿難！譬如清水，清潔本然，即彼塵土灰砂之倫，本質留礙，二體法爾，性不相循。有世間人，取彼土塵，投於淨水，土失留礙，水亡清潔，容貌汨然，名之爲濁。汝濁五重，亦復如是。

卯三、別列濁名

阿難！汝見虛空，徧十方界，空見不分，有空無體，有見無覺，

相織妄成，是第一重，名爲劫濁。汝身現搏，四大爲體，見、聞、覺知，壅令留礙，水、火、風、土，旋令覺知，相織妄成，是第二重，名爲見濁。又汝心中，憶識誦習，性發知見，容現六塵，離塵無相，離覺無性，相織妄成，是第三重，名煩惱濁。又汝朝夕，生滅不停，知見每欲留於世間，業運每常遷於國土，相織妄成，是第四重，名眾生濁。汝等見聞，元無異性，眾塵超越，無狀異生。性中相知，用中相背，同異失準，相織妄成，是第五重，名爲命濁。

寅三、明伏斷證極 分三

卯初、決擇取捨 二、法喻伏斷 三、結證極

果 今初

阿難！汝今欲令見、聞、覺、知，遠契如來，常、樂、我、淨。

應（平聲）當先擇，死生根本，依不生滅，圓湛性成。

卯二、法喻伏斷 分二 辰初、法說 二、喻明 今初

以湛旋其虛妄滅生，伏還元覺；得元明覺，無生滅性，爲因地心。然後圓成，果地修證。

辰二、喻明

如澄濁水，貯於靜器，靜深不動，沙土自沉，清水現前，名爲初伏客塵煩惱。去泥純水，名爲永斷根本無明。

卯三、結證極果

明相精純，一切變現，不爲煩惱，皆合涅槃清淨妙德。

丑二、決定從根解結脫纏入圓通義 分二 寅初、教從根以解結 二、示

脫纏入圓通 寅初分五 卯初、決發增上勝心 二、法喻當知結處

三、確實指根是結 四、備顯六根功德 五、教其悟圓入一 今初

第二義者：汝等必欲發菩提心，於菩薩乘，生大勇猛，決定棄捐，諸有爲相。

卯二、法喻當知結處

應當審詳，煩惱根本，此無始來，發業潤生，誰作誰受？阿難！汝修菩提，若不審觀煩惱根本，則不能知，虛妄根塵，何處顛倒。處尚不知，云何降伏，取如來位？阿難！汝觀：世間解結之人，不見所結，云何知解？不聞虛空，被汝隳裂。何以故？空無

形相，無結解故。

卯三、確實指根是結

則汝現前，眼、耳、鼻、舌，及與身、心，六爲賊媒，自劫家寶。由此無始，眾生世界，生纏縛故，於器世間，不能超越。

卯四、備顯六根功德

分三

辰初、徵釋眾生世界 二、涉成本有數量

三、顯示六根具缺 今初

阿難！云何名爲眾生世界？世爲遷流，界爲方位。汝今當知，東西南北，東南西南，東北西北，上下爲界，過去未來，現在爲世；方位有十，流數有三。

辰二、涉成本有數量

一切眾生，織妄相成，身中貿遷，世界相涉。而此界性，設雖十方，定位可明，世間祇目東西南北，上下無位，中無定方。四數必明，與世相涉，三四四三，宛轉十二。流變三疊，一十百千，總括始終，六根之中，各各功德，有千二百。

辰三、顯示六根具缺

阿難！汝復於中，克定優劣：如眼觀見，後暗前明，前方全明，後方全暗，左右旁觀，三分之二，統論所作，功德不全，三分言功，一分無德，當知眼唯八百功德。如耳周聽，十方無遺，動若邇（近也）遙（遠也），靜無邊際，當知耳根，圓滿一千二百功德。如鼻嗅聞，通出入息，有出有入，而闕中交，驗於鼻根，三

分闕一，當知鼻惟八百功德。如舌宣揚，盡諸世間，出世間智，言有方分，理無窮盡，當知舌根，圓滿一千二百功德。如身覺觸，識於違順，合時能覺，離中不知，離一合雙。驗於身根三分闕一，當知身唯八百功德。如意默容，十方三世，一切世間，出世間法，惟聖與凡，無不包容，盡其涯際，當知意根，圓滿一千二百功德。

卯五、教其悟圓入一 分二

辰初、令驗六悟圓

二、令入一解六 今初

阿難！汝今欲逆生死欲流，返窮流根，至不生滅。當驗此等，六受用根：誰合誰離？誰深誰淺？誰爲圓通？誰不圓滿？若能於此，悟圓通根，逆彼無始織妄業流，得循圓通，與不圓根，日劫

相倍。

辰二、令入一解六

我今備顯，六湛圓明，本所功德，數量如是。隨汝詳擇，其可入者，吾當發明，令汝增進。十方如來，於十八界，一一修行，皆得圓滿，無上菩提，於其中間，亦無優劣。但汝下劣，未能於中，圓自在慧，故我宣揚，令汝但於一門深入。入一無妄，彼六知根，一時清淨。

寅二、示脫纏入圓通 分二

卯初、阿難躡佛語以請益 二、如來就所問

以重申

阿難白佛言：世尊！云何逆流？深入一門？能令六根，一時清

淨？

卯二、如來就所問以重申分五 辰初、申惑結尚深 二、申一六由妄

三、舉喻法顯明 四、申根結由塵 五、申塵亡根盡 今初

佛告阿難：汝今已得，須陀洹果，已滅三界，眾生世間，見所斷惑。然猶未知，根中積生，無始虛習，彼習要因修所斷得。何況此中，生、住、異、滅，分劑頭數？

辰二、申一六由妄

今汝且觀：現前六根，爲一爲六？阿難！若言一者，耳何不見？目何不聞？頭奚不履？足奚無語？若此六根，決定成六，如我會，與汝宣揚，微妙法門，汝之六根，誰來領受？阿難言：我用

耳聞。佛言：汝耳自聞，何關身口？口來問義，身起欽承？是故應知：非一終六，非六終一，終不汝根，元一元六。阿難當知：是根非一非六，由無始來，顛倒淪替，故於圓湛，一六義生。汝須陀洹，雖得六銷，猶未亡一。

辰三、舉喻法顯明

如太虛空，參合群器，由器形異，名之異空；除器觀空，說空爲一。彼太虛空，云何爲汝，成同不同？何況更名，是一非一？則汝了知，六受用根，亦復如是。

辰四、申根結由塵

由明、暗等，二種相形，於妙圓中，黏湛發見。見精映色，結色

成根；根元目爲，清淨四大，因名眼體；如蒲萄朵，浮根四塵，流逸奔色。由動、靜等，二種相擊，於妙圓中，黏湛發聽。聽精映聲，卷聲成根，根元目爲，清淨四大。因名耳體，如新卷葉，浮根四塵，流逸奔聲。由通、塞等，二種相發，於妙圓中，黏湛發艷。艷精映香，納香成根，根元目爲，清淨四大。因名鼻體，如雙垂爪，浮根四塵，流逸奔香。由恬、變等，二種相參，於妙圓中，黏湛發嘗。嘗精映味，絞味成根，根元目爲，清淨四大。因名舌體，如初偃月，浮根四塵，流逸奔味。由離、合等，二種相摩，於妙圓中，黏湛發覺。覺精映觸，搏觸成根，根元目爲，

清淨四大。因名身體，如腰鼓顛，浮根四塵，流逸奔觸。由生、滅等，二種相續，於妙圓中，黏湛發知。知精映法，攬法成根，根元目爲，清淨四大。因名意思，如幽室見，浮根四塵，流逸奔法。阿難！如是六根，由彼覺明，有明明覺，失彼精了，黏妄發光。

辰五、申塵亡根盡 分二 巳初、正申解結以酬問 二、兼成二妙以證驗

巳初分二 午初、統論離塵無結 二、正教入一解六 今初

是以汝今，離暗、離明，無有見體；離動、離靜，元無聽質；無通、無塞，顛性不生；非變、非恬，嘗無所出；不離、不合，覺觸本無；無滅、無生，了知安寄？

午二、正教入一解六

汝但不循，動、靜、合、離，恬、變、通、塞，生、滅、明、暗，如是十二諸有爲相。隨拔一根，脫黏內伏，伏歸元真，發本明耀。耀性發明，諸餘五黏，應拔圓脫。

巳二、兼成二妙以證驗

分二

午初、情界脫纏成互用妙

二、器界超越

成純覺妙

午初分二

未初、先以示妙

二、證不循根

今初

不由前塵，所起知見，明不循根，寄根明發；由是六根，互相爲用。

未二、證不循根

阿難！汝豈不知？今此會中，阿那律陀，無目而見？跋難陀龍，

無耳而聽？殞伽神女，非鼻聞香？驕梵鉢提，異舌知味？舜若多神，無身覺觸？如來光中，映令暫現，既爲風質，其體元無。諸滅盡定，得寂聲聞，如此會中，摩訶迦葉，久滅意根，圓明了知，不因心念？

午二、器界超越成純覺妙 分二

未初、先以示妙 二、驗不藉緣 今初

阿難！汝今諸根，若圓拔已，內瑩發光，如是浮塵，及器世間，諸變化相，如湯銷冰，應念化成，無上知覺。

未二、驗不藉緣

阿難！如彼世人，聚見於眼，若令急合，暗相現前，六根黯然，頭足相類。彼人以手，循體外繞，彼雖不見，頭足一辨，知覺是

同。緣見因明，暗成無見，不明自發，則諸暗相，永不能昏。根塵既銷，云何覺明，不成圓妙？

壬二、驗證以釋二疑 分二

癸初、驗釋根性斷滅疑

二、證釋別有結元

疑 癸初分二

子初、阿難錯解佛語以謬難

二、如來即事驗常以釋疑

子初又分三

丑初、因果相違

二、後先異說

三、更求開示

今初

阿難白佛言：世尊！如佛說言：因地覺心，欲求常住，要與果位，名目相應。世尊！如果位中，菩提、涅槃、真如、佛性，庵摩羅識，空如來藏，大圓鏡智，是七種名，稱謂雖別，清淨圓滿，體性堅凝，如金剛王，常住不壞。若此見聽，離於明、暗、動、靜、通、塞，畢竟無體，猶如念心，離於前塵，本無所有。

云何將此畢竟斷滅，以爲脩因，欲獲如來，七常住果？

丑二、後先異說

世尊！若離明、暗，見畢竟空；如無前塵，念自性滅。進退循環，微細推求，本無我心，及我心所，將誰立因，求無上覺？如來先說：湛精圓常。違越誠言，終成戲論！云何如來，真實語者？

丑三、更求開示

惟垂大慈，開我蒙愆！

子二、如來即事驗常以釋疑 分四  
丑初、許以除疑 二、擊鐘驗常

三、引夢驗常 四、申迷教守 今初

佛告阿難：汝學多聞，未盡諸漏。心中徒知，顛倒所因，真倒現前，實未能識！恐汝誠心，猶未信伏。吾今試將塵俗諸事，當除汝疑。

丑二、擊鐘驗常

分四

寅初、兩番問答

二、責其矯亂

三、破申正義

四、責迷戒謬

今初

即時如來。敕羅睺羅，擊鐘一聲。問阿難言：汝今聞不？阿難大眾，俱言：我聞。鐘歇無聲，佛又問言：汝今聞不？阿難大眾，俱言：不聞。時羅睺羅，又擊一聲。佛又問言：汝今聞不？阿難大眾，又言：俱聞。佛問阿難：汝云何聞？云何不聞？阿難大眾，俱白佛言：鐘聲若擊，則我得聞；擊久聲銷，音響雙絕，則

名無聞。如來又敕羅睺擊鐘，問阿難言，汝今聲不？阿難大眾，俱言：有聲。少選聲銷，佛又問言：爾今聲不？阿難大眾，答言：無聲。有頃羅睺，更來撞鐘。佛又問言：爾今聲不？阿難大眾，俱言：有聲。佛問阿難：汝云何聲？云何無聲？阿難大眾，俱白佛言：鐘聲若擊，則名有聲；擊久聲銷，音響雙絕，則名無聲。

寅二、責其矯亂

佛語（去聲）阿難，及諸大眾：汝今云何自語矯亂？大眾阿難，俱時問佛：我今云何，名爲矯亂？佛言：我問汝聞，汝則言聞？又問汝聲，汝則言聲？惟聞與聲，報答無定，如是云何，不名矯

亂？

寅三、破申正義

阿難！聲銷無響，汝說無聞；若實無聞，聞性已滅，同於枯木，鐘聲更擊，汝云何知？知有知無，自是聲塵，或無或有；豈彼聞性，爲汝有無？聞實云無，誰知無者？是故阿難！聲於聞中，自有生滅；非爲汝聞，聲生聲滅，令汝聞性，爲有爲無。

寅四、責迷戒謬

汝尙顛倒，惑聲爲聞，何怪昏迷，以常爲斷？終不應言：離諸動、靜，閉塞、開通，說聞無性。

丑三、引夢驗常 分二

寅初、驗夢不昧 二、決定性常 今初

如重睡人，眠熟床枕。其家有人，於彼睡時，擣練舂米，其人夢中，聞舂擣聲，別作他物：或爲擊鼓，或爲撞鐘，即於夢時，自怪其鐘，爲木石響。於時忽寤，遡知舂音。自告家人，我正夢時，惑此舂音，將爲鼓響。

寅二、決定性常

阿難，是夢中人，豈憶靜搖，開閉通塞？其形雖寐，聞性不昏。縱汝形銷，命光遷謝，此性云何，爲汝銷滅？

丑四、申迷教守 分二

寅初、普申迷常故墮無常 二、教令守常必成正

覺 今初

以諸眾生，從無始來，循諸色聲，逐念流轉，曾不開悟，性淨妙

常。不循所常，逐諸生滅，由是生生，雜染流轉。

寅二、教令守常必成正覺

若棄生滅，守於真常，常光現前，根，塵，識心，應時銷落。想相爲塵，識情爲垢。二俱遠離，則汝法眼，應時清明，云何不成，無上知覺？



大佛頂如來密因修證了義諸菩薩萬行首楞嚴經

(卷第五)

癸二、證釋別有結元疑 分二

子初、阿難別索結元

二、如來證無他物

子初分三

丑初、就喻索元

二、引人合喻

三、哀求指示

今初

阿難白佛言：世尊！如來雖說，第二義門。今觀世間解結之人，若不知其所結之元，我信是人，終不能解。

丑二、引人合喻

世尊！我及會中，有學聲聞，亦復如是。從無始際，與諸無明，俱滅俱生，雖得如是多聞善根，名爲出家，猶隔日瘡！惟願大

慈，哀愍淪溺，今日身心，云何是結？從何名解？亦令未來苦難眾生，得免輪迴，不落三有。

丑三、哀求指示

作是語已，普及大眾，五體投地，雨淚翹誠！佇佛如來，無上開示。

子二、如來證無他物 分三

丑初、長行 二、偈頌 三、敘悟

丑初分

二 寅初、諸佛同證

二、如來詳釋

寅初分三

卯初、愍眾摩頂感佛

二、諸佛放光灌頂

三、聞佛同音告示

今初

爾時世尊，憐愍阿難，及諸會中，諸有學者；亦爲未來，一切眾生，爲出世因，作將來眼。以閻浮檀，紫金光手，摩阿難頂，即

時十方，普佛世界，六種震動。

卯二、諸佛放光灌頂

微塵如來，住世界者，各有寶光，從其頂出。其光同時，於彼世界，來祇陀林，灌如來頂。是諸大眾，得未曾有！

卯三、聞佛同音告示

於是阿難，及諸大眾，俱聞十方，微塵如來，異口同音，告阿難言：善哉阿難！汝欲識知，俱生無明，使汝輪轉，生死結根。唯汝六根，更無他物。汝復欲知，無上菩提。令汝速證，安樂解脫，寂靜妙常，亦汝六根，更非他物。

寅二、如來詳釋

分二

卯初、阿難未悟述問

二、如來詳釋除疑

今初

阿難雖聞，如是法音，心猶未明，稽首白佛：云何令我生死輪迴，安樂妙常，同是六根，更非他物？

卯二、如來詳釋除疑

佛告阿難：根、塵同源，縛、脫無二，識性虛妄，猶如空華。阿難！由塵發知，因根有相，相、見無性，同於交蘆。是故汝今，知見立知，即無明本；知見無見，斯即涅槃，無漏真淨，云何是中更容他物？

丑二、偈頌 分二  
寅初、標頌 二、正頌 今初

爾時世尊，欲重宣此義，而說偈言：

寅二、正頌 分二  
卯初、祇夜頌前 二、伽陀開後 今初

真性有爲空，緣生故如幻；無爲無起滅，不實如空華。言妄顯諸真，妄真同二妄；猶非真非真，云何見所見？中間無實性，是故若交蘆。結解同所因，聖凡無二路。汝觀交中性，空有二俱非。迷晦即無明，發明便解脫。

卯二、伽陀開後 分二 辰初、正以開後 二、別彰勝義 今初

解結因次第，六解一亦亡；根選擇圓通，入流成正覺。

辰二、別彰勝義

陀那微細識，習氣成暴流；真非真恐迷，我常不開演。自心取自心，非幻成幻法；不取無非幻，非幻尙不生，幻法云何立？是名妙蓮華，金剛王寶覺。如幻三摩提，彈指超無學。此阿毘達磨，

十方薄伽梵，一路涅槃門。

丑三、敘性

於是阿難，及諸大眾，聞佛如來，無上慈誨，祇夜伽陀，雜糅精瑩，妙理清徹，心目開明，歎未曾有！

壬三、縮巾以示倫次 分二

癸初、敘前請後 二、如來巧示 今初

阿難合掌，頂禮白佛：我今聞佛，無遮大悲，性淨妙常，真實法句。心猶未達，六解一亡，舒結倫次。惟垂大慈，再愍斯會，及與將來，施以法音，洗滌沉垢。

癸二、如來巧示 分二

子初、巧立喻本 二、分答二問

子初分二

丑

初、元依一巾 二、縮成六結 今初

即時如來，於師子座，整涅槃僧，歛僧伽黎，攬七寶几，引手於几，取劫波羅天，所奉華巾。

丑二、縮成六結

於大眾前，縮成一結，示阿難言：此名何等？阿難大眾，俱白佛言：此名爲結。於是如來，縮疊華巾，又成一結，重問阿難：此名何等？阿難大眾，又白佛言：此亦名結。如是倫次，縮疊華巾，總成六結。一一結成，皆取手中，所成之結，持問阿難：此名何等？阿難大眾，亦復如是，次第誦佛，此名爲結。佛告阿難：我初縮巾，汝名爲結。此疊華巾，先實一條，第二、第三，云何汝曹，復名爲結？阿難白佛言：世尊！此寶疊華，緝織成

巾，雖本一體，如我思惟：如來一縮，得一結名；若百縮成，終名百結；何況此巾，祇有六結，終不至七，亦不停五，云何如來，只許初時，第二、第三，不名爲結？

子二、分答二問 分二

丑初、答六解一亡 二、答舒結倫次

丑初分二

寅初、喻從至同遂成至異 二、喻除至異還成至同 今初

佛告阿難：此寶華巾，汝知此巾，元只一條，我六縮時，名有六結。汝審觀察：巾體是同，因結有異？於意云何？初縮結成，名爲第一；如是乃至，第六結生，吾今欲將第六結名，成第一不？不也世尊！六結若存，斯第六名，終非第一。縱我歷生，盡其明辯，如何令是，六結亂名？佛言：如是！六結不同，循顧本因，

一中所造，令其雜亂，終不得成。則汝六根，亦復如是。畢竟同中，生畢竟異。

寅二、喻除至異還成至同

佛告阿難：汝必嫌此，六結不成，願樂一成，復云何得？阿難言：此結若存，是非鋒起，於中自生，此結非彼，彼結非此。如來今日，若總解除，結若不生，則無彼此，尚不名一，六云何成？佛言：六解一亡，亦復如是。

丑二、答舒結倫次

分二

寅初、示結之倫次

二、示舒之倫次

寅初分

三

卯初、順次成結

二、更以喻明

三、逆次合喻

今初

由汝無始，心性狂亂，知見妄發，發妄不息，勞見發塵。

卯二、更以喻明

如勞目睛，則有狂華，於湛精明，無因亂起。

卯三、逆次合喻

一切世間，山河大地，生死涅槃，皆即狂勞，顛倒華相。

寅二、示舒之倫次 分二 卯初、先授舒之方法 二、後示舒之倫次 卯

初分四 辰初、阿難求解勞結 二、如來就喻巧示 三、示說不謬取信

四、選根解結必證 今初

阿難言：此勞同結，云何解除？

辰二、如來就喻巧示

如來以手，將所結巾，偏牽其左，問阿難言：如是解不？不也，

世尊。旋復以手，偏牽右邊，又問阿難：如是解不？不也，世尊。佛告阿難：吾今以手，左右各牽，竟不能解，汝設方便，云何解成？阿難白佛言：世尊！當於結心，解即分散。佛告阿難：如是！如是！若欲解除，當於結心。

辰三、示說不謬取信

阿難！我說佛法，從因緣生，非取世間和合麤相；如來發明，世出世法，知其本因，隨所緣出。如是乃至，恆沙界外，一滴之雨，亦知頭數；現前種種，松直棘曲，鵠白烏玄，皆了元由。

辰四、選根解結必證

是故阿難！隨汝心中，選擇六根，根結若除，塵相自滅，諸妄銷

亡，不真何待？

卯二、後示舒之倫次 分二

辰初、故問引悟

二、乘悟合明

今初

阿難！我今問汝：此劫波羅巾，六結現前，同時解縈，得同除不？不也，世尊。是結本以次第縮生，今日當須次第而解，六結同體，結不同時，則結解時，云何同除？

辰二、乘悟合明

佛言：六根解除，亦復如是。此根初解，先得人空；空性圓明，成法解脫，解脫法已，俱空不生。是名菩薩，從三摩地，得無生忍。

壬四、冥授以選本根 分四

癸初、阿難述悟禮謝

二、請示圓通本根

三、佛教諸聖各說 四、更勒文殊選擇 今初

阿難及諸大眾，蒙佛開示，慧覺圓通，得無疑惑。一時合掌，頂禮雙足，而白佛言：我等今日，身心皎然，快得無礙！

癸二、請示圓通本根

分三

子初、未達本根

二、慶遇如來 三、冀佛

冥授 今初

雖復悟知，一六亡義，然猶未達，圓通本根。

子二、慶遇如來

世尊！我輩飄零，積劫孤露，何心何慮，預佛天倫，如失乳兒，忽遇慈母？若復因此，際會道成；所得密言，還同本悟，則與未聞，無有差別。

子三、冀佛冥授

惟垂大悲，惠我秘嚴，成就如來，最後開示。作是語已，五體投地，退藏密機，冀佛冥授。

癸三、佛敕諸聖各說 分三

子初、佛問諸聖

二、眾說本因

三、佛現

瑞應 今初

爾時世尊，普告眾中，諸大菩薩，及諸漏盡，大阿羅漢；汝等菩薩，及阿羅漢，生我法中，得成無學。吾今問汝：最初發心，悟十八界，誰爲圓通？從何方便，入三摩地？

子二、眾說本因 分二

丑初、諸聖略說

二、觀音廣陳

丑初分四

寅

初、六塵圓通

二、五根圓通

三、六識圓通

四、七大圓通

寅初分

六 卯初、陳那聲塵 二、優波色塵 三、香嚴香塵 四、藥王味塵

五、跋陀觸塵 六、迦葉法塵 今初

時憍陳那五比丘，即從座起，頂禮佛足，而白佛言：我在鹿苑及於雞園，觀見如來，最初成道，於佛音聲，悟明四諦。佛問比丘，我初稱解，如來印我，名阿若多。妙音密圓。我於音聲，得阿羅漢。佛問圓通，如我所證，音聲爲上。

卯二、優波色塵

優波尼沙陀，即從座起，頂禮佛足，而白佛言：我亦觀佛，最初成道，觀不淨相，生大厭離，悟諸色性，以從不淨，白骨微塵，歸於虛空，空、色二無，成無學道。如來印我，名尼沙陀，塵色

既盡，妙色密圓。我從色相，得阿羅漢。佛問圓通，如我所證，色因爲上。

卯三、香嚴香塵

香嚴童子，即從座起，頂禮佛足，而白佛言：我聞如來，教我諦觀，諸有爲相。我時辭佛，宴晦清齋，見諸比丘，燒沉水香，香氣寂然，來入鼻中。我觀此氣，非木、非空、非煙、非火，去無所著，來無所從，由是意銷，發明無漏。如來印我，得香嚴號，塵氣倏滅，妙香密圓。我從香嚴，得阿羅漢。佛問圓通，如我所證，香嚴爲上。

卯四、藥王味塵

藥王、藥上，二法王子，並在會中，五百梵天，即從座起，頂禮佛足，而白佛言：我無始劫，爲世良醫，口中嘗此娑婆世界，草、木、金、石，名數凡有十萬八千，如是悉知，苦、酢、鹹、淡、甘、辛等味，並諸和合，俱生變異，是冷、是熱、有毒、無毒，悉能徧知。承事如來，了知味性，非空、非有，非即身心，非離身心，分別味因，從是開悟。蒙佛如來，印我昆季，藥王、藥上二菩薩名。今於會中，爲法王子，因味覺明，位登菩薩。佛問圓通，如我所證，味因爲上。

卯五、跋陀觸塵

跋陀婆羅，並其同伴，十六開士，即從座起，頂禮佛足，而白佛

言：我等先於威音王佛，聞法出家，於浴僧時，隨例入室，忽悟水因，既不洗塵，亦不洗體，中間安然，得無所有。宿習無忘，乃至今時，從佛出家，令得無學，彼佛名我，跋陀婆羅，妙觸宣明，成佛子住。佛問圓通，如我所證，觸因爲上。

卯六、迦葉法塵

摩訶迦葉，及紫金光比丘尼等，即從座起，頂禮佛足，而白佛言：我於往劫，於此界中，有佛出世，名日月燈，我得親近，聞法脩學；佛滅度後，供養舍利，然燈續明，以紫金光，塗佛形像，自爾以來，世世生生，身常圓滿紫金光聚；此紫金光比丘尼等，即我眷屬，同時發心。我觀世間六塵變壞，唯以空寂脩於滅

盡，身心乃能，度百千劫，猶如彈指。我以空法，成阿羅漢。世尊說我，頭陀爲最，妙法開明，銷滅諸漏。佛問圓通，如我所證，法因爲上。

寅二、五根圓通 分五

卯初、那律眼根

二、槃陀鼻根

三、憍梵舌根

四、畢陵身根

五、空生意根

今初

阿那律陀，即從座起，頂禮佛足，而白佛言：我初出家，常樂睡眠，如來訶我，爲畜生類。我聞佛訶，啼泣自責，七日不眠，失其雙目。世尊示我，樂見照明，金剛三昧。我不因眼，觀見十方，精真洞然，如觀掌果。如來印我，成阿羅漢。佛問圓通，如我所證，旋見循元，斯爲第一。

卯二、槃特鼻根

周利槃特伽，即從座起，頂禮佛足，而白佛言：我闕誦持，無多聞性，最初值佛，聞法出家，憶持如來，一句伽陀，於一百日，得前遺後，得後遺前。佛愍我愚，教我安居，調出入息，我時觀息，微細窮盡，生住異滅，諸行剎那。其心豁然，得大無礙，乃至漏盡，成阿羅漢。住佛座下，印成無學。佛問圓通，如我所證，反息循空，斯爲第一。

卯三、憍梵舌根

憍梵鉢提，即從座起，頂禮佛足，而白佛言：我有口業，於過去劫，輕弄沙門，世世生生，有牛舂病。如來示我，一味清淨，心

地法門，我得滅心，入三摩地，觀味之知，非體非物，應念得超，世間諸漏。內脫身心，外遺世界，遠離三有，如鳥出籠，離垢銷塵，法眼清淨，成阿羅漢。如來親印，登無學道。佛問圓通，如我所證，還味旋知，斯爲第一。

卯四、畢陵身根

畢陵伽婆蹉，即從座起，頂禮佛足，而白佛言：我初發心，從佛入道，數聞如來，說諸世間，不可樂事。乞食城中，心思法門，不覺路中，毒刺傷足，舉身疼痛！我念有知，知此深痛，雖覺覺痛，覺清淨心，無痛痛覺。我又思惟：如是一身，寧有雙覺？攝念未久，身、心忽空，三七日中，諸漏虛盡，成阿羅漢，得親印

記，發明無學。佛問圓通，如我所證，純覺遺身，斯爲第一。

卯五、空生意根

須菩提，即從座起，頂禮佛足，而白佛言：我曠劫來，心得無礙，自憶受生，如恆河沙，初在母胎，即知空寂，如是乃至，十方成空，亦令眾生，證得空性。蒙如來發，性覺真空，空性圓明，得阿羅漢，頓入如來，寶明空海，同佛知見，印成無學，解脫性空，我爲無上。佛問圓通，如我所證，諸相入非，非所非盡，旋法歸無，斯爲第一。

寅二、五根圓通竟

寅三、六識圓通

分六

卯初、鶩子眼識

二、普賢耳識

三、難陀鼻識

四、滿慈舌識 五、波離身識 六、目連意識 今初

舍利弗，即從座起，頂禮佛足，而白佛言：我曠劫來，心見清淨，如是受生，如恆河沙，世出世間，種種變化，一見則通，獲無障礙。我於中路，逢迦葉波，兄弟相逐，宣說因緣，悟心無際，從佛出家，見覺明圓，得大無畏，成阿羅漢，爲佛長子，從佛口生，從法化生。佛問圓通，如我所證，心見發光，光極知見，斯爲第一。

卯二、普賢耳識

普賢菩薩，即從座起，頂禮佛足，而白佛言：我已曾與恆沙如來，爲法王子。十方如來，教其弟子菩薩根者，修普賢行，從我

立名。世尊！我用心聞，分別眾生，所有知見，若於他方恆沙界外，有一眾生，心中發明普賢行者，我於爾時，乘六牙象，分身百千，皆至其處，縱彼障深，未得見我，我與其人，暗中摩頂，擁護安慰，令其成就。佛問圓通，我說本因，心聞發明，分別自在，斯爲第一。

卯三、難陀鼻識

孫陀羅難陀，即從座起，頂禮佛足，而白佛言：我初出家，從佛入道，雖具戒律，於三摩地，心常散動，未獲無漏。世尊教我，及拘絺羅，觀鼻端白。我初諦觀，經三七日，見鼻中氣，出入如煙，身心內明，圓洞世界，徧成虛淨，猶如瑠璃，煙相漸銷，鼻

息成白。心開漏盡，諸出入息，化爲光明，照十方界，得阿羅漢。世尊記我，當得菩提。佛問圓通，我以銷息。息久發明，明圓滅漏，斯爲第一。

卯四、滿慈舌識

富樓那彌多羅尼子，即從座起，頂禮佛足，而白佛言：我曠劫來，辯才無礙，宣說苦空，深達實相。如是乃至，恆沙如來，秘密法門，我於眾中，微妙開示，得無所畏。世尊知我，有大辯才，以音聲輪，教我發揚。我於佛前，助佛轉輪，因師子吼，成阿羅漢。世尊印我，說法無上。佛問圓通，我以法音，降伏魔怨，銷滅諸漏，斯爲第一。

卯五、波離身識

優波離，即從座起，頂禮佛足，而白佛言：我親隨佛，逾城出家；親觀如來，六年勤苦；親見如來，降伏諸魔，制諸外道，解脫世間，貪欲諸漏。承佛教戒，如是乃至，三千威儀，八萬微細，性業遮業，悉皆清淨，身心寂滅，成阿羅漢。我是如來眾中網紀。親印我心，持戒脩身，眾推爲上。佛問圓通，我以執身，身得自在；次第執心，心得通達，然後身心一切通利，斯爲第一。

卯六、目連意識

大目犍連，即從座起，頂禮佛足，而白佛言：我初於路乞食，逢

遇優樓頻螺、伽耶、那提三迦葉波，宣說如來，因緣深義，我頓發心，得大通達。如來惠我，袈裟著身，鬚髮自落。我遊十方，得無罣礙，神通發明，推爲無上，成阿羅漢。寧惟世尊，十方如來，歎我神力，圓明清淨，自在無畏。佛問圓通，我以旋湛，心光發宣。如澄濁流，久成清瑩，斯爲第一。

寅四、七大圓通 分七

卯初、烏芻火大 二、持地地大 三、月光水大

四、琉璃風大 五、空藏空大 六、彌勒識大 七、勢至根大

卯初分

四 辰初、陳白因欲得觀 二、觀行成就得名 三、證果心發大願 四、

結答所證圓通 今初

烏芻瑟摩，於如來前，合掌頂禮佛之雙足，而白佛言：我常先

憶，久遠劫前，性多貪欲。有佛出世，名曰空王，說多姪人，成猛火聚教我徧觀，百骸四肢，諸冷煖氣。

辰二、觀行成就得名

神光內凝，化多姪心，成智慧火。從是諸佛，皆呼召我，名爲火頭。

辰三、證果心發大願

我以火光三昧力故，成阿羅漢。心發大願，諸佛成道，我爲力士，親伏魔怨。

辰四、結答所證圓通

佛問圓通，我以諦觀身心煖觸，無礙流通，諸漏既銷，生大寶

蝕，登無上覺，斯爲第一。

卯二、持地地大<sub>分五</sub>

辰初、陳白積平地行

二、兼敘修效力行

三、

蒙佛授平心教

四、依教悟無生忍

五、結答所證圓通

今初

持地菩薩，即從座起，頂禮佛足，而白佛言：我念往昔，普光如來，出現於世，我爲比丘，常於一切要路津口，田地險隘，有不如法，妨損車馬，我皆平填，或作橋梁，或負沙土。

辰二、兼敘修效力行

如是勤苦，經無量佛，出現於世。或有眾生，於闐闐處，要人擎物，我先爲擎至其所詣，放物即行，不取其直。毘舍浮佛，現在世時，世多饑荒，我爲負人，無問遠近，唯取一錢，或有車牛，

被於泥溺，我有神力，爲其推輪，拔其苦惱。

辰三、蒙佛授平心教

時國大王，延佛設齋。我於爾時，平地待佛，毗舍如來摩頂謂我，當平心地，則世界地，一切皆平。

辰四、依教悟無生忍

我即心開，見身微塵，與造世界，所有微塵，等無差別，微塵自性，不相觸摩，乃至刀兵，亦無所觸。我於法性，悟無生忍，成阿羅漢，迴心今入菩薩位中。聞諸如來，宣妙蓮華，佛知見地，我先證明，而爲上首。

辰五、結答所證圓通

佛問圓通，我以諦觀，身、界二塵，等無差別，本如來藏，虛妄發塵，塵銷智圓，成無上道，斯爲第一。

卯三、月光水大分四

辰初、陳白古佛授觀

二、觀成未得亡身

三、

亡身方能合界

四、結答所證圓通

今初

月光童子，即從座起，頂禮佛足，而白佛言：我憶往昔，恆河沙劫，有佛出世，名爲水天。教諸菩薩，脩習水觀，入三摩地。觀於身中，水性無奪：初從涕唾，如是窮盡，津液精血，大小便利，身中旋復，水性一同。見水身中，與世界外，浮幢王剎，諸香水海，等無差別。

辰二、觀成未得亡身

我於是時，初成此觀，但見其水，未得無身。當爲比丘，室中安禪。我有弟子，窺窗觀室，惟見清水，徧在室中，了無所見。童稚無知，取一瓦礫，投於水內，激水作聲，顧盼而去。我出定後，頓覺心痛，如舍利弗，遭違害鬼。我自思惟：今我已得阿羅漢道，久離病緣，云何今日，忽生心痛，將無退失？爾時童子，捷來我前，說如上事。我即告言：汝更見水，可即開門，入此水中，除去瓦礫。童子奉教，後入定時，還復見水，瓦礫宛然，開門除出。我後出定，身質如初。

辰三、亡身方能合界

逢無量佛。如是至於山海自在通王如來，方得亡身，與十方界，

諸香水海，性合真空，無二無別。今於如來，得童真名，預菩薩會。

辰四、結答所證圓通

佛問圓通，我以水性，一味流通，得無生忍，圓滿菩提，斯爲第一。

卯四、瑠璃風大分四

辰初、陳白古佛示觀 二、觀察群動無二 三、

觀成頓證徹悟 四、結答所證圓通 今初

瑠璃光法王子，即從座起，頂禮佛足，而白佛言：我憶往昔，經恆沙劫，有佛出世，名無量聲。開示菩薩，本覺妙明，觀此世界，及眾生身，皆是妄緣，風力所轉。

辰二、觀察群動無二

我於爾時，觀界安立，觀世動時，觀身動止，觀心動念，諸動無二，等無差別。我時覺了，此群動性，來無所從，去無所至，十方微塵，顛倒眾生，同一虛妄。

辰三、觀成頓證徹悟

如是乃至，三千大千，一世界內，所有眾生；如一器中，貯百蚊蚋，啾啾亂鳴，於分寸中，鼓發狂鬧，逢佛未幾，得無生忍。爾時心開，乃見東方，不動佛國爲法王子。事十方佛，身心發光，洞徹無礙。

辰四、結答所證圓通

佛問圓通，我以觀察，風力無依，悟菩提心，入三摩地，合十方佛，傳一妙心，斯爲第一。

卯五、空藏空大

分五

辰初、陳白自身所證

二、詳明色空無礙

三、

依正攝入圓融

四、總由觀空神力

五、結答所證圓通

今初

虛空藏菩薩，即從座起，頂禮佛足，而白佛言：我與如來，定光佛所，得無邊身。

辰二、詳明色空無礙

爾時手執，四大寶珠，照明十方，微塵佛剎，化成虛空。又於自心，現大圓鏡，內放十種微妙寶光，流灌十方，盡虛空際。

辰三、依正攝入圓融

諸幢王刹，來入鏡內，涉入我身，身同虛空，不相妨礙。身能善入微塵國土，廣作佛事，得大隨順。

辰四、總由觀空神力

此大神力，由我諦觀：四大無依，妄想生滅，虛空無二，佛國本同，於同發明，得無生忍。

辰五、結答所證圓通

佛問圓通，我以觀察虛空無邊，入三摩地，妙力圓明，斯爲第一。

卯六、彌勒識大 分四

辰初、陳白上古佛世 二、教脩唯心識定 三、

中古定成得記

四、結答所證圓通

今初

彌勒菩薩，即從座起，頂禮佛足，而白佛言：我憶往昔，經微塵劫，有佛出世，名日月燈明。我從彼佛，而得出家，心重世名，好遊族姓。

辰二、教脩唯心識定

爾時世尊，教我修習，唯心識定，入三摩地。歷劫以來，以此三昧，事恆沙佛，求世名心，歇滅無有。

辰三、中古定成得記

至然燈佛，出現於世。我乃得成，無上妙圓，識心三昧。乃至盡空如來國土，淨、穢有無，皆是我心，變化所現。世尊，我了如是，唯心識故。識性流出，無量如來，今得授記，次補佛處。

辰四、結答所證圓通

佛問圓通，我以諦觀；十方唯識，識心圓明，入圓成實，遠離依他，及徧計執，得無生忍，斯爲第一。

卯七、勢至根大 分五

辰初、陳白古佛授法 二、詳喻感應道交 三、

合喻顯示深益 四、述己自利利他 五、結答所證圓通 今初

大勢至法王子，與其同倫，五十二菩薩，即從座起，頂禮佛足，而白佛言：我憶往昔，恆河沙劫，有佛出世，名無量光，十二如來，相繼一劫，其最後佛，名超日月光，彼佛教我，念佛三昧。

辰二、詳喻感應道交 分二

巳初、先以二人為喻 二、再以母子為喻

今初

譬如有人：一專爲憶，一人專忘，如是二人，若逢不逢，或見非見。二人相憶，二憶念深。如是乃至，從生至生，同於形影，不相乖異。

巳二、再以母子爲喻

十方如來，憐念眾生，如母憶子。若子逃逝，雖憶何爲？子若憶母，如母憶時，母子歷生，不相違遠。

辰三、法合顯示深益

若眾生心，憶佛念佛，現前當來，必定見佛。去佛不遠，不假方便，自得心開。如染香人，身有香氣，此則名曰：香光莊嚴。

辰四、述己自利利他

我本因地，以念佛心，入無生忍。今於此界，攝念佛人，歸於淨土。

辰五、結答所證圓通

佛問圓通，我無選擇，都攝六根，淨念相繼，得三摩地，斯爲第一。

大佛頂如來密因修證了義諸菩薩萬行首楞嚴經  
(卷第六)

丑二、觀音廣陳 分四

寅初、陳白古佛授法

二、次第解結修證 三、

詳演稱體起用

四、結答所證圓通

今初

爾時觀世音菩薩，即從座起，頂禮佛足，而白佛言：世尊！憶念我昔，無數恆河沙劫，於時有佛，出現於世，名觀世音。我於彼佛，發菩提心，彼佛教我，從聞、思、修，入三摩地。

寅二、次第解結修證

初於聞中，入流亡所，所入既寂，動靜二相，了然不生。如是漸

增，聞所聞盡；盡聞不住，覺所覺空；空覺極圓，空所空滅；生滅既滅，寂滅現前。

寅三、詳演稱體起用 分二 卯初、標列二本 二、承演三科 今初

忽然超越，世出世間，十方圓明，獲二殊勝。一者上合十方諸佛，本妙覺心，與佛如來，同一慈力。二者下合十方一切，六道眾生，與諸眾生，同一悲仰。

卯二、承演三科 分三 辰初、三十二應 二、十四無畏 三、四不思議

辰初分三 巳初、標承慈力 二、條陳妙應 三、結名出由 今初

世尊！由我供養觀音如來；蒙彼如來，授我如幻，聞熏聞脩。金剛三昧，與佛如來，同慈力故，令我身成三十二應，入諸國土。

巳二、條陳妙應 分六 午初、應求聖乘 二、應求諸天 三、應求人趣

四、應離八部 五、應人修人 六、應離非人 今初

世尊！若諸菩薩，入三摩地，進修無漏，勝解現圓，我現佛身，而爲說法，令其解脫。若諸有學，寂靜妙明，勝妙現圓，我於彼前，現獨覺身，而爲說法，令其解脫。若諸有學，斷十二緣，緣斷勝性，勝妙現圓；我於彼前，現緣覺身，而爲說法，令其解脫。若諸有學，得四諦空，修道入滅，勝性現圓；我於彼前，現聲聞身，而爲說法，令其解脫。

午二、應求諸天 分二 未初、天王 二、天臣 今初

若諸眾生，欲心明悟，不犯欲塵，欲身清淨，我於彼前，現梵王

身，而爲說法，令其解脫。若諸眾生，欲爲天主，統領諸天，我於彼前，現帝釋身，而爲說法，令其成就。若諸眾生，欲身自在，遊行十方；我於彼前，現自在天身，而爲說法，令其成就。若諸眾生，欲身自在，飛行虛空；我於彼前，現大自在天身，而爲說法，令其成就。

未二、天臣

若諸眾生，愛統鬼神，救護國土；我於彼前，現天大將軍身。而爲說法，令其成就。若諸眾生，愛統世界，保護眾生；我於彼前，現四天王身，而爲說法，令其成就。若諸眾生，愛生天宮，驅使鬼神；我於彼前，現四天王國太子身，而爲說法，令其成

就。

午三、應求人趣 分四

未初、王臣人民

二、秉教男女

三、世諦婦女

四、童真男女 今初

若諸眾生，樂爲人王，我於彼前，現人王身，而爲說法，令其成就。若諸眾生，愛主族性，世間推讓；我於彼前，現長者身，而爲說法，令其成就。若諸眾生，愛談名言，清淨自居；我於彼前，現居士身，而爲說法，令其成就。若諸眾生，愛治國土，剖斷邦邑；我於彼前，現宰官身，而爲說法，令其成就。若諸眾生，愛諸數術，攝衛自居；我於彼前，現婆羅門身，而爲說法，令其成就。

未二、秉教男女

若有男子，好學出家，持諸戒律；我於彼前，現比丘身，而爲說法，令其成就。若有女人，好學出家，持諸禁戒；我於彼前，現比丘尼身，而爲說法，令其成就。若有男子，樂持五戒；我於彼前，現優婆塞身，而爲說法，令其成就。若有女子，五戒自居；我於彼前，現優婆夷身，而爲說法，令其成就。

未三、世諦婦女

若有女人，內政立身，以脩家國；我於彼前，現女主身，及國夫人，命婦大家（音姑）而爲說法，令其成就。

未四、童真男女

若有眾生，不壞男根；我於彼前，現童男身，而爲說法，令其成就。若有處女，愛樂處身，不求侵暴；我於彼前，現童女身，而爲說法，令其成就。

午四、應離八部

若有諸天，樂出天倫；我現天身，而爲說法，令其成就。若有諸龍，樂出龍倫，我現龍身，而爲說法，令其成就。若有藥叉，樂度本倫；我於彼前，現藥叉身，而爲說法，令其成就。若乾闥婆，樂脫其倫；我於彼前，現乾闥婆身，而爲說法，令其成就。若阿修羅，樂脫其倫；我於彼前，現阿脩羅身，而爲說法，令其成就。若緊那羅，樂脫其倫；我於彼前，現緊那羅身，而爲說

法，令其成就。若摩呼羅伽，樂脫其倫，我於彼前，現摩呼羅伽身，而爲說法，令其成就。

午五、應人修人

若諸眾生，樂人脩人；我現人身，而爲說法，令其成就。

午六、應離非人

若諸非人，有形無形，有想無想，樂脫其倫；我於彼前，皆現其身，而爲說法，令其成就。

巳三、結名出由

是名妙淨，三十二應，入國土身；皆以三昧，聞熏聞脩，無作妙力，自在成就。

辰二、十四無畏 分三

巳初、標承悲仰

二、條陳無畏

三、結名顯益

今初

世尊！我復以此，聞熏聞修，金剛三昧，無作妙力，與諸十方三世，六道一切眾生，同悲仰故。令諸眾生，於我身心，獲十四種，無畏功德。

巳二、條陳無畏 分四

午初、八難無畏

二、三毒無畏

三、二求無畏

四、持名無畏 今初

一者：由我不自觀音，以觀觀者。令彼十方苦惱眾生，觀其音聲，即得解脫。二者：知見旋復，令諸眾生，設入大火，火不能燒。三者：觀聽旋復，令諸眾生，大水所漂，水不能溺。四者：

斷滅妄想，心無殺害，令諸眾生，入諸鬼國，鬼不能害。五者：熏聞成聞，六根銷復，同於聲聽，能令眾生，臨當被害，刀段段壞，使其兵戈，猶如割水，亦如吹光，性無搖動。六者：聞熏精明，明徧法界，則諸幽暗，性不能全，能令眾生，藥叉羅刹，鳩槃荼鬼，及毗舍遮，富單那等，雖近其旁，目不能視。七者：音性圓銷，觀聽返入，離諸塵妄，能令眾生，禁繫枷鎖，所不能著。八者：滅音圓聞，徧生慈力，能令眾生，經過險路，賊不能劫。

午二、三毒無畏

九者：熏聞離塵，色所不劫，能令一切多淫眾生，遠離貪欲。十

者：純音無塵，根境圓融，無對所對，能令一切忿恨眾生，離諸瞋恚。十一者：銷塵旋明，法界身心，猶如瑠璃，朗徹無礙，能令一切，昏鈍性障，諸阿顛迦，永離癡暗。

午三、二求無畏

十二者：融形復聞，不動道場，涉入世間，不壞世界；能徧十方，供養微塵諸佛如來；各各佛邊，爲法王子。能令法界，無子眾生，欲求男者，誕生福德智慧之男。十三者：六根圓通，明照無二，含十方界，立大圓鏡，空如來藏，承順十方，微塵如來，秘密法門，受領無失，能令法界無子眾生，欲求女者，誕生端正，福德柔順，眾人愛敬，有相之女。

午四、持名無畏

十四者：此三千大千世界，百億日月，現住世間。諸法王子，有六十二恆沙河數，修法垂範，教化眾生，隨順眾生，方便智慧，各各不同。由我所得，圓通本根，發妙耳門，然後身心，微妙含容，周徧法界，能令眾生，持我名號，與彼共持六十二恆河沙諸法王子，二人福德，正等無異。世尊！我一名號，與彼眾多名號無異；由我修習，得真圓通。

巳三、結名顯益

是名十四施無畏力，福備眾生。

辰三、四不思議

分五

巳初、標承圓通自在力

二、同體形咒不思議

三、異體形咒不思議 四、破貪感求不思議 五、供養佛生不思議 今

初

世尊！我又獲是圓通，修證無上道故，又能善獲四不思議無作妙德。

巳二、同體形咒不思議

一者：由我初獲，妙妙聞心，心精遺聞，見、聞、覺、知，不能分隔，成一圓融，清淨寶覺，故我能現，眾多妙容，能說無邊，秘密神咒。其中或現：一首、三首、五首、七首、九首、十一首，如是乃至一百八首、千首、萬首、八萬四千爍迦羅首。二臂、四臂、六臂、八臂、十臂、十二臂、十四、十六、十八、二

十、至二十四，如是乃至一百八臂、千臂、萬臂、八萬四千母多羅臂。二目、三目、四目、九目、如是乃至一百八目、千目、萬目、八萬四千清淨寶目。或慈、或威、或定、或慧、救護眾生，得大自在。

巳三、異體形咒不思議

二者：由我聞思，脫出六塵，如聲度垣，不能爲礙，故我妙能現一一形，誦一一咒，其形其咒，能以無畏，施諸眾生。是故十方，微塵國土，皆名我爲施無畏者。

巳四、破貪感求不思議

三者：由我修習，本妙圓通，清淨本根，所遊世界，皆令眾生，

捨身珍寶，求我哀愍。

已五、供養佛生不思議

四者：我得佛心，證於究竟，能以珍寶，種種供養，十方如來，傍及法界，六道眾生。求妻得妻，求子得子，求三昧得三昧，求長壽得長壽，如是乃至，求大涅槃得大涅槃。

寅四、結答所證圓通

佛問圓通，我從耳門，圓照三昧，緣心自在，因入流相，得三摩地，成就菩提，斯爲第一。世尊！彼佛如來，歎我善得，圓通法門，於大會中，授記我爲觀世音號。由我觀聽，十方圓明，故觀音名，徧十方界。

子三、佛現瑞應 分二  
丑初、彰圓通總相 二、顯圓通別相 今初

爾時世尊，於師子座，從其五體，同放寶光，遠灌十方，微塵如來及法王子，諸菩薩頂。彼諸如來，亦於五體，同放寶光，從微塵方，來灌佛頂，並灌會中，諸大菩薩，及阿羅漢。

丑二、顯圓通別相

林木池沼，皆演法音，交光相羅，如寶絲網。是諸大眾，得未曾有，一切普獲金剛三昧。即時天雨 （去聲落也） 百寶蓮華，青、

黃、赤、白、間錯紛糅，十方虛空，成七寶色。此娑婆界，大地山河，俱時不現。唯見十方，微塵國土，合成一界，梵唄詠歌，自然敷奏。

癸三、佛教文殊選擇 分二

子初、如來敕選

二、文殊偈對

子初分二

丑初、先示諸說平等 二、後出選擇本意 今初

於是如來，告文殊師利法王子：汝今觀此二十五無學，諸大菩薩，及阿羅漢，各說最初成道方便，皆言修習，真實圓通，彼等修行，實無優劣，前後差別。

丑二、後出選擇本意

我今欲令，阿難開悟，二十五行，誰當其根；兼我滅後，此界眾生，入菩薩乘，求無上道，何方便門，得易成就？

子二、文殊偈對 分二

丑初、敘儀標偈

二、詳演偈文

今初

文殊師利法王子，奉佛慈旨，即從座起，頂禮佛足，承佛威神，

說偈對佛：

丑二、詳演偈文 分六

寅初、發源開選

二、了揀諸門

三、獨選耳根

四、普勸修持

五、結答覆命

六、求加總結

寅初分三

卯初、雙示

二源

二、略彰生滅

三、正明須選

今初

覺海性澄圓，圓澄覺元妙，元明照生所，所立照性亡。

卯二、略彰生滅

迷妄有虛空，依空立世界，想澄成國土，知覺乃眾生。空生大覺中，如海一漚發，有漏微塵國，皆依空所生，漚滅空本無，況復諸三有？

卯三、正明須選

歸元性無二，方便有多門。聖性無不通，順逆皆方便，初心入三昧，遲速不同倫。

寅二、了揀諸門 分四

卯初、揀六塵

二、揀五根

三、揀六識

四、

揀七大 今初

色想結成塵，精了不能徹，如何不明徹，於是獲圓通。音聲雜語言，但伊名句味，一非含一切，云何獲圓通？香以合中知，離則元無有，不恆其所覺，云何獲圓通？味性非本然，要以味時有，其覺不恆一，云何獲圓通？觸以所觸明，無所不明觸，合離性非定，云何獲圓通？法稱爲內塵，憑塵必有所，能所非徧涉，云何獲圓通？

卯二、揀五根

見性雖洞然，明前不明後，四維虧一半，云何獲圓通？鼻息出入通，現前無交氣，支離匪涉入，云何獲圓通？舌非入無端，因味生覺了，味亡了無有，云何獲圓通？身與所觸同，各非圓覺觀，涯量不冥會，云何獲圓通？知根雜亂思，湛了終無見，想念不可脫，云何獲圓通？

卯三、揀六識

識見雜三和，詰本稱非相，自體先無定，云何獲圓通？心聞洞十方，生於大因力，初心不能入，云何獲圓通？鼻想本權機，祇令攝心住，住成心所住，云何獲圓通？說法弄音文，開悟先成者，

名句非無漏，云何獲圓通？持犯但束身，非身無所束，元非徧一切，云何獲圓通？神通本宿因，何關法分別？念緣非離物，云何獲圓通？

卯四、揀七大

若以地性觀，堅礙非通達，有爲非聖性，云何獲圓通？若以水性觀，想念非真實，如如非覺觀，云何獲圓通？若以火性觀，厭有非真離，非初心方便，云何獲圓通？若以風性觀，動寂非無對，對非無上覺，云何獲圓通？若以空性觀，昏鈍先非覺，無覺異菩提，云何獲圓通？若以識性觀，觀識非常住，存心乃虛妄，云何獲圓通？諸行是無常，念性元生滅，因果今殊感，云何獲圓通？

寅三、獨選耳根 分二 卯初、備彰門妙 二、詳示脩巧 卯初又分四

辰初、根隨方利 二、法以人勝 三、示法真實 四、顯行當根 今初

我今白世尊：佛出娑婆界，此方真教體，清淨在音聞。欲取三摩提，實以聞中入。

辰二、法以人勝 分二 巳初、略讚自利 二、廣顯利他 今初

離苦得解脫，良哉觀世音！

巳二、廣顯利他

於恆沙劫中，入微塵佛國，得大自在力，無畏施眾生。妙音觀世音，梵音海潮音，救世悉安寧，出世獲常住。

辰三、示法真實 分三 巳初、圓真實 二、通真實 三、常真實 今初

我今啓如來，如觀音所說，譬如人靜居，十方俱擊鼓，十處一時聞，此則圓真實。

巳二、通真實

目非觀障外，口鼻亦復然，身以合方知，心念紛無緒。隔垣聽音響，遐邇俱可聞，五根所不齊，是則通真實。

巳三、常真實

音聲性動靜，聞中爲有無，無聲號無聞，非實聞無性。聲無即無滅，聲有亦非生，生滅二圓離，是則常真實。縱令在夢想，不爲不思無，覺觀出思惟，身心不能及。

辰四、顯行當根 分二

巳初、舉此方教體

二、明病在循聲

今初

今此娑婆國，聲論得宣明。

巳二、明病在循聲

眾生迷本聞，循聲故流轉，阿難縱強記，不免落邪思，豈非隨所淪，旋流獲無妄？

卯二、詳示修巧

分四

辰初、出名教所反聞

二、法說次第超越

三、

舉喻以合前法 四、結示因果究竟

阿難汝諦聽：我承佛威力，宣說金剛王，如幻不思議，佛母真三昧。汝聞微塵佛，一切秘密門，欲漏不先除，蓄聞成過誤。將聞持佛佛，何不自聞聞？

辰二、法說次第超越

聞非自然生，因聲有名字，旋聞與聲脫，能脫欲誰名？一根既返源，六根成解脫。見聞如幻翳，三界若空華，聞復翳根除，塵銷覺圓淨。淨極光通達，寂照含虛空。卻來觀世間，猶如夢中事，摩登伽在夢，誰能留汝形？

辰三、舉喻以合前法

如世巧幻師，幻作諸男女，雖見諸根動，要以一機抽，息機歸寂然，諸幻成無性。六根亦如是，元依一精明，分成六和合，一處成休復，六用皆不成，塵垢應念銷，成圓明淨妙。

辰四、結示因果究竟

餘塵尚諸學，明極即如來。

寅四、普勸修證

大眾及阿難，旋汝倒聞機，反聞聞自性，性成無上道，圓通實如是。此是微塵佛，一路涅槃門；過去諸如來，斯門已成就；現在諸菩薩，今各入圓明；未來修學人，當依如是法；我亦從中證，非惟觀世音。

寅五、結答覆命

誠如佛世尊，詢我諸方便，以救諸末劫；求出世間人，成就涅槃心，觀世音爲最。自餘諸方便，皆是佛威神。即事捨塵勞，非是常修學，淺深同說法。

寅六、求加總結

頂禮如來藏，無漏不思議。願加被未來，於此門無惑，方便易成就。堪以教阿難，及末劫沉淪，但以此根修，圓通超餘者，真實心如是。

辛三、大眾承示開悟證入 分二

壬初、阿難一類開悟 二、登伽一類證

入 今初

於是阿難，及諸大眾，身心了然，得大開示，觀佛菩提，及大涅槃，猶如有人，因事遠遊，未得歸還，明了其家，所歸道路。

壬二、登伽一類證入

普會大眾，天龍八部，有學二乘，及諸一切，新發心菩薩，其數凡有十恆河沙，皆得本心，遠塵離垢，獲法眼淨。性比丘尼，聞

說偈已，成阿羅漢。無量眾生，皆發無等等，阿耨多羅三藐三菩提心。

庚二、道場加行分二

辛初、初請略說 二、重請詳示

辛初分二

壬

初、阿難請 二、如來說 今初

阿難整衣服，於大眾中，合掌頂禮，心迹圓明，悲欣交集，欲益未來諸眾生故，稽首白佛：大悲世尊！我今已悟，成佛法門，是中修行，得無疑惑。常聞如來，說如是言：自未得度，先度人者，菩薩發心，自覺已圓，能覺他者，如來應世。我雖未度，願度末劫，一切眾生。世尊！此諸眾生，去佛漸遠，邪師說法，如恆河沙，欲攝其心，入三摩地，云何令其安立道場，遠諸魔事？

於菩提心，得無退屈？

壬二、如來說分三 癸初、許說承聽 二、總舉三學 三、別列三學

今初

爾時世尊，於大眾中，稱讚阿難：善哉！善哉！如汝所問，安立道場，救護眾生，末劫沉溺，汝今諦聽：當爲汝說。阿難大眾，唯然奉教。

癸二、總舉三學

佛告阿難：汝常聞我毘奈耶中，宣說修行，三決定義，所謂：攝心爲戒，因戒生定，因定發慧，是則名爲，三無漏學。

癸三、別列三學分二 子初、歷明預先嚴戒 二、略示場中定慧 子初

分二

丑初、正教持戒 二、助以咒力

丑初分三

寅初、攝前徵起

二、開釋四重 三、總結遠魔 今初

阿難！云何攝心，我名爲戒？

寅二、開釋四重

分四

卯初、斷淫

二、斷殺

三、斷盜

四、斷妄

卯初分二

辰初、曲分損益之相 二、判決邪正之說

辰初分三

巳

初、首陳持犯利害

二、預辨魔佛教儀

三、確定菩提成否

巳初分二

午初、持則必出生死

二、犯則必落魔道

今初

若諸世界，六道眾生，其心不淫，則不隨其生死相續。

午二、犯則必落魔道

汝修三昧，本出塵勞，淫心不除，塵不可出。縱有多智，禪定現

前，如不斷淫，必落魔道：上品魔王，中品魔民，下品魔女。彼等諸魔，亦有徒眾，各各自謂，成無上道。

巳二、預辨魔佛教儀 分二

午初、貪淫化世即魔教

二、教人斷淫即佛

誨 今初

我滅度後，末法之中，多此魔民，熾盛世間，廣行貪淫，爲善知識，令諸眾生，落愛見坑，失菩提路。

午二、教人斷淫即佛誨

汝教世人，修三摩地，先斷心淫。是名如來，先佛世尊，第一決定，清淨明誨。

巳三、確定菩提成否 分二

午初、喻不斷無成

二、勸深斷方成

今初

是故阿難！若不斷淫，修禪定者，如蒸沙石，欲其成飯，經百千劫，只名熱沙。何以故？此非飯本，沙石成故。汝以淫身，求佛妙果，縱得妙悟，皆是淫根，根本成淫，輪轉三途，必不能出；如來涅槃，何路修證？

午二、勸深斷方成

必使淫機，身心俱斷，斷性亦無，於佛菩提，斯可希冀。

辰二、判決邪正之說

如我此說，名爲佛說；不如此說，即波旬說。

卯二、斷殺分二

辰初、曲分損益之相

二、判決邪正之說

巳初、首陳持犯利害

二、預辨魔佛教儀

三、確定解脫得否

巳初分

二 午初、持則心出生死 二、犯則必落神道 今初

阿難！又諸世界，六道眾生，其心不殺，則不隨其生死相續。

午二、犯則必落神道

汝修三昧，本出塵勞，殺心不除，塵不可出。縱有多智，禪定現前，如不斷殺，必落神道：上品之人，爲大力鬼；中品則爲飛行夜叉，諸鬼帥等；下品當爲地行羅刹。彼諸鬼神，亦有徒眾，各自自謂，成無上道。

巳二、預辨魔佛教儀 分二

午初、食肉化世即鬼教 二、教人斷殺即佛

誨 今初

我滅度後，末法之中，多此鬼神，熾盛世間，自言食肉得菩提

路。阿難！我令比丘，食五淨肉，此肉皆我神力化生，本無命根。汝婆羅門，地多蒸濕，加以沙石，草菜不生，我以大悲神力所加，因大慈悲，假名爲肉，汝得其味。奈何如來滅度之後，食眾生肉，名爲釋子！汝等當知，是食肉人，縱得心開，似三摩地，皆大羅剎，報終必沉生死苦海，非佛弟子。如是之人，相殺相吞，相食未已，云何是人得出三界？

午二、教人斷殺即佛誨

汝教世人，修三摩地，次斷殺生。是名如來，先佛世尊，第二決定，清淨明誨。

巳三、確定解脫得否 分二

午初、喻不斷難脫

二、勸深斷方脫

今初

是故阿難！若不斷殺，脩禪定者，譬如有人：自塞其耳，高聲大叫，求人不聞，此等名爲欲隱彌露。清淨比丘，及諸菩薩，於歧路行，不踏生草，況以手拔？云何大悲，取諸眾生，血肉充食？

午二、勸深斷方脫

若諸比丘，不服東方，絲、繇、絹、帛，及是此土，靴、履、裘、毳、乳、酪、醍醐，如是比丘，於世真脫，酬還宿債，不遊三界。何以故？服其身分，皆爲彼緣；如人食其地中百穀，足不離地。必使身心，於諸眾生，若身身分，身心二途，不服不食，我說是人真解脫者。

辰二、判決邪正之說

如我此說，名爲佛說，不如此說，即波旬說。

卯三、斷盜 分二 辰初、曲分損益之相 二、判決邪正之說 辰初分三

巳初、首陳持犯利害 二、須辨妖佛教儀 三、確定三昧得否 巳初

分二 午初、持則必出生死 二、犯則必落邪道 今初

阿難！又復世界，六道眾生，其心不偷，則不隨其生死相續。

午二、犯則必落邪道

汝脩三昧，本出塵勞，偷心不除，塵不可出。縱有多智，禪定現前，如不斷偷，必落邪道；上品精靈，中品妖魅，下品邪人，諸魅所著。彼等群邪，亦有徒眾，各各自謂，成無上道。

巳二、預辨妖佛教儀 分二 午初、潛匿誑惑即妖教 二、教人斷偷即佛

誨 今初

我滅度後，末法之中，多此妖邪，熾盛世間，潛匿奸欺，稱善知識，各自謂己，得上人法，誑惑無識，恐令失心，所過之處，其家耗散。我教比丘，循方乞食，令其捨貪，成菩提道。諸比丘等，不自熟食，寄於殘生，旅泊三界，示一往還，去已無返。云何賊人，假我衣服，裨販如來，造種種業，皆言佛法？卻非出家，具戒比丘，爲小乘道，由是疑誤，無量眾生，墮無間獄。

午二、教人斷偷即佛誨

分二

未初、先出自己誨

二、轉教先佛誨

今

初

若我滅後，其有比丘，發心決定，脩三摩提，能於如來形像之

前，身然一燈，燒一指節，及於身上，爇一香炷。我說是人無始宿債，一時酬畢，長揖世間，永脫諸漏，雖未即明無上覺路，是人於法，已決定心。若不爲此，捨身微因，縱成無爲，必還生人，酬其宿債，如我馬麥，正等無異。

未二、轉教先佛誨

汝教世人，修三摩地，後斷偷盜，是名如來，先佛世尊，第三決定，清淨明誨。

巳三、確定三昧得否

分二

午初、喻不斷難得

二、勸深斷方得

今初

是故阿難！若不斷偷，脩禪定者，譬如有入，水灌漏卮，欲求其滿，縱經塵劫，終無平復。

午二、勸其深斷方得

若諸比丘，衣鉢之餘，分寸不蓄，乞食餘分，施餓眾生。於大集會，合掌禮眾，有人捶詈，同於稱讚。必使身心，二俱捐捨；身肉骨血，與眾生共。不將如來，不了義說，迴爲己解，以誤初學，佛印是人，得真三昧。

辰二、判決邪正之說

如我所說，名爲佛說，不如此說，即波旬說。

卯三、斷盜竟 卯四、斷妄 分二 辰初、曲示戒勸之意 二、判決邪正

之說 辰初分四 巳初、首陳妄語大損 二、表已禁敕無妄 三、轉教

先佛明誨 四、確定菩提成否 巳初分三 午初、躡標妄語成魔 二、

指述妄語之意 三、記其損善墮惡 今初

阿難！如是世界，六道眾生，雖則身心，無殺、盜、淫，三行已圓，若大妄語，即三摩地，不得清淨，成愛見魔，失如來種。

午二、指述妄語之意

所謂：未得謂得，未證言證。或求世間尊勝第一，謂前人言：我今已得須陀洹果，斯陀含果，阿那含果，阿羅漢道，辟支佛乘，十地地前，諸位菩薩。求彼禮懺，貪其供養。

午三、記其損善墮落

是一顛迦，消滅佛種，如人以刀，斷多羅木，佛記是人，永殞善根，無復知見，沉三苦海，不成三昧。

巳二、表已禁教無妄 分二 午初、佛教聖化必密 二、惟除命終遺付

今初

我滅度後，敕諸菩薩，及阿羅漢，應身生彼末法之中，作種種形，度諸輪轉。或作沙門，白衣居士，人王、宰官、童男、童女，如是乃至淫女寡婦，姦、偷、屠、販、與其同事，稱讚佛乘，令其身心，入三摩地。終不自言：我真菩薩，真阿羅漢，泄佛密因，輕言末學。

午二、惟除命終遺付

惟除命終，陰有遺付。云何是人，惑亂眾生，成大妄語？

巳三、轉教先佛明誨

汝教世人，修三摩地，後復斷除，諸大妄語，是名如來，先佛世尊，第四決定，清淨明誨。

巳四、確定菩提成否

分二

午初、喻不斷無成

二、許能斷必成

今初

是故阿難！若不斷其大妄語者，如刻人糞，爲旃檀形，欲求香氣，無有是處。我教比丘，直心道場，於四威儀，一切行中，尚無虛假，云何自稱，得上人法？譬如窮人，妄號帝王，自取誅滅。況復法王，如何妄竊？因地不真，果招迂曲，求佛菩提，如噬臍人，欲誰成就？

午二、許能斷必成

若諸比丘，心如直弦，一切真實，入三摩地，永無魔事。我印是

人，成就菩薩，無上知覺。

辰二、判決邪正之說

如我所說，名爲佛說；不如此說，即波旬說。

二八八

首楞嚴經卷第六

大佛頂如來密因修證了義諸菩薩萬行首楞嚴經  
(卷第七)

寅三、總結遠魔

阿難！汝問攝心，我今先說，入三摩地，修學妙門。求菩薩道，要先持此四種律儀，皎如冰霜，自不能生一切枝葉。心三口四，生必無因。阿難！如是四事，若不遺失，心尚不緣色、香、味、觸，一切魔事，云何發生？

丑二、助以咒力 分二

寅初、正以勸持讚勝

二、況顯除習無難

今初

若有宿習，不能滅除，汝教是人，一心誦我，佛頂光明，摩訶薩

怛哆，般怛囉，無上神咒。斯是如來，無見頂相，無爲心佛，從頂發揮，坐寶蓮華，所說神咒。

寅二、沉顯除習無難

且汝宿世，與摩登伽，歷劫因緣，恩愛習氣，非是一生，及與一劫，我一宣揚，愛心永脫，成阿羅漢。彼尙淫女，無心修行，神力冥資，速證無學。云何汝等，在會聲聞，求最上乘，決定成佛，譬如以塵，揚於順風，有何艱險？

子二、略示場中定慧 分二  
丑初、因戒生定 二、因定發慧 今初

若有末世，欲坐道場，先持比丘，清淨禁戒，要當選擇戒清淨者，第一沙門，以爲其師，若其不遇真清淨僧，汝戒律儀，必不

成就。戒成已後，著新淨衣，然香閒居，誦此心佛所說神咒，一百八徧，然後結界，建立道場。求於十方，現住國土，無上如來，放大悲光，來灌其頂。

丑二、因定發慧

阿難！如是末世，清淨比丘，若比丘尼，白衣檀越，心滅貪淫，持佛淨戒，於道場中，發菩薩願。出入澡浴，六時行道，如是不寐，經三七日。我自現身，至其人前，摩頂安慰，令其開悟。

庚二、重請詳示 分二

辛初、重請說道場

二、重請說神咒

辛初分二

壬初、阿難重請 二、世尊重說 今初

阿難白佛言：世尊！我蒙如來無上悲誨，心已開悟，自知修證，

無學道成。末法修行，建立道場，云何結界，合佛世尊，清淨軌則？

壬二、世尊重說 分三

癸初、道場建設 二、修證節次 三、結答酬請

癸初分五

子初、所建壇式 二、所設莊嚴 三、所獻供養 四、所奉

尊像 五、所取照映 今初

佛告阿難：若末世人，願立道場，先取雪山，大力白牛，食其山中肥膩香草，此牛唯飲雪山清水，其糞微細，可取其糞，和合旃檀，以泥其地。若非雪山，其牛臭穢，不堪塗地。別於平原，穿去地皮，五尺已下，取其黃土。和上旃檀、沉水、蘇合、薰陸、鬱金、白膠、青木、零陵、甘松、及雞舌香，以此十種，細羅爲

粉，合土成泥，以塗場地，方圓丈六，爲八角壇。

子二、所設莊嚴

壇心置一金、銀、銅、木，所造蓮華，華中安鉢，鉢中先盛八月露水，水中隨安所有華葉。取八圓鏡，各安其方，圍繞華鉢。鏡外建立十六蓮華，十六香鑪。間華鋪設，莊嚴香鑪，純燒沉水，無令見火。

子三、所獻供養

取白牛乳，置十六器，乳爲煎餅，並諸砂糖、油餅、乳糜、蘇合、蜜薑、純酥、純蜜，於蓮華外，各各十六，繞圍華外，以奉諸佛，及大菩薩。每以食時，若在中夜，取蜜半升，用酥三合，

壇前別安一小火鑪，以兜樓婆香，煎取香水，沐浴其炭，然令猛熾，投是酥蜜，於炎鑪內，燒令煙盡，享佛菩薩。

子四、所奉尊像

令其四外，徧懸幡華，於壇室中，四壁敷設十方如來，及諸菩薩，所有形像。應於當陽，張盧舍那，釋迦、彌勒、阿閼、彌陀，諸大變化，觀音形像，兼金剛藏，安其左右。帝釋、梵王、烏芻瑟摩、並藍地迦、諸軍荼利、與毗俱胝、四天王等，頻那、夜伽、張於門側，左右安置。

子五、所取照映

又取八鏡覆懸虛空，與壇場中，所安之鏡，方面相對，使其形

影，重重相涉。

癸二、修證節次 分二

子初、三七初成定慧

二、百日頓證聖果

今初

於初七中，至誠頂禮，十方如來，諸大菩薩，阿羅漢號，恆於六時，誦咒圍壇，至心行道，一時常行，一百八遍。第二七中，一向專心，發菩薩願，心無間斷，我毗奈耶，先有願教。第三七中，於十二時，一向持佛，般怛囉咒，至第七日，十方如來，一時出現，鏡交光處，承佛摩頂。即於道場，修三摩地。能令如是，末世修學，身心明淨，猶如瑠璃。

子二、百日頓證聖果

阿難！若此比丘，本受戒師，及同會中，十比丘等，其中有一不

清淨者，如是道場，多不成就。從三七後，端坐安居，經一百日，有利根者，不起於座，得須陀洹。縱其身心，聖果未成，決定自知，成佛不謬。

癸三、結答酬請

汝問道場，建立如是。

辛二、重請說神咒 分三

壬初、會眾重請 二、如來重說 三、會眾願

護 今初

阿難頂禮佛足，而白佛言：自我出家，恃佛憍愛，求多聞故，未證無爲。遭彼梵天，邪術所禁，心雖明了，力不自由，賴遇文殊，令我解脫，雖蒙如來，佛頂神咒，冥獲其力，尙未親聞。惟

願大慈，重爲宣說，悲救此會，諸修行輩，未及當來，在輪迴者，承佛密音，身意解脫。於時會中，一切大眾，普皆作禮，佇聞如來秘密章句。

壬二、如來重說 分二

癸初、正說神咒

二、說咒利益

癸初分三

子

初、光相表顯

二、大眾欽聽

三、五會神咒

今初

爾時世尊，從肉髻中，涌百寶光，光中涌出，千葉寶蓮，有化如來，坐寶華中。頂放十道，百寶光明，一一光明，皆徧示現，十恆河沙，金剛密跡，擎山持杵，徧虛空界。

子二、大眾欽聽

大眾仰觀，畏愛兼抱，求佛哀祐，一心聽佛，無見頂相，放光如

來，宣說神咒。

子三、五會神咒

南無薩怛他蘇伽多耶阿囉訶帝三藐三菩陀寫一 薩怛他佛陀俱知瑟

尼釤二 南無薩婆勃陀勃地薩跢鞞弊三 南無薩多南三藐三菩陀俱知

南四 娑舍囉婆迦僧伽喃五 南無盧雞阿羅漢跢喃六 南無蘇盧多波那

喃七 南無娑羯唎陀伽彌喃八南無盧雞三藐伽跢喃九 三藐伽波囉底

波多那喃十 南無提婆離瑟赦十一 南無悉陀耶毗地耶陀囉離瑟赦十

二 舍波奴揭囉訶娑訶娑囉摩他喃十三 南無跋囉訶摩泥十四 南無因

陀囉耶十五 南無婆伽婆帝十六 嚧陀囉耶十七 烏摩般帝十八 娑醯夜

耶十九 南無婆伽婆帝二十 那囉野拏耶二十一 槃遮摩訶三慕陀囉二

- 十二 南無悉羯唎多耶 二十三 南無婆伽婆帝 二十四 摩訶迦羅耶 二十
- 五 地唎般刺那伽囉 二十六 毗陀囉婆拏迦囉耶 二十七 阿地目帝 二十
- 八 尸摩舍那泥婆悉泥 二十九 摩怛唎伽拏 三十 南無悉羯唎多耶 三十
- 一 南無婆伽婆帝 三十二 多他伽跢俱囉耶 三十三 南無般頭摩俱囉耶
- 三十四 南無跋闍囉俱囉耶 三十五 南無摩尼俱囉耶 三十六 南無伽闍
- 俱囉耶 三十七 南無婆伽婆帝 三十八 帝唎茶輸囉西那 三十九 波囉訶
- 囉拏囉闍耶 四十 跢他伽多耶 四十一 南無婆伽婆帝 四十二 南無阿彌
- 多婆耶 四十三 跢他伽多耶 四十四 阿囉訶帝 四十五 三藐三菩提耶 四
- 十六 南無婆伽婆帝 四十七 阿芻毗耶 四十八 跢他伽多耶 四十九 訶囉

訶帝 五十一 三藐三菩提耶 五十一 南無婆伽婆帝 五十二 鞞沙闍耶俱噓

吠柱唎耶 五十三 般囉婆囉闍耶 五十四 跢他伽多耶 五十五 南無婆伽

婆帝 五十六 三補師毖多 五十七 薩憐捺囉刺闍耶 五十八 跢他伽多耶

五十九 訶囉訶帝 六十 三藐三菩提耶 六十一 南無婆伽婆帝 六十二 舍

雞野母那曳 六十三 跢他伽多耶 六十四 訶囉訶帝 六十五 三藐三菩提

耶 六十六 南無婆伽婆帝 六十七 刺怛那雞都囉闍耶 六十八 跢他伽多

耶 六十九 訶囉訶帝 七十 三藐三菩提耶 七十一 帝瓢南無薩羯唎多 七

十二 翳曇婆伽婆多 七十三 薩怛他伽都瑟尼釤 七十四 薩怛多般怛嚩

七十五 南無阿婆囉視耽 七十六 般囉帝揚岐囉 七十七 薩囉婆部多揭

囉訶 七十八  
 尼羯囉訶揭迦囉訶尼 七十九  
 跋囉毖地耶叱陀你 八十  
 阿  
 迦囉蜜喇柱 八十一  
 般喇怛囉耶儻羯喇 八十二  
 薩囉婆槃陀那目叉尼  
 八十三  
 薩囉婆突瑟吒 八十四  
 突悉乏般那你伐囉尼 八十五  
 赭都囉失  
 帝南 八十六  
 羯囉訶娑訶薩囉若闍 八十七  
 毗多崩薩那羯喇 八十八  
 阿  
 瑟吒冰舍帝南 八十九  
 那叉剎怛囉若闍 九十  
 波囉薩陀那羯喇 九十一  
 阿瑟吒南 九十二  
 摩訶羯囉訶若闍 九十三  
 毗多崩薩那羯喇 九十四  
 薩  
 婆舍都噓你婆囉若闍 九十五  
 呼藍突悉乏難遮那舍尼 九十六  
 毖沙舍  
 悉怛囉 九十七  
 阿吉尼烏陀迦囉若闍 九十八  
 阿般囉視多具囉 九十九  
 摩訶般囉戰持 一百  
 摩訶疊多 一百一  
 摩訶帝闍 二  
 摩訶稅多闍婆羅 三

摩訶跋囉槃陀囉婆悉你 四 阿唎耶多囉 五 毗唎俱知 六 誓婆毗闍耶 七

跋闍囉摩禮底 八 毗舍嚧多 九 勃騰罔迦 十 跋闍囉制喝那阿遮 十一 摩

囉制婆般囉質多 十二 跋闍囉擅持 十三 毗舍囉遮 十四 扇多舍鞞提婆

補視多 十五 蘇摩嚧波 十六 摩訶稅多 十七 阿唎耶多囉 十八 摩訶婆囉

阿般囉 十九 跋闍囉商羯囉制婆 二十 跋闍囉俱摩唎 二十一 俱藍陀唎

二十二 跋闍囉喝薩多遮 二十三 毗地耶乾遮那摩唎迦 二十四 崛蘇母

婆羯囉踰那 二十五 鞞嚧遮那俱唎耶 二十六 夜囉菟瑟尼釤 二十七 毗

折藍婆摩尼遮 二十八 跋闍囉迦那迦波囉波 二十九 嚧闍那跋闍囉頓

稚遮 三十 稅多遮迦摩囉 三十一 剎奢尸波囉婆 三十二 翳帝夷帝 三十

三 母陀囉羯拏 三十四 娑鞞囉懺 三十五 掘梵都 三十六 印菟那麼麼寫  
 三十七 烏咩 三十八 唎瑟揭拏 三十九 般刺舍悉多 四十 薩怛他伽都瑟  
 尼鈇 四十一 虎咩 四十二 都嚧雍 四十三 瞻婆那 四十四 虎咩 四十五 都  
 嚧雍 四十六 悉耽婆那 四十七 虎咩 四十八 都嚧雍 四十九 波囉瑟地耶  
 三般叉拏羯囉 五十 虎咩 五十一 都嚧雍 五十二 薩婆藥叉喝囉刹娑 五  
 十三 揭囉訶若闍 五十四 毗騰崩薩那羯囉 五十五 虎咩 五十六 都嚧雍  
 五十七 者都囉尸底南 五十八 揭囉訶娑訶薩囉南 五十九 毗騰崩薩那  
 囉 六十 虎咩 六十一 都嚧雍 六十二 囉叉 六十三 婆伽梵 六十四 薩怛他  
 伽都瑟尼鈇 六十五 波囉點闍吉唎 六十六 摩訶娑訶薩囉 六十七 勃樹

娑訶薩囉室唎沙 六十八  
俱知娑訶薩泥帝隸 六十九  
阿弊提視婆唎多

七十  
吒吒嬰迦 七十一  
摩訶跋闍嚧陀囉 七十二  
帝唎菩薩那 七十三  
曼

茶囉 七十四  
烏咩 七十五  
莎悉帝薄婆都 七十六  
麼麼 七十七  
印菟那麼

麼寫 七十八  
囉闍婆夜 七十九  
主囉婆夜 八十  
阿祇尼婆夜 八十一  
烏陀

迦婆夜 八十二  
毗沙婆夜 八十三  
舍薩多囉婆夜 八十四  
婆囉斫羯囉婆

夜 八十五  
突瑟叉婆夜 八十六  
阿舍你婆夜 八十七  
阿迦囉蜜唎柱婆夜

八十八  
陀囉尼部彌劔波伽波陀婆夜 八十九  
烏囉迦婆多婆夜 九十  
刺

闍壇茶婆夜 九十一  
那伽婆夜 九十二  
毗條怛婆夜 九十三  
蘇波囉拏婆

夜 九十四  
藥叉揭囉訶 九十五  
囉叉私揭囉訶 九十六  
畢唎多揭囉訶 九

十七  
 毗舍遮揭囉訶 九十八  
 部多揭囉訶 九十九  
 鳩槃荼揭囉訶 二百  
 補  
 丹那揭囉訶 二百一  
 迦吒補丹那揭囉訶 二  
 悉乾度揭囉訶 三  
 阿播悉摩  
 囉揭囉訶 四  
 烏檀摩陀揭囉訶 五  
 車夜揭囉訶 六  
 醯唎婆帝揭囉訶 七  
 社  
 多訶唎喃 八  
 揭婆訶唎喃 九  
 噓地囉訶唎喃 十  
 忙娑訶唎喃 十一  
 謎陀訶  
 唎喃 十二  
 摩闍訶唎喃 十三  
 闍多訶唎女 十四  
 視比多訶唎喃 十五  
 毗多  
 訶唎喃 十六  
 婆多訶唎喃 十七  
 阿輸遮訶唎女 十八  
 質多訶唎女 十九  
 帝  
 鈇薩鞞鈇 二十  
 薩婆揭囉訶南 二十一  
 毗陀耶闍瞋陀夜彌 二十二  
 雞囉  
 夜彌 二十三  
 波唎跋囉者迦訶唎擔 二十四  
 毗陀夜闍瞋陀夜彌 二十五  
 雞囉夜彌 二十六  
 茶演尼訶唎擔 二十七  
 毗陀夜闍瞋陀夜彌 二十八  
 雞

囉夜彌 二十九 摩訶般輸般怛夜 三十 嚧陀囉訖唎擔 三十一 毗陀夜闍

瞋陀夜彌 三十二 雞囉夜彌 三十三 那囉夜拏訖唎擔 三十四 毗陀夜闍

瞋陀夜彌 三十五 雞囉夜彌 三十六 怛埵伽嚧茶西訖唎擔 三十七 毗陀

耶闍瞋陀夜彌 三十八 雞囉夜彌 三十九 摩訶迦囉摩怛唎伽拏訖唎擔

四十 毗陀夜闍瞋陀夜彌 四十一 雞囉夜彌 四十二 迦婆唎迦訖唎擔 四

十三 毗陀夜闍瞋陀夜彌 四十四 雞囉夜彌 四十五 闍耶羯囉摩度羯囉

四十六 薩婆囉他娑達那訖唎擔 四十七 毗陀夜闍瞋陀夜彌 四十八 雞

囉夜彌 四十九 赭咄囉婆耆你訖唎擔 五十 毗陀夜闍瞋陀夜彌 五十一

雞囉夜彌 五十二 毗唎羊訖唎知 五十三 難陀雞沙囉伽拏般帝 五十四

索醯夜訖唎擔 五十五  
毗陀夜闍瞋陀夜彌 五十六  
雞囉夜彌 五十七  
那

揭那舍囉婆拏訖唎擔 五十八  
毗陀夜闍瞋陀夜彌 五十九  
雞囉夜彌 六

十  
阿羅漢訖唎擔毗陀夜闍瞋陀夜彌 六十一  
雞囉夜彌 六十二  
毗多囉

伽訖唎擔 六十三  
毗陀夜闍瞋陀夜彌 六十四  
雞囉夜彌跋闍囉波你 六

十五  
具醯夜具醯夜 六十六  
迦地般帝訖唎擔 六十七  
毗陀夜闍瞋陀夜

彌 六十八  
雞囉夜彌 六十九  
囉叉罔 七十  
婆伽梵 七十一  
印兔那麼麼寫

七十二  
婆伽梵 七十三  
薩怛多般怛囉 七十四  
南無粹都帝 七十五  
阿悉

多那囉刺迦 七十六  
婆囉婆悉普吒 七十七  
毗迦薩怛多鉢帝唎 七十八

什佛囉什佛囉 七十九  
陀囉陀囉 八十  
頻陀囉頻陀囉瞋陀瞋陀 八十一

虎餅 八十二 虎餅 八十三 泮吒 八十四 泮吒泮吒泮吒泮吒 八十五 娑訶

八十六 醯醢泮 八十七 阿牟迦耶泮 八十八 阿波囉提訶多泮 八十九 婆

囉波囉陀泮 九十 阿素囉毗陀囉波迦泮 九十一 薩婆提鞞弊泮 九十二

薩婆那伽弊泮 九十三 薩婆藥叉弊泮 九十四 薩婆乾闥婆弊泮 九十五

薩婆補丹那弊泮 九十六 迦吒補丹那弊泮 九十七 薩婆突狼枳帝弊泮

九十八 薩婆突澀比喼訖瑟帝弊泮 九十九 薩婆什婆喼弊泮 三百 薩婆

阿播悉摩喼弊泮 三百一 薩婆舍囉婆拏弊泮 二 薩婆地帝雞弊泮 三 薩

婆怛摩陀繼弊泮 四 薩婆毗陀耶囉誓遮唎弊泮 五 闍夜羯囉摩度羯囉

六 薩婆囉他娑陀雞弊泮 七 毗地夜遮喼弊泮 八 者都囉縛耆你弊泮 九

跋闍囉俱摩唎 十  
 毗陀夜囉誓弊泮 十一  
 摩訶波囉丁羊叉耆唎弊泮 十  
 二  
 跋闍囉商羯囉夜 十三  
 波囉丈耆囉闍耶泮 十四  
 摩訶迦囉夜 十五  
 摩  
 訶末怛唎迦拏 十六  
 南無娑羯唎多夜泮 十七  
 毖瑟拏婢曳泮 十八  
 勃囉  
 訶牟尼曳泮 十九  
 阿耆尼曳泮 二十  
 摩訶羯唎曳泮 二十一  
 羯囉檀遲曳  
 泮 二十二  
 箴怛唎曳泮 二十三  
 嘜怛唎曳泮 二十四  
 遮文茶曳泮 二十五  
 羯囉囉怛唎曳泮 二十六  
 迦般唎曳泮 二十七  
 阿地目質多迦尸摩舍那  
 二十八  
 婆私你曳泮 二十九  
 演吉質 三十  
 薩埵婆寫 三十一  
 麼麼印兔那  
 麼麼寫 三十二  
 突瑟吒質多 三十三  
 阿末怛唎質多 三十四  
 烏闍訶囉 三  
 十五  
 伽婆訶囉 三十六  
 噓地囉訶囉 三十七  
 婆娑訶囉 三十八  
 摩闍訶囉

- 三十九 闍多訶囉 四十 視毖多訶囉 四十一 跋略夜訶囉 四十二 乾陀訶囉 四十三 布史波訶囉 四十四 頗囉訶囉 四十五 婆寫訶囉 四十六 般波質多 四十七 突瑟吒質多 四十八 嚩陀囉質多 四十九 藥叉揭囉訶 五十 囉剎娑揭囉訶 五十一 閉隸多揭囉訶 五十二 毗舍遮揭囉訶 五十三 部多揭囉訶 五十四 鳩槃荼揭囉訶 五十五 悉乾陀揭囉訶 五十六 烏怛摩陀揭囉訶 五十七 車夜揭囉訶 五十八 阿播薩摩囉揭囉訶 五十九 宅祛革荼耆尼揭囉訶 六十 唎佛帝揭囉訶 六十一 闍彌迦揭囉訶 六十二 舍俱尼揭囉訶 六十三 姥陀囉難地迦揭囉訶 六十四 阿藍婆揭囉訶 六十 五 乾度波尼揭囉訶 六十六 什伐囉堙迦醯迦 六十七 墜帝藥迦 六十八

怛隸帝藥迦 六十九  
者突託迦 七十  
呢提什伐囉毖釤摩什伐囉 七十一

薄底迦 七十二  
鼻底迦 七十三  
室隸瑟蜜迦 七十四  
娑你般帝迦 七十五

薩婆什伐囉 七十六  
室嚧吉帝 七十七  
末陀鞞達嚧制劍 七十八  
阿綺嚧

鉗 七十九  
目佉嚧鉗 八十  
羯唎突嚧鉗 八十一  
揭囉訶揭藍 八十二  
羯拏

輸藍 八十三  
憚多輸藍 八十四  
迄唎夜輸藍 八十五  
末麼輸藍 八十六  
跋

唎室婆輸藍 八十七  
毖栗瑟吒輸藍 八十八  
烏陀囉輸藍 八十九  
羯知輸

藍 九十  
跋悉帝輸藍 九十一  
鄔嚧輸藍 九十二  
常伽輸藍 九十三  
喝悉多

輸藍 九十四  
跋陀輸藍 九十五  
娑房盎伽般囉丈伽輸藍 九十六  
部多毖

路茶 九十七  
茶耆尼什婆囉 九十八  
陀突嚧迦建咄嚧吉知婆路多毗 九十九

十九 薩般噓訶凌伽 四百 輸沙怛囉娑那羯囉 四百一 毗沙喻迦 二 阿耆

尼烏陀迦 三 末囉鞞囉建跢囉 四 阿迦囉蜜唎咄怛斂部迦 五 地栗刺吒

六 毖唎瑟質迦 七 薩婆那俱囉 八 肆引伽弊揭囉唎藥叉怛囉芻 九 末囉

視吠帝鈇娑鞞鈇 十 悉怛多鉢怛囉 十一 摩訶跋闍噓瑟尼鈇 十二 摩訶

般賴丈耆藍 十三 夜波突陀舍喻闍那 十四 辯怛嚱拏 十五 毗陀耶槃曇

迦噓彌 十六 帝殊槃曇迦噓彌 十七 般囉毗陀槃曇迦噓彌 十八 跢姪他

十九 唵 二十 阿那隸 二十一 毗舍提 二十二 鞞囉跋闍囉陀唎 二十三 槃

陀槃陀你 二十四 跋闍囉謗尼泮 二十五 烏泮都噓甕泮 二十六 娑婆訶

癸二、說咒利益 分二 子初、諸佛要用 二、眾生利賴 子初分三 丑

初、指示全名 二、備彰諸用 三、更名無盡 今初

阿難！是佛頂光聚，悉怛多般怛囉，秘密伽陀，微妙章句。

丑二、備彰諸用

出生十方，一切諸佛，十方如來，因此咒心，得成無上正徧知覺。十方如來，執此咒心，降伏諸魔，制諸外道。十方如來，乘此咒心，坐寶蓮華，應微塵國。十方如來，含此咒心，於微塵國，轉大法輪。十方如來，持此咒心，能於十方，摩頂授記。自果未成，亦於十方，蒙佛授記。十方如來，依此咒心，能於十方，拔濟群苦。所謂地獄、餓鬼、畜生、盲、聾、瘖、瘰、癩、冤憎會苦、愛別離苦、求不得苦、五陰熾盛，大小諸橫，同時解脫。賊難、兵難、王難、獄難、風、火、水難、飢渴、貧窮，應念銷

散。十方如來，隨此咒心，能於十方，事善知識。四威儀中，供養如意。恆沙如來，會中推爲，大法王子。十方如來，行此咒心，能於十方，攝授親因，令諸小乘，聞秘密藏，不生驚怖。十方如來，誦此咒心，成無上覺；坐菩提樹，入大涅槃。十方如來，傳此咒心，於滅度後，付佛法事，究竟住持。嚴淨戒律，悉得清淨。

丑三、更明無盡

若我說是佛頂光聚，般怛囉咒，從旦至暮，音聲相聯，字句中  
間，亦不重疊，經恆沙劫，終不能盡。

子二、眾生利賴 分二

丑初、別指勝名

二、備彰威力 今初

亦說此咒，名如來頂。

丑二、備彰威力 分三

寅初、首示行人必賴以勸持 二、詳伸護生助道

以出由 三、承明行人必證以結勸

寅初分二

卯初、正示誦方遠魔

二、開許書帶獲益 今初

汝等有學，未盡輪迴，發心至誠，取阿羅漢，不持此咒，而坐道場，令其身心，遠諸魔事，無有是處。

卯二、開許書帶獲益

阿難！若諸世界，隨所國土，所有眾生，隨國所生，樺皮貝葉，紙素白氎，書寫此咒。貯於香囊，是人心昏，未能誦憶，或帶身上，或書宅中，當知是人。盡其生年，一切諸毒。所不能害。

寅二、詳伸護生助道以出由 分二 卯初、總標二意 二、別列多功 今

初

阿難！我今爲汝，更說此咒，救護世間，得大無畏，成就眾生，出世間智。

卯二、別列多功 分二 辰初、約眾生以顯各益 二、約國土以顯普益

辰初分三 巳初、救護災難 二、助成道業 三、稱遂願求 巳初分二

午初、惡緣不能成害 二、惡生不害加護 今初

若我滅後，末世眾生，有能自誦，若教他誦，當知如是誦持眾生，火不能燒，水不能溺，大毒小毒，所不能害。

午二、惡生不害加護

如是乃至天龍鬼神，精祇魔魅，所有惡咒，皆不能著，心得正受。一切咒咀，厭蠱毒藥，金毒銀毒，草木蟲蛇，萬物毒氣，入此人口，成甘露味。一切惡星，並諸鬼神，殄心毒人，於如是人，不能起惡，頻那夜迦諸惡鬼王，並其眷屬，皆領深恩，常加守護。

巳二、助成道業 分六

午初、資發通明

二、遠離雜趣

三、常生佛前

四、眾行成就

五、諸罪消滅

六、速證無生

今初

阿難當知：是咒常有八萬四千那由他，恆河沙俱胝，金剛藏王菩薩種族，一一皆有諸金剛眾，而為眷屬，晝夜隨侍。設有眾生，於散亂心，非三摩地，心憶口持，是金剛王，常隨從彼諸善男

子，何況決定菩提心者，此諸金剛菩薩藏王，精心陰速，發彼神識。是人應時，心能記憶，八萬四千恆河沙劫。周徧了知，得無疑惑。

午二、遠離雜趣

從第一劫，乃至後身，生生不生，藥叉羅刹，及富單那，迦吒富單那，鳩槃荼，毗舍遮等，並諸餓鬼，有形無形，有想無想，如是惡處。

午三、常生佛前

是善男子，若讀若誦，若書若寫，若帶若藏，諸色供養。劫劫不生，貧窮下賤，不可樂處。此諸眾生，縱其自身，不作福業，十

方如來，所有功德，悉與此人。由是得於恆河沙阿僧祇，不可說不可說劫，常與諸佛同生一處，無量功德，如惡叉聚，同處熏修，永無分散。

午四、眾行成就

是故能令破戒之人，戒根清淨；未得戒者，令其得戒；未精進者，令其精進；無智慧者，令得智慧；不清淨者，速得清淨；不持齋戒，自成齋戒。

午五、諸罪消滅

阿難！是善男子，持此咒時，設犯禁戒，於未受時，持咒之後，眾破戒罪；無問輕重，一時銷滅。縱經飲酒，食噉五辛，種種不

淨，一切諸佛，菩薩金剛，天仙鬼神，不將爲過。設著不淨，破弊衣服，一行一住，悉同清淨。縱不作壇，不入道場，亦不行道，誦持此咒，還同入壇，行道功德，無有異也。若造五逆，無間重罪，及諸比丘、比丘尼，四棄八棄，誦此咒已，如是重業，猶如猛風，吹散沙聚，悉皆滅除，更無毫髮。阿難！若有眾生，從無量無數劫來，所有一切輕重罪障，從前世來，未及懺悔，若能讀誦，書寫此咒，身上帶持，若安住處，莊宅園館，如是積業，猶湯消雪。

午六、速證無生

不久皆得，悟無生忍。

巳三、稱遂願求

復次阿難！若有女人，未生男女，欲求孕者；若能至心，憶念斯咒，或能身上帶此悉怛多般怛囉者，便生福德智慧男女。求長命者，即得長命，欲求果報，速圓滿者，速得圓滿；身命色力，亦復如是。命終之後，隨願往生十方國土，必定不生邊地下賤，何況雜形？

辰二、約國土以顯普益 分三

巳初、諸難消除 二、兆民豐樂 三、惡

星不現 今初

阿難！若諸國土，州縣聚落，飢荒疫癘，或復刀兵，賊難鬪諍，兼餘一切，厄難之地。寫此神咒，安城四門，並諸支提，或脫闍

上，令其國土，所有眾生，奉迎斯咒，禮拜恭敬，一心供養，令其人民，各各身佩，或各各安所居宅地，一切災厄，悉皆銷滅。

巳二、兆民豐樂

阿難！在在處處，國土眾生，隨有此咒，天龍歡喜，風雨順時。五穀豐殷，兆庶安樂。

巳三、惡星不現

亦復能鎮，一切惡星，隨方變怪，災障不起，人無橫夭，杻械枷鎖，不著其身，晝夜安眠，常無惡夢。阿難！是娑婆界，有八萬四千災變惡星，二十八惡星，而爲上首；復有八大惡星，以爲其主。作種種形，出現世時，能生眾生種種災異。有此咒地，悉

皆消滅。十二由旬，成結界地，諸惡災祥，永不能入。

寅三、承明行人必證以結勸 分四 卯初、保護安隱 二、遠離魔冤

三、不犯四過 四、必得心通 今初

是故如來，宣示此咒，於未來世，保護初學，諸修行者，入三摩地，身心泰然，得大安隱。

卯二、遠離魔冤

更無一切，諸魔鬼神，及無始來，冤橫宿殃，舊業陳債，來相惱害。

卯三、不犯四過

汝及眾中，諸有學人，及未來世，諸修行者，依我壇場，如法持

戒，所受戒主，逢清淨僧，持此咒心，不生疑悔。

卯四、必得心通

是善男子，於此父母，所生之身，不得心通，十方如來，便爲妄語。

壬三、會眾願護 分二 癸初、外眾護持 二、內聖護持 癸初分五 子

初、金剛力士眾 二、兩天統尊眾 三、八部統尊眾 四、照臨主宰眾

五、地祇天神眾 今初

說是語已。會中無量百千金剛，一時佛前。合掌頂禮，而白佛言：如佛所說，我當誠心，保護如是修菩提者。

子二、兩天統尊眾

爾時梵王，並天帝釋，四天大王，亦於佛前，同時頂禮，而白佛言：審有如是，修學善人，我當盡心，至誠保護，令其一生，所作如願。

子三、八部統尊眾

復有無量，藥叉大將，諸羅刹王，富單那王，鳩槃荼王，毗舍遮王，頻那夜迦，諸大鬼王，及諸鬼帥，亦於佛前，合掌頂禮，我亦誓願，護持是人，令菩提心，速得圓滿。

子四、照臨主宰眾

復有無量，日月天子、風師、雨師、雲師、雷師、並電伯等，年歲巡官，諸星眷屬，亦於會中，頂禮佛足，而白佛言：我亦保護

是修行人，安立道場，得無所畏。

子五、地祇天神眾

復有無量，山神、海神、一切土地，水、陸、空行，萬物精祇。並風神王，無色界天，於如來前，同時稽首，而白佛言：我亦保護是修行人，得成菩提，永無魔事。

癸二、內聖護持 分二

子初、顯本久護

二、正明護持 今初

爾時，八萬四千那由他、恆河沙俱胝、金剛藏王菩薩。在大會中，即從座起，頂禮佛足，而白佛言：世尊！如我等輩，所修功業，久成菩提，不取涅槃，常隨此咒。救護末世，修三摩地，正修行者。

子二、正明護持

世尊！如是修心，求正定人，若在世道場，及餘經行，乃至散心，遊戲聚落，我等徒眾，常當隨從，侍衛此人。縱令魔王，大自在天，求其方便，終不可得。諸小鬼神，去此善人，十由旬外，除彼發心，樂修禪者。世尊！如是惡魔，若魔眷屬，欲來侵擾，是善人者，我以寶杵，殞碎其首，猶如微塵；恆令此人，所作如願。

己四、說禪那證位，令住圓定，直趣菩提。

庚初、阿難謝教請位 二、如來對示緣起 今初

阿難即從座起，頂禮佛足，而白佛言：我輩愚鈍，好爲多聞，於

諸漏心，未求出離，蒙佛慈誨，得正熏修，身心快然，獲大饒益。世尊！如是修證，佛三摩提，未到涅槃。云何名爲乾慧之地？四十四心，至何漸次，得修行目？詣何方所，名入地中？云何名爲等覺菩薩？作是語已。五體投地，大眾一心，佇佛慈音，瞪瞽瞻仰。

庚二、如來對示緣起

此科即分爲四：辛初、如來許說大眾承聽 二、所依眞如爲諸法源

三、示染緣起徧成輪迴 四、示淨緣起歷成諸位 今初

爾時世尊，讚阿難言：善哉善哉！汝等乃能，普爲大眾，及諸末世，一切眾生，修三摩地，求大乘者，從於凡夫，終大涅槃，懸

示無上正修行路。汝今諦聽，當爲汝說。阿難大眾，合掌剗心，默然受教。

辛二、所依真如為諸法源

佛言：阿難當知，妙性圓明，離諸名相，本來無有，世界、眾生。因妄有生，因生有滅，生滅名妄。滅妄名真，是稱如來，無上菩提，及大涅槃，二轉依號。

辛三、示染緣起徧成輪迴

分二

壬初、勸識二倒 二、別明二倒 今初

阿難！汝今欲修，真三摩地，直詣如來大涅槃者。先當識此眾生、世界，二顛倒因。顛倒不生，斯則如來真三摩地。

壬二、別明二倒

分二

癸初、明眾生顛倒 二、明世界顛倒

癸初分三

子初、從真起妄 二、迷本難復 三、成業感果 今初

阿難！云何名爲眾生顛倒？阿難！由性明心，性明圓故，因明發性，性妄見生，從畢竟無，成究竟有。此有所有，非因所因，住所住相，了無根本。本此無住，建立世界，及諸眾生。

子二、迷本難復

迷本圓明，是生虛妄。妄性無體，非有所依。將欲復真，欲真已非。真真如性，非真求復，宛成非相。

子三、成業感果

非生、非住、非心、非法，展轉發生，生力發明，熏以成業。同業相感，因有感業，相滅相生，由是故有，眾生顛倒。

癸二、明世界顛倒 分三

子初、釋世界之名

二、示熏變之相

三、辨

輪迴之狀 今初

阿難！云何名爲世界顛倒？是有所有，分段妄生，因此界立，非因所因，無住所住，遷流不住，因此世成。三世四方，和合相涉，變化眾生，成十二類。

子二、示熏變之相

是故世界，因動有聲，因聲有色，因色有香，因香有觸，因觸有味，因味知法。六亂妄想，成業性故，十二區分，由此輪轉。是故世間。聲、香、味、觸、窮十二變。爲一旋復。

子三、辨輪迴之狀 分二

丑初、列類生之名

二、示類生之果

今初

乘此輪轉，顛倒相故，是有世界，卵生、胎生、濕生、化生，有色、無色、有想、無想，若非有色、若非無色、若非有想、若非無想。

丑二、示類生之果 分二

寅初、別列類生

二、勒成名數

卯初、卵生

阿難！由因世界，虛妄輪迴，動顛倒故，和合氣成，八萬四千，飛沉亂想。如是故有，卵羯邏藍，流轉國土，魚、鳥、龜、蛇，其類充塞。

卯二、胎生

由因世界，雜染輪迴，欲顛倒故，和合滋成，八萬四千，橫豎亂想。如是故有，胎遏蒲曇，流轉國土，人、畜、龍、仙，其類充

塞。

卯三、濕生

由因世界，執著輪迴，趣顛倒故，和合煖成，八萬四千，翻覆亂想。如是故有，濕相蔽尸，流轉國土，含蠢輒動，其類充塞。

卯四、化生

由因世界，變易輪迴，假顛倒故，和合觸成，八萬四千，新故亂想。如是故有，化相羯南，流轉國土。轉蛻飛行，其類充塞。

卯五、有色

由因世界，留礙輪迴，障顛倒故，和合著成，八萬四千，精耀亂想。如是故有，色相羯南，流轉國土。休咎精明，其類充塞。

卯六、無色

由因世界，銷散輪迴，惑顛倒故，和合暗成，八萬四千，陰隱亂想。如是故有，無色羯南，流轉國土，空散銷沉，其類充塞。

卯七、有想

由因世界，罔象輪迴，影顛倒故，和合憶成，八萬四千，潛結亂想。如是故有，想相羯南，流轉國土，神鬼精靈，其類充塞。

卯八、無想

由因世界，愚鈍輪迴，癡顛倒故，和合頑成，八萬四千，枯槁亂想。如是故有，無想羯南，流轉國土，精神化爲土、木、金、石，其類充塞。

卯九、非有色

由因世界，相待輪迴，僞顛倒故，和合染成，八萬四千，因依亂想。如是故有，非有色相，成色羯南，流轉國土。諸水母等，以蝦爲目，其類充塞。

卯十、非無色

由因世界，相引輪迴，性顛倒故，和合咒成，八萬四千，呼召亂想，由是故有，非無色相，無色羯南，流轉國土，咒咀厭生。其類充塞。

卯十一、非有想

由因世界，合妄輪迴，罔顛倒故，和合異成，八萬四千，迴互亂

想。如是故有，非有想相，成想羯南，流轉國土。彼蒲盧等，異質相成，其類充塞。

卯十二、非無想

由因世界，怨

（平聲）

害輪迴，殺顛倒故，和合怪成，八萬四

千，食父母想。如是故有，非無想相，無想羯南，流轉國土。如土梟等，附塊爲兒，及破鏡鳥，以毒樹果，抱爲其子。子成父母皆遭其食，其類充塞。

寅二、勒成名數

是名眾生，十二種類。

大佛頂如來密因修證了義諸菩薩萬行首楞嚴經  
(卷第八)

辛二、示淨緣起歷成諸位 分四

壬初、正答因果諸位

二、結顯清淨脩

法 三、推重初心勸進 四、判決邪正令解

壬初分十

癸初、漸次三

位 二、乾慧一位 三、十信十位 四、十住十位 五、十行十位

六、十向十位 七、四加四位 八、十地十位 九、等覺一位 十、妙

覺一位 癸初分三

子初、結前開後

二、立位翻染 三、示所立位

今初

阿難！如是眾生，一一類中，亦各各具十二顛倒。猶如捏目，亂

華發生。顛倒妙圓，真淨明心，具足如斯，虛妄亂想。

子二、立位翻染

汝今修證，佛三摩地，於是本因，元所亂想，立三漸次，方得除滅。如淨器中，除去毒蜜，以諸湯水，並雜灰香，洗滌其器，後貯甘露。

子三、示所立位 分二

丑初、徵起列名 二、別釋其相 今初

云何名為三種漸次：一者修習，除其助因；二者真修，剗其正性；三者增進，違其現業。

丑二、別釋其相 分三

卯初、徵名依食斷辛 二、深明食辛過患 三、

結名第一增進 今初

云何助因？阿難！如是世界，十二類生，不能自全，依四食住。所謂：段食、觸食、思食、識食。是故佛說：一切眾生，皆依食住。阿難！一切眾生，食甘故生，食毒故死。是諸眾生，求三摩地，當斷世間，五種辛菜。

卯二、深明食辛過患

是五種辛，熟食發淫，生噉增恚。如是世界，食辛之人，縱能宣說，十二部經。十方天仙，嫌其臭穢，咸皆遠離；諸餓鬼等，因彼食次，舐其唇吻，常與鬼住。福德日消，長無利益。是食辛人，修三摩地，菩薩、天仙、十方善神，不來守護。大力魔王，得其方便，現作佛身，來爲說法，非毀禁戒，讚淫、怒、癡。命

終自爲魔王眷屬，受魔福盡，墮無間獄。

卯三、結名第一增進

阿難！修菩提者，永斷五辛，是則名爲，第一增進，修行漸次。

寅二、剖其正性

分三

卯初、徵名先斷淫殺

二、示以進修餘戒 三、

詳明利益結名 今初

云何正性？阿難！如是眾生，入三摩地，要先嚴持清淨戒律。永斷淫心，不餐酒肉，以火淨食，無噉生氣。阿難！是修行人，若不斷淫，及與殺生，出三界者，無有是處。

卯二、示以進修餘戒

當觀淫欲，猶如毒蛇，如見怨賊，先持聲聞，四棄八棄，執身不

動，後行菩薩清淨律儀，執心不起。

卯三、詳明利益結名

禁戒成就，則於世間，永無相生相殺之業；偷劫不行，無相負累，亦於世間，不還宿債。是清淨人，修三摩地，父母肉身，不須天眼，自然觀見，十方世界，覩佛聞法，親奉聖旨，得大神通，遊十方界，宿命清淨，得無艱險。是則名爲，第二增進，修行漸次。

寅三、達其現業 分三

卯初、徵名承戒修定

二、結解即獲法忍

三、

由漸入頓結名 今初

云何現業？阿難！如是清淨，持禁戒人，心無貪淫，於外六塵，

不多流逸。因不流逸，旋元自歸，塵既不緣，根無所偶，反流全一，六用不行。

卯二、結解即獲法忍

十方國土，皎然清淨，譬如瑠璃，內懸明月。身心快然，妙圓平等，獲大安隱。一切如來，密圓淨妙，皆現其中。是人即獲，無生法忍。從是漸修，隨所發行，安立聖位。

卯三、由漸入頓結名

是則名爲，第三增進，修行漸次。

癸二、乾慧一位

阿難！是善男子，欲愛乾枯，根境不偶，現前殘質，不復續生。

執心虛明，純是智慧，慧性明圓，鑿十方界。乾有其慧，名乾慧地。欲習初乾，未與如來法流水接。

癸三、十信十位 分十

子初、信心住

二、念心住

三、進心住

四、

慧心住

五、定心住

六、不退心住

七、護法心住

八、迴向心住

九、戒心住

十、願心住

今初

即以此心，中中流入，圓妙開敷，從真妙圓，重發真妙，妙信常住，一切妄想，滅盡無餘，中道純真，名信心住。

子二、念心住

真信明了，一切圓通。陰、處、界三，不能爲礙。如是乃至，過去、未來，無數劫中，捨身受身，一切習氣，皆現在前。是善男

子，皆能憶念，得無遺忘，名念心住。

子三、進心住

妙圓純真，真精發化，無始習氣，通一精明，惟以精明，進趣真淨，名精進心。

子四、慧心住

心精現前，純以智慧，名慧心住。

子五、定心住

執持智明，周徧寂湛，寂妙常凝，名定心住。

子六、不退心住

定光發明，明性深入，惟進無退，名不退心。

子七、護法心住

心進安然，保持不失，十方如來，氣分交接，名護法心。

子八、迴向心住

覺明保持，能以妙力，回佛慈光，向佛安住，猶如雙鏡，光明相對，其中妙影，重重相入，名迴向心。

子九、戒心住

心光密迴，獲佛常凝，無上妙淨，安住無爲，得無遺失，名戒心住。

子十、願心住

住戒自在，能遊十方，所去隨願，名願心住。

癸四、十住十位 分十

子初、發心住

二、治地住

三、修行住

四、

生貴住

五、具足住

六、正心住

七、不退住

八、童真住

九、王

子住

十、灌頂住

今初

阿難！是善男子，以真方便，發此十心，心精發揮，十用涉入，圓成一心，名發心住。

子二、治地住

心中發明，如淨瑠璃，內現精金。以前妙心，履以成地，名治地住。

子三、修行住

心地涉知，俱得明了，遊履十方，得無留礙，名修行住。

子四、生貴住

行與佛同，受佛氣分，如中陰身，自求父母，陰信冥通，入如來種，名生貴住。

子五、具足住

既遊道胎，親奉覺胤，如胎已成，人相不缺，名方便具足住。

子六、正心住

容貌如佛，心相亦同，名正心住。

子七、不退住

身心合成，日益增長，名不退住。

子八、童真住

十身靈相，一時具足，名童真住。

子九、王子住

形成出胎，親爲佛子，名法王子住。

子十、灌頂住

表以成人，如國大王，以諸國事，分委太子。彼剎利王，世子長成，陳列灌頂，名灌頂住。

癸五、十行十位

分十

子初、歡喜行

二、饒益行

三、無瞋行

四、

無盡行

五、雜亂行

六、善現行

七、無著行

八、尊重行

九、善

法行

十、真實行

今初

阿難！是善男子，成佛子已，具足無量，如來妙德，十方隨順，

名歡喜行。

子二、饒益行

善能利益，一切眾生，名饒益行。

子三、無瞋行

自覺覺他，得無違拒，名無瞋恨行。

子四、無盡行

種類出生，窮未來際，三世平等，十方通達，名無盡行。

子五、雜亂行

一切合同，種種法門，得無差誤，名離癡亂行。

子六、善現行

則於同中，顯現群異，一一異相，各各見同，名善現行。

子七、無著行

如是乃至十方虛空，滿足微塵，一一塵中，現十方界。現塵現界，不相留礙，名無著行。

子八、尊重行

種種現前，咸是第一波羅密多，名尊重行。

子九、善法行

如是圓融，能成十方，諸佛軌則，名善法行。

子十、真實行

一一皆是，清淨無漏。一真無爲，性本然故，名真實行。

癸六、回向十位 分十 子初、離相回向 二、不壞回向 三、等佛回向

四、至處回向 五、無盡回向 六、平等回向 七、等觀回向 八、真

如回向 九、解脫回向 十、無量回向 今初

阿難！是善男子，滿足神通，成佛事已，純潔精真，遠諸留患。

當度眾生，滅除度相，回無爲心，向涅槃路。名救一切眾生，離  
眾生相回向。

子二、不壞回向

壞其可壞，遠離諸離，名不壞回向。

子三、等佛回向

本覺湛然，覺齊佛覺，名等一切佛回向。

子四、至處回向

精真發明，地如佛地，名至一切處回向。

子五、無盡回向

世界如來，互相涉入，得無罣礙，名無盡功德藏回向。

子六、平等回向

於同佛地，地中各各，生清淨因，依因發輝，取涅槃道。名隨順平等善根回向。

子七、等觀回向

真根既成，十方眾生，皆我本性。性圓成就，不失眾生。名隨順等觀，一切眾生回向。

子八、真如回向

即一切法，離一切相。惟即與離，二無所著，名真相回向。

子九、解脫回向

真得所如，十方無礙，名無縛解脫回向。

子十、無量回向

性德圓成，法界量滅，名法界無量回向。

癸七、加行四位 分二  
子初、結前起後 二、別明四位 今初

阿難！是善男子，盡是清淨，四十一心。次成四種，妙圓加行。

子二、別明四位 分四  
丑初、煖地一位 二、頂地一位 三、忍地一位

四、世第一位 今初

即以佛覺，用爲己心，若出未出。猶如鑽火，欲然其木，名爲煖地。

丑二、頂地一位

又以己心，成佛所履，若依非依。如登高山，身入虛空，下有微礙，名爲頂地。

丑三、忍地一位

心佛二同，善得中道，如忍事人，非懷非出，名爲忍地。

丑四、世第一位

數量銷滅，迷、覺中道，二無所目，名世第一地。

癸八、地上十位

分十

子初、歡喜地

二、離垢地

三、發光地

四、

燄慧地 五、難勝地 六、現前地 七、遠行地 八、不動地 九、善

慧地 十、法雲地 今初

阿難！是善男子，於大菩提，善得通達，覺通如來，盡佛境界，名歡喜地。

子二、離垢地

異性入同，同性亦滅，名離垢地。

子三、發光地

淨極明生，名發光地。

子四、燄慧地

明極覺滿，名燄慧地。

子五、難勝地

一切同異，所不能至，名難勝地。

子六、現前地

無爲真如，性淨明露，名現前地。

子七、遠行地

盡真如際，名遠行地。

子八、不動地

一真如心，名不動地。

子九、善慧地

發真如用，名善慧地。阿難！是諸菩薩，從此已往，修習畢功，

功德圓滿，亦目此地，名修習位。

子十、法雲地

慈陰妙雲，覆涅槃海，名法雲地。

癸九、等覺一位 分二  
子初、正明本位 二、出所得慧 今初

如來逆流，如是菩薩，順行而至，覺際入交，名爲等覺。

子二、出所得慧

阿難！從乾慧心，至等覺已，是覺始獲，金剛心中，初乾慧地。

癸十、妙覺一位

如是重重，單複十二，方盡妙覺，成無上道。

壬二、結顯清淨脩法

是種種地，皆以金剛觀察，如幻十種深喻，奢摩他中，用諸如來，毗婆舍那，清淨修證，漸次深入。

壬三、推重初心勸進

阿難！如是皆以三增進故，善能成就，五十五位，真菩提路。

壬四、判決邪正令辨

作是觀者，名爲正觀；若他觀者，名爲邪觀。

戊二、通示全經名目 分二

己初、文殊請問經名 二、如來備說五名

今初

爾時，文殊師利法王子，在大眾中，即從座起，頂禮佛足，而白佛言：當何名是經？我及眾生，云何奉持？

己二、如來備說五名 分六

庚初、境智

二、機益

三、性修

四、要

妙 五、因果 六、總答 今初

佛告文殊師利：是經名大佛頂，悉怛多，般怛囉。無上寶印，十方如來，清淨海眼。

庚二、機益

亦名救護親因，度脫阿難，及此會中，性比丘尼，得菩提心，入徧知海。

庚三、性修

亦名如來密因，修證了義。

庚四、要妙

亦名大方廣，妙蓮華王。十方佛母，陀羅尼咒。

庚五、因果

亦名灌頂章句，諸菩薩萬行，首楞嚴。

庚六、總答

汝當奉持。

丁三、當機獲益 分三

戊初、敘述所聞

二、頓悟禪那

三、漸證二果

今初

說是語已。即時阿難，及諸大眾，得蒙如來，開示密印，般怛囉義，兼聞此經，了義名目。

戊二、頓悟禪那

頓悟禪那，修進聖位，增上妙理，心慮虛凝。

戊三、漸證二果

斷除三界，修心六品，微細煩惱。

丙二、助道別詳護定要法 分二

丁初、談七趣勸離以警淹留 二、辨五

魔令識以護墮落

丁初分二

戊初、阿難請問 二、如來詳答

戊初分

三

己初、謝前述益 二、總問諸趣 三、別舉地獄 今初

即從座起，頂禮佛足。合掌恭敬，而白佛言：大威德世尊，慈音無遮，善開眾生，微細沉惑，令我今日，身心快然，得大饒益！

己二、總問諸趣

世尊！若此妙明，真淨妙心，本來徧圓，如是乃至，大地草木，

顛動含靈，本元真如，即是如來，成佛真體。佛體真實！云何復有：地獄、餓鬼、畜生、脩羅、人、天等道？世尊！此道爲復本來自有？爲是眾生妄習生起？

己三、別舉地獄

世尊！如寶蓮香比丘尼，持菩薩戒，私行淫欲，妄言行淫，非殺非偷，無有業報。發是語已，先於女根，生大猛火，後於節節，猛火燒然，墮無間獄。瑠璃大王，善星比丘，瑠璃爲誅瞿曇族姓；善星妄說一切法空；生身陷入，阿鼻地獄。此諸地獄，爲有定處？爲復自然，彼彼發業，各各私受？惟垂大慈，開發童蒙，令諸一切持戒眾生，聞決定義，歡喜頂戴，謹潔無犯。

戊二、如來詳答 分四

己初、讚歎許說 二、備明諸趣 三、結妄勸離

四、判決邪正 今初。

佛告阿難：快哉此問！令諸眾生，不入邪見。汝今諦聽，當爲汝說。

己二、備明諸趣 分二

庚初、略示情想為升墜根由 二、詳示墜升有因

果差別 庚初分三

辛初、約積習分判情想 二、約臨終別示升墜

三、結有處以顯別同

辛初分二 壬初、依真起妄分內外 二、釋成墜

升由情想 今初

阿難！一切眾生，實本真淨，因彼妄見，有妄習生，因此分開，內分外分。

壬二、釋成墜升由情想 分二

癸初、內分屬情故墜 二、外分屬想故升

今初

阿難！內分即是眾生分內，因諸愛染，發起妄情，情積不休，能生愛水。是故眾生，心憶珍羞，口中水出；心憶前人，或憐或恨，目中淚盈；貪求財寶，心發愛涎，舉體光潤；心著行淫，男女二根，自然流液。阿難！諸愛雖別，流結是同，潤濕不升，自然從墜，此名內分。

癸二、外分屬想故升

阿難！外分即是眾生分外，因諸渴仰，發明虛想，想積不休，能生勝氣。是故眾生，心持禁戒，舉身輕清；心持咒印，顧盼雄

毅；心欲生天，夢想飛舉；心存佛國，聖境冥現；事善知識，自輕身命。阿難！諸想雖別，輕舉是同，飛動不沉，自然超越，此名外分。

辛二、約臨終別示升墜分二

壬初、臨終相現

二、升墜分量

今初

阿難！一切世間，生死相續，生從順習，死從變流，臨命終時，未捨煖觸，一生善惡，俱時頓現，死逆生順，二習相交。

壬二、升墜分量分三

癸初、升而不墜

二、不升不墜

三、墜而不升

今初

純想即飛，必生天上；若飛心中，兼福兼慧，及與淨願，自然心開，見十方佛，一切淨土，隨願往生。情少想多，輕舉非遠，即

爲飛仙，大力鬼王，飛行夜叉，地行羅刹，遊於四天，所去無礙。其中若有善願善心，護持我法，或護禁戒，隨持戒人，或護神咒，隨持咒者，或護禪定，保綏法忍，是等親住，如來座下。

癸二、不升不墜

情想均等，不飛不墜，生於人間，想明斯聰，情幽斯鈍。

癸三、墜而不升

情多想少，流入橫生，重爲毛群，輕爲羽族。七情三想，沉下水輪，生於火際，受氣猛火，身爲餓鬼，常被焚燒。水能害己，無食無飲，經百千劫。九情一想，下洞火輪，身入風火，二交過地，輕生有間，重生無間，二種地獄。純情即沉，入阿鼻地獄。

若沉心中，有謗大乘，毀佛禁戒，誑妄說法，虛貪信施，濫膺恭敬，五逆十重，更生十方，阿鼻地獄。

辛三、結有處以顯別同

循造惡業，雖則自招，眾同分中，兼有元地。

庚二、詳示墜升有因果差別 分七

辛初、地獄趣 至七修羅趣

辛初分四

壬初、躡前標後 二、徵釋十因 三、徵釋六報 四、總示虛妄 今

初

阿難！此等皆是，彼諸眾生，自業所感，造十習因，受六交報。

壬二、徵釋十因 分十

癸初、淫習 二、貪習 三、慢習 四、瞋習

五、詐習 六、誑習 七、怨習 八、見習 九、枉習 十、訟習 今

初

云何十因？阿難！一者淫習交接，發於相磨，研磨不休，如是故有大猛火光，於中發動。如人以手，自相摩觸，煖相現前。二習相然，故有鐵床、銅柱諸事。是故十方，一切如來，色目行淫，同名欲火。菩薩見欲，如避火坑！

癸二、貪習

二者，貪習交計，發於相吸，吸攬不止，如是故有，積寒堅冰，於中凍冽。如人以口，吸縮風氣，有冷觸生。二習相陵，故有吒吒、波波、羅羅、青赤白蓮、寒冰等事。是故十方，一切如來，色目多求，同名貪水。菩薩見貪，如避瘴海！

癸三、慢習

三者，慢習交陵，發於相恃，馳流不息。如是故有，騰逸奔波。積波爲水，如人口舌，自相綿味，因而水發。二習相鼓，故有血河、灰河、熱砂、毒海、融銅、灌吞諸事。是故十方，一切如來，色目我慢，名飲癡水。菩薩見慢，如避巨溺！

癸四、瞋習

四者，瞋習交衝，發於相忤。忤結不息，心熱發火，鑄氣爲金。如是故有：刀山、鐵檝、劍樹、劍輪、斧、鉞、鎗、鋸。如人銜冤，殺氣飛動。二習相擊，故有宮割、斬斫、剉、刺、槌、擊諸事。是故十方，一切如來，色目瞋恚，名利刀劍。菩薩見瞋，如

避誅戮！

癸五、詐習

五者，詐習交誘，發於相調，引起不住，如是故有，繩木絞校。如水浸田，草木生長。二習相延，故有杻、械、枷、鎖、鞭、杖、撻、棒，諸事。是故十方，一切如來，色目奸偽，同名讒賊。菩薩見詐，如畏豺狼！

癸六、誑習

六者，誑習交欺，發於相罔，誣罔不止，飛心造姦。如是故有，塵土、屎、尿、穢污不淨。如塵隨風，各無所見。二習相加，故有沒溺騰擲，飛墮、漂淪諸事。是故十方，一切如來，色目欺

誑，同名劫殺。菩薩見誑，如踐蛇虺！

癸七、怨習

七者，怨（音冤）習交嫌，發於銜恨。如是故有，飛石投礮。匣

貯車檻，甕盛囊撲。如陰毒人，懷抱畜惡。二習相吞，故有投擲，擒捉、擊射、拋撮諸事。是故十方，一切如來，色目怨家，名違害鬼，菩薩見怨，如飲鴆酒！

癸八、見習

八者，見習交明，如薩迦耶，見戒禁取，邪悟諸業，發於違拒，出生相反。如是故有，王使主吏，證執文籍。如行路人，來往相見。二習相交，故有勘問，權詐考訊，推鞠察訪，披究照明，善

惡童子，手執文簿，辭辯諸事。是故十方，一切如來，色目惡見，同名見坑。菩薩見諸虛妄偏執，如臨毒壑！

癸九、枉習

九者，枉習交加，發於誣謗，如是故有，合山合石，碾磴耕磨。如讒賊人，逼枉良善。二習相排，故有押捺槌按，蹙漉衡度諸事。是故十方，一切如來，色目怨謗，同名讒虎。菩薩見枉，如遭霹靂！

癸十、訟習

十者，訟習交誼，發於藏覆，如是故有，鑑見照燭。如於日中，不能藏影。二習相陳，故有惡友，業鏡火珠，披露宿業，對驗諸

事。是故十方，一切如來，色目覆藏，同名陰賊。菩薩觀覆，如戴高山，履於巨海！

壬三、徵釋六報 分二

癸初、總徵略釋

二、躡徵詳釋

今初

云何六報？阿難！一切眾生，六識造業，所招惡報，從六根出。

癸二、躡徵詳釋 分六

子初、見報

二、聞報

三、嗅報

四、味報

五、觸報 六、思報

子初分三

丑初、臨終見墜

二、本根發相

三、正詳交報 今初

云何惡報從六根出？一者見報，招引惡果：此見業交，則臨終時，先見猛火，滿十方界，亡者神識，飛墜乘煙，入無間獄。

丑二、本根發相

發明二相：一者明見，則能徧見，種種惡物，生無量畏；二者暗見，寂然不見，生無量恐。

丑三、正詳交報

如是見火，燒聽：能爲鑊湯、洋銅；燒息：能爲黑煙、紫燄；燒味：能爲焦丸、鐵糜；燒觸：能爲熱灰、爐炭；燒心：能生星火、迸灑、煽鼓空界。

子二、聞報 分三 丑初、臨終見墜 二、本根發相 三、正詳交報 今

初

二者聞報，招引惡果：此聞業交，則臨終時，先見波濤，沒溺天地，亡者神識，降注乘流，入無間獄。

丑二、本根發相

發明二相：一者開聽，聽種種鬧，精神愁亂；二者閉聽，寂無所聞，幽魄沉沒。

丑三、正詳交報

如是聞波，注聞：則能爲責、爲詰；注見：則能爲雷、爲吼、爲惡毒氣；注息：則能爲雨、爲霧，灑諸毒蟲，周滿身體；注味：則能爲膿、爲血、種種雜穢；注觸：則能爲畜、爲鬼、爲糞、爲尿；注意：則能爲電、爲雹、摧碎心魄。

子三、麤報 分三

丑初、臨終見墜

二、本根發相

三、正詳交報

今

初

三者齟報，招引惡果：此齟業交，則臨終時，先見毒氣，充塞遠近，亡者神識，從地湧出，入無間獄。

丑二、本根發相

發明二相：一者通聞，被諸惡氣，熏極心擾；二者塞聞，氣掩不通，悶絕於地。

丑三、正詳交報

如是齟氣，衝息：則能爲質、爲履；衝見：則能爲火，爲炬；衝聽：則能爲沒、爲溺、爲洋、爲沸；衝味：則能爲餒、爲爽；衝觸：則能爲綻、爲爛、爲大肉山、有百千眼，無量啞食；衝思：則能爲灰、爲瘴，爲飛沙礫，擊碎身體。

子四、味報 分三

丑初、臨終見墜

二、本根發相

三、正詳交報

今

初

四者味報，招引惡果：此味業交，則臨終時，先見鐵網，猛燄熾烈，周覆世界，亡者神識，下透掛網，倒懸其頭，入無間獄。

丑二、本根發相

發明二相：一者吸氣，結成寒冰，凍冽肉身；二者吐氣，飛爲猛火，焦爛骨髓。

丑三、正詳交報

如是嘗味，歷嘗：則能爲承、爲忍；歷見：則能爲然金石；歷聽：則能爲利兵刃；歷息：則能爲大鐵籠，彌覆國土；歷觸：則

能爲弓、爲箭、爲弩、爲射；歷思：則能爲飛熱鐵，從空雨下。

子五、觸報 分三

丑初、臨終見墜

二、本根發相

三、正詳交報

今

初

五者觸報，招引惡果：此觸業交，則臨終時，先見大山，四面來合，無復出路。亡者神識，見大鐵城，火蛇、火狗、虎、狼、獅子。牛頭獄卒，馬頭羅刹，手執鎗稍，驅入城門，向無間獄。

丑二、本根發相

發明二相：一者合觸，合山逼體，骨肉血潰；二者離觸，刀劍觸身，心肝屠裂。

丑三、正詳交報

如是合觸，歷觸：則能爲道、爲觀、爲廳、爲案（疑是錯簡，應

是爲撞爲擊、爲刺爲射）

；歷見：則能爲燒、爲熱；歷聽：則能

爲撞、爲擊、爲刺、爲射

（疑是與上互錯，應換爲道、爲觀、爲

廳、爲案）

。歷息：則能爲括、爲袋、爲考、爲縛；歷嘗：則能

爲耕、爲鉗、爲斬、爲截；歷思：則能爲墜、爲飛、爲煎、爲炙。

子六、思報 分三

丑初、臨終見墜

二、本根發相

三、正詳交報

今

初

六者思報，招引惡果：此思業交，則臨終時，先見惡風，吹壞國土。亡者神識，被吹上空，旋落乘風，墜無間獄。

丑二、本根發相

發明二相：一者不覺，迷極則荒，奔赴不息；二者不迷，覺知則苦，無量煎燒，痛深難忍。

丑三、正詳交報

如是邪思，結思：則能爲方、爲所；結見：則能爲鑑、爲證；結聽：則能爲大合石、爲冰、爲霜、爲土、爲霧；結息：則能爲大火車、火船、火檻；結嘗：則能爲大叫喚、爲悔、爲泣；結觸：則能爲大、爲小，爲一日中，萬生萬死，爲偃、爲仰。

壬四、總示虛妄

分三

癸初、總結妄造

二、分別輕重

三、重明妄發

今初

阿難！是名地獄，十因六果，皆是眾生，迷妄所造。

癸二、分別輕重

若諸眾生，惡業同造，入阿鼻獄，受無量苦，經無量劫。六根各造，及彼所作，兼境兼根，是人則入八無間獄。身、口、意三作殺、盜、淫。是人則入十八地獄。三業不兼，中間或爲一殺一盜，是人則入三十六地獄。見見一根，單犯一業，是人則入，一百八地獄。

癸三、重明妄發

由是眾生，別作別造，於世界中，入同分地，妄想發生，非本來有。

辛二、諸鬼趣 分三 壬初、躡前起後 二、詳列十類 三、推本顯妄

今初

復次，阿難！是諸眾生，非破律儀，犯菩薩戒，毀佛涅槃，諸餘雜業，歷劫燒然，後還罪畢，受諸鬼形。

壬二、詳列十類 分十 癸初、貪習物怪之鬼 二、淫習風魅之鬼 三、

誑習畜魅之鬼 四、瞋習蠱毒之鬼 五、怨習疫癘之鬼 六、慢習氣餓

之鬼 七、枉習幽魔之鬼 八、見習魍魎之鬼 九、詐習役使之鬼

十、訟習傳送之鬼 今初

若於本因，貪物爲罪，是人罪畢，遇物成形，名爲怪鬼。

癸二、淫習風魅之鬼

貪色爲罪，是人罪畢，遇風成形，名爲魃鬼。

癸三、誑習畜魅之鬼

貪惑爲罪，是人罪畢，遇畜成形，名爲魅鬼。

癸四、瞋習蠱毒之鬼

貪恨爲罪，是人罪畢，遇蟲成形，名蠱毒鬼。

癸五、怨習疫癘之鬼

貪憶爲罪，是人罪畢，遇衰成形，名爲癘鬼。

癸六、慢習氣餓之鬼

貪傲爲罪，是人罪畢，遇氣成形，名爲餓鬼。

癸七、枉習幽魔之鬼

貪罔爲罪，是人罪畢，遇幽爲形，名爲魘鬼。

癸八、見習魍魎之鬼

貪明爲罪，是人罪畢，遇精成形，名魍魎鬼。

癸九、詐習役使之鬼

貪成爲罪，是人罪畢，遇明爲形，名役使鬼。

癸十、訟習傳送之鬼

貪黨爲罪，是人罪畢，遇人爲形，名傳送鬼。

壬三、推本顯妄

阿難！是人皆以純情墜落，業火燒乾，上出爲鬼。此等皆是自妄想業之所招引，若悟菩提，則妙圓明，本無所有。

辛三、畜生趣 分四 壬初、躡前起後 二、詳列十類 三、推本顯妄

四、重答前問 今初

復次，阿難！鬼業既盡，則情與想，二俱成空，方於世間，與元負人，冤對相值，身爲畜生，酬其宿債。

壬二、詳列十類 分十 癸初、梟類 二、咎類 三、狐類 四、毒類

五、蚶類 六、食類 七、服類 八、應類 九、休類 十、循類 今

初

物怪之鬼，物銷報盡，生於世間，多爲梟類。

癸二、咎類

風魃之鬼，風銷報盡，生於世間，多爲咎徵，一切異類。

癸三、狐類

畜魅之鬼，畜死報盡，生於世間，多爲狐類。

癸四、毒類

蟲蠱之鬼，蠱滅報盡，生於世間，多爲毒類。

癸五、蛔類

衰癘之鬼，衰窮報盡，生於世間，多爲蛔類。

癸六、食類

受氣之鬼，氣銷報盡，生於世間，多爲食類。

癸七、服類

綿幽之鬼，幽銷報盡，生於世間，多爲服類。

癸八、應類

和精之鬼，和銷報盡，生於世間，多爲應類。

癸九、休類

明靈之鬼，明滅報盡，生於世間，多爲休徵，一切諸類。

癸十、循類

依人之鬼，人亡報盡，生於世間，多爲循類。

壬三、推本顯妄

阿難！是等皆以業火乾枯，酬其宿債，旁爲畜生。此等亦皆自虛妄業之所招引，若悟菩提，則此妄緣，本無所有。

壬四、重答前問

如汝所言：寶蓮香等，及瑠璃王，善星比丘，如是惡業，本自發明，非從天降，亦非地出，亦非人與。自妄所招，還自來受。菩提心中，皆爲浮虛，妄想凝結。

辛四、諸人趣分三 壬初、躡前警起 二、詳列十類 三、結嘆可憐

壬初分二

癸初、負債反復徵償 二、負命殺食不已 今初

復次，阿難！從是畜生，酬償先債，若彼酬者，分越所酬，此等眾生，還復爲人，反徵其剩。如彼有力，兼有福德，則於人中，不捨人身，酬還彼力，若無福者，還爲畜生，償彼餘直。

癸二、負命殺食不已

阿難當知：若用錢物，或役其力，償足自停。如其中間，殺彼身

命，或食其肉，如是乃至，經微塵劫，相食相誅，猶如轉輪，互爲高下，無有休息。除奢摩他，及佛出世，不可停寢。

壬二、詳列十類

分十

癸初、頑類

二、異類

三、庸類

四、狠類

五、微類 六、柔類 七、勞類 八、文類 九、明類 十、達類 今初

汝今應知：彼梟倫者，酬足復形，生人道中，參合頑類。

癸二、異類

彼咎徵者，酬足復形，生人道中，參合異類。

癸三、庸類

彼狐倫者，酬足復形，生人道中，參於庸類。

癸四、狠類

彼毒倫者，酬足復形，生人道中，參合狠類。

癸五、微類

彼蛔倫者，酬足復形，生人道中，參合微類。

癸六、柔類

彼食倫者，酬足復形，生人道中，參合柔類。

癸七、勞類

彼服倫者，酬足復形，生人道中，參合勞類。

癸八、文類

彼應倫者，酬足復形，生人道中，參於文類。

癸九、明類

彼休徵者，酬足復形，生人道中，參合明類。

癸十、達類

彼諸循倫，酬足復形，生人道中，參於達類。

壬三、結嘆可憐

阿難！是等皆以宿債酬畢，復形人道，皆無始來，業計顛倒，相生相殺，不遇如來，不聞正法，於塵勞中，法爾輪轉，此輩名爲，可憐愍者。

辛五、諸仙趣 分三

壬初、結前標後 二、正列諸仙 三、判同輪迴

今初

阿難！復有從人，不依正覺，修三摩地，別修妄念，存想固形，遊於山林，人不及處，有十種仙。

壬二、正列諸仙 分十 癸初、地行仙 二、飛行仙 三、遊行仙

四、空行仙 五、天行仙 六、通行仙 七、道行仙 八、照行仙

九、精行仙 十、絕行仙 今初

阿難！彼諸眾生，堅固服餌，而不休息，食道圓成，名地行仙。

癸二、飛行仙

堅固草木，而不休息，藥道圓成，名飛行仙。

癸三、遊行仙

堅固金石，而不休息，化道圓成，名遊行仙。

癸四、空行仙

堅固動止，而不休息，氣精圓成，名空行仙。

癸五、天行仙

堅固津液，而不休息，潤德圓成，名天行仙。

癸六、通行仙

堅固精色，而不休息，吸粹圓成，名通行仙。

癸七、道行仙

堅固咒禁，而不休息，術法圓成，名道行仙。

癸八、照行仙

堅固思念，而不休息，思憶圓成，名照行仙。

癸九、精行仙

堅固交遘，而不休息，感應圓成，名精行仙。

癸十、絕行仙

堅固變化，而不休息，覺悟圓成，名絕行仙。

壬三、判同輪迴

阿難！是等皆於人中練心，不修正覺，別得生理，壽千萬歲，休止深山，或大海島，絕於人境，斯亦輪迴，妄想流轉。不修三昧，報盡還來，散入諸趣。

辛六、諸天趣 分二

壬初、正列諸天

二、通前總結

壬初分三

癸

初、六欲 二、四禪

三、四空

癸初分三

子初、標示生因 二、欲

分輕重三、判屬欲界 今初

阿難！諸世間人，不求常住，未能捨諸妻妾恩愛。

子二、欲分輕重

分六

丑初、四王天

二、忉利天

三、夜摩天

四、

兜率天

五、化樂天

六、他化天

今初

於邪淫中，心不流逸，澄瑩生明，命終之後，鄰於日月。如是一類，名四王天。

丑二、忉利天

於己妻房，淫愛微薄，於淨居時，不得全味，命終之後，超日月明，居人間頂，如是一類，名忉利天。

丑三、夜摩天

逢欲暫交，去無思憶，於人間世，動少靜多，命終之後，於虛空中，朗然安住，日月光明，上照不及，是諸人等，自有光明，如是一類，名須燄摩天。

丑四、兜率天

一切時靜，有應觸來，未能違戾，命終之後；上升精微，不接下界，諸人天境，乃至劫壞，三災不及，如是一類，名兜率天。

丑五、化樂天

我無欲心，應汝行事，於橫陳時，味如嚼蠟，命終之後，生越化地，如是一類，名樂變化天。

丑六、他化天

無世間心，同世行事，於行事交，了然超越，命終之後，徧能出超，化無化境，如是一類，名他化自在天。

子三、判屬欲界

阿難！如是六天，形雖出動，心迹尚交，自此已還，名爲欲界。

三九八

首楞嚴經卷第八

大佛頂如來密因修證了義諸菩薩萬行首楞嚴經  
(卷第九)

癸二、四禪天 分二 子初、正分四禪 二、結屬色界 子初分四 丑

初、初禪天 二、二禪天 三、三禪天 四、四禪天 丑初分二 寅

初、示三天別相 二、結離漏伏 寅初分三 卯初、梵眾天 二、梵輔

天 三、大梵天 今初

阿難！世間一切，所修心人，不假禪那，無有智慧。但能執身，不行淫欲，若行若坐，想念俱無，愛染不生，無留欲界；是人應念，身為梵侶。如是一類，名梵眾天。

卯二、梵輔天

欲習既除，離欲心現，於諸律儀，愛樂隨順，是人應時，能行梵德，如是一類，名梵輔天。

卯三、大梵天

身心妙圓，威儀不缺，清淨禁戒，加以明悟，是人應時，能統梵眾，爲大梵王。如是一類，名大梵天。

寅二、結苦離漏伏

阿難！此三勝流，一切苦惱，所不能逼，雖非正修，真三摩地。清淨心中，諸漏不動，名爲初禪。

丑二、二禪天 分二

寅初、示三天別相

二、結憂離漏伏

寅初分三

卯初、少光天 二、無量光天 三、光音天 今初

阿難！其次梵天，統攝梵人，圓滿梵行，澄心不動，寂湛生光。如是一類，名少光天。

卯二、無量光天

光光相然，照耀無盡，映十方界，徧成瑠璃。如是一類，名無量光天。

卯三、光音天

吸持圓光，成就教體，發化清淨，應用無盡。如是一類，名光音天。

寅二、結憂離漏伏

阿難！此三勝流，一切憂懸，所不能逼，雖非正修，真三摩地。清淨心中，麤漏已伏，名爲二禪。

丑三、三禪天 分二

寅初、示三天別相 二、結安隱喜俱

寅初分三

卯初、少淨天 二、無量淨天 三、徧淨天 今初

阿難！如是天人，圓光成音，披音露妙，發成精行，通寂滅樂。如是一類，名少淨天。

卯二、無量淨天

淨空現前，引發無際，身心輕安，成寂滅樂。如是一類，名無量淨天。

卯三、徧淨天

世界身心，一切圓淨，淨德成就，勝託現前，歸寂滅樂。如是一類，名徧淨天。

寅二、結安隱喜俱

阿難！此三勝流，具大隨順，身心安隱，得無量樂，雖非正得，真三摩地。安隱心中，歡喜畢具，名爲三禪。

丑四、四禪天 分二

寅初、四勝流天 二、五不還天

寅初分二

卯

初、示四天別相 二、結不動純熟

卯初分四

辰初、福生天 二、福

愛天 三、廣果天 四、無想天 今初

阿難！復次天人，不逼身心，苦因已盡，樂非常住，久必壞生。苦樂二心，俱時頓捨，麤重相滅，淨福性生。如是一類，名福生

天。

辰二、福愛天

捨心圓融，勝解清淨，福無遮中，得妙隨順，窮未來際。如是一類，名福愛天。

辰三、廣果天

阿難！從是天中，有二歧路，若於先心，無量淨光，福德圓明，修證而住。如是一類，名廣果天。

辰四、無想天

若於先心，雙厭苦樂，精研捨心，相續不斷，圓窮捨道，身心俱滅，心慮灰凝，經五百劫。是人既以生滅爲因，不能發明，不生

滅性，初半劫滅，後半劫生。如是一類，名無想天。

卯二、結不動純熟

阿難！此四勝流，一切世間，諸苦樂境，所不能動。雖非無爲，真不動地，有所得心，功用純熟，名爲四禪。

寅二、五不還天 分三

卯初、標聖果寄居 二、示五天別相 三、結

四天不見 今初

阿難！此中復有，五不還天，於下界中，九品習氣，俱時滅盡，苦樂雙亡，下無卜居，故於捨心，眾同分中，安立居處。

卯二、五天別相 分五

辰初、無煩天 二、無熱天 三、善見天 四、

善現天 五、色究竟天 今初

阿難！苦樂兩滅，鬥心不交，如是一類，名無煩天。

辰二、無熱天

機括獨行，研交無地，如是一類，名無熱天。

辰三、善見天

十方世界，妙見圓澄，更無塵象，一切沉垢。如是一類，名善見天。

辰四、善現天

精見現前，陶鑄無礙。如是一類，名善現天。

辰五、色究竟天

究竟群幾，窮色性性，入無邊際。如是一類，名色究竟天。

卯三、結四天不見

阿難！此不還天，彼諸四禪，四位天王，獨有欽聞，不能知見。如今世間，曠野深山，聖道場地，皆阿羅漢，所住持故，世間麤人，所不能見。

子二、結屬色界

阿難！是十八天，獨行無交，未盡形累，自此已還，名爲色界。

癸三、四空 分五

子初、標歧除聖 二、正列四天 三、聖凡出墜

四、通分凡聖 五、結屬無色 今初

復次，阿難！從是有頂，色邊際中，其間復有，二種歧路，若於捨心，發明智慧，慧光圓通，便出塵界，成阿羅漢，入菩薩乘。

如是一類，名爲迴心大阿羅漢。

子二、正列四天 分四 丑初、空無邊處天 二、識無邊處天 三、無所

有處天 四、非非想處天 今初

若在捨心，捨厭成就，覺身爲礙，銷礙入空。如是一類。名爲空處。

丑二、識無邊處天

諸礙既銷，無礙無滅，其中惟留阿賴耶識，全於末那，半分微細。如是一類，名爲識處。

丑三、無所有處天

空色既亡，識心都滅，十方寂然，迴無攸往。如是一類，名無所

有處。

丑四、非非想處天

識性不動，以滅窮研，於無盡中，發宣盡性，如存不存，若盡非盡。如是一類，名爲非想，非非想處。

子三、聖凡出墜

此等窮空，不盡空理，從不還天，聖道窮者。如是一類，名不迴心，鈍阿羅漢。若從無想，諸外道天，窮空不歸，迷漏無聞，便入輪轉。

子四、通分凡聖

阿難！是諸天上，各各天人，則是凡夫，業果酬答，答盡入輪。

彼之天王，即是菩薩，遊三摩地，漸次增進，回向聖倫，所修行路。

子五、結屬無色

阿難！是四空天，身心滅盡，定性現前，無業果色，從此逮終，名無色界。

壬二、通前總結

此皆不了，妙覺明心，積妄發生，妄有三界，中間妄隨，七趣沉溺，補特伽羅，各從其類。

辛七、脩羅趣 分二  
壬初、總標名數 二、別釋趣攝 今初

復次，阿難！是三界中，復有四種，阿修羅類。

壬二、別釋趣攝 分四

癸初、卵生鬼攝 二、胎生人攝 三、化生天攝

四、濕生畜攝 今初

若於鬼道，以護法力，乘通入空，此阿修羅，從卵而生，鬼趣所攝。

癸二、胎生人攝

若於天中，降德貶墜，其所卜居，鄰於日月，此阿修羅，從胎而出，人趣所攝。

癸三、化生天攝

有修羅王，執持世界，力洞無畏；能與梵王，及天帝釋，四天爭權。此阿修羅，因變化有，天趣所攝。

癸四、濕生畜攝

阿難！別有一分，下劣修羅，生大海心，沉水穴口，且遊虛空，暮歸水宿，此阿修羅，因溼氣有，畜生趣攝。

己三、結妄勸離

分三

庚初、藥病雙舉 二、同別俱妄 三、正勸須除

庚初分三

辛初、總舉妄病 二、指病深根 三、定藥能除 今初

阿難！如是地獄、餓鬼、畜生、人及神仙、天洎修羅，精研七趣，皆是昏沉，諸有爲相，妄想受生，妄想隨業，於妙圓明。無作本心，皆如空華，元無所著，但一虛妄，更無根緒。

辛二、指病深根

阿難！此等眾生，不識本心，受此輪迴，經無量劫，不得真淨，

皆由隨順，殺、盜、淫故。反此三種，又則出生，無殺、盜、淫，有名鬼倫，無名天趣，有無相傾，起輪迴性。

辛三、定藥能除

若得妙發，三摩提者，則妙常寂，有無二無，無二亦滅，尚無不殺、不偷、不淫，云何更隨殺盜淫事？

庚二、同別俱妄

阿難！不斷三業，各各有私，因各各私，眾私同分，非無定處，自妄發生，生妄無因，無可尋究。

庚三、正勸須除

汝勗修行，欲得菩提，要除三惑。不盡三惑，縱得神通，皆是世

間有爲功用，習氣不滅，落於魔道。雖欲除妄，倍加虛僞，如來說爲，可哀憐者，汝妄自造，非菩提咎。

己四、判決邪正

作是說者，名爲正說；若他說者，即魔王說。

丁二、辨五魔令識以護墮落 分二 戊初、無問自說五陰魔境 二、因請

重明五陰生滅 戊初分三 己初、普告魔境當識 二、會眾頂禮欽承

三、正以詳陳魔事 己初分三 庚初、最後真慈不盡 二、詳標微細魔

事 三、勒令諦聽許說 今初

即時如來，將罷法座，於師子床，攬七寶几，迴紫金山，再來凭倚。普告大眾及阿難言：汝等有學，緣覺、聲聞，今日迴心，趣

大菩提，無上妙覺，我今已說，真修行法。

庚二、詳標微細魔事

汝猶未識，修奢摩他，毗婆舍那，微細魔事，魔境現前，汝不能識，洗心非正，落於邪見。或汝陰魔，或復天魔，或著鬼神，或遭魘魅，心中不明。認賊爲子。又復於中，得少爲足，如第四禪，無聞比丘，妄言證聖，天報已畢，衰相現前，謗阿羅漢，身遭後有，墮阿鼻獄。

庚三、勒令諦聽許說

汝應諦聽，吾今爲汝，仔細分別。

己二、會眾頂禮欽承

阿難起立，並其會中，同有學者，歡喜頂禮，伏聽慈誨。

己三、正以詳陳魔事 分三 庚初、標告動成之由 二、詳分五陰魔相

三、結示超證護持 庚初分二 辛初、驚動諸魔由定 二、成就破亂由

迷 辛初分二 壬初、推真妄生滅相關 二、示大定致魔之相 壬初分

四 癸初、先明本覺同佛 二、次示妄生空界 三、比況空界微茫

四、歸元必壞空界 今初

佛告阿難，及諸大眾：汝等當知，有漏世界，十二類生，本覺妙明，覺圓心體，與十方佛，無二無別。

癸二、次示妄生空界

由汝妄想，迷理爲咎，癡愛發生，生發徧迷，故有空性，化迷不

息，有世界生，則此十方，微塵國土，非無漏者，皆是迷頑，妄想安立。

癸三、比況空界微茫

當知虛空，生汝心內，猶如片雲，點太清裡；況諸世界，在虛空耶？

癸四、歸元必壞空界

汝等一人，發真歸元，此十方空，皆悉銷殞，云何空中，所有國土，而不振裂？

壬二、示大定致魔之相 分二

癸初、諸聖心精通膈

二、諸魔僉來惱亂

今初

汝輩修禪，飾三摩地，十方菩薩，及諸無漏，大阿羅漢，心精通  
昭，當處湛然。

癸二、諸魔僉來惱亂

一切魔王，及與鬼神，諸凡夫天，見其宮殿，無故崩裂，大地振  
坼，水陸飛騰，無不驚愕，凡夫昏暗，不覺遷訛。彼等咸得，五  
種神通，惟除漏盡，戀此塵勞，如何令汝，摧裂其處？是故鬼  
神，及諸天魔，魍魎妖精，於三昧時，僉來惱汝。

辛二、成就破亂由迷

分六

壬初、示喻客不成害 二、正推迷亂由主

三、覺悟必能超勝 四、迷惑必致墮落 五、前墮淫室害淺 六、若墮

魔類害深 今初

然彼諸魔，雖有大怒，彼塵勞內，汝妙覺中，如風吹光，如刀斷水，了不相觸。汝如沸湯，彼如堅冰，暖氣漸鄰，不日消殞，徒恃神力，但爲其客。

壬二、正推迷亂由主

成就破亂，由汝心中，五陰主人，主人若迷，客得其便。

壬三、覺悟必能超勝

當處禪那，覺悟無惑，則彼魔事，無奈汝何。陰消入明，則彼群邪，咸受幽氣，明能破暗，近自消殞，如何敢留，擾亂禪定？

壬四、迷惑必致墮落

若不明悟，被陰所迷，則汝阿難，必爲魔子，成就魔人。

壬五、前墮淫室害淺

如摩登伽，殊爲眇劣，彼惟咒汝，破佛律儀，八萬行中，祇毀一戒，心清淨故，尙未淪溺。

壬六、若墮魔類害深

此乃墮汝，寶覺全身，如宰臣家，忽逢籍沒，宛轉零落，無可哀救。

庚二、詳分五陰魔相 分五

辛初、色陰魔相 至五

識陰魔相

辛初分三

壬初、具示始終

二、中間十境

三、結害囑護

壬初分二

癸初、始

修未破區宇

二、終破顯露妄源

今初

阿難當知：汝坐道場，銷落諸念，其念若盡，則諸離念，一切精

明，動靜不移，憶忘如一。當住此處，入三摩地，如明目人，處大幽暗，精性妙淨，心未發光，此則名爲，色陰區宇。

癸二、終破顯露妄源

若目明朗，十方洞開，無復幽黯，名色陰盡，是人則能，超越劫濁，觀其所由，堅固妄想，以爲其本。

壬二、中間十境 分十

癸初、身能出礙至 十、妄見妄說 今初

阿難！當在此中，精研妙明，四大不織，少選之間，身能出礙，此名精明，流溢前境，斯但功用，暫得如是，非爲聖證，不作聖心，名善境界；若作聖解，即受群邪。

癸二、內徹拾蟲

阿難！復以此心，精研妙明，其身內徹；是人忽然，於其身內，拾出虯蚘，身相宛然，亦無傷毀，此名精明，流溢形體。斯但精行，暫得如是，非爲聖證，不作聖心，名善境界；若作聖解，即受群邪。

癸三、精魄離合

又以此心，內外精研，其時魂魄，意志精神，除執受身，餘皆涉入，互爲賓主。忽於空中，聞說法聲，或聞十方，同敷密義，此名精魄，遞相離合，成就善種，暫得如是，非爲聖證。不作聖心，名善境界；若作聖解，即受群邪。

癸四、境變佛現

又以此心，澄露皎徹，內光發明，十方徧作，閻浮檀色，一切種類，化爲如來，於時忽見，毘盧遮那，踞天光臺，千佛圍繞，百億國土，及與蓮華，俱時出現；此名心魂，靈悟所染，心光研明，照諸世界，暫得如是，非爲聖證。不作聖心，名善境界；若作聖解，即受群邪。

癸五、空成寶色

又以此心，精研妙明，觀察不停，抑按降伏，制止超越，於時忽然十方虛空，成七寶色，或百寶色，同時徧滿，不相留礙；青黃赤白，各各純現，此名抑按，功力逾分，暫得如是，非爲聖證。不作聖心，名善境界；若作聖解，即受群邪。

癸六、暗中見物

又以此心，研究澄徹，精光不亂，忽於夜半，在暗室內，見種種物，不殊白晝，而暗室物，亦不除滅，此名心細，密澄其見，所視洞幽，暫得如是，非爲聖證。不作聖心，名善境界；若作聖解，即受群邪。

癸七、身同草木

又以此心，圓入虛融，四肢忽然同於草木，火燒刀斫，曾無所覺。又則火光，不能燒爇，縱割其肉，猶如削木，此名塵併，排四大性，一向入純，暫得如是，非爲聖證。不作聖心，名善境界；若作聖解，即受群邪。

癸八、徧見無礙

又以此心，成就清淨，淨心功極，忽見大地，十方山河，皆成佛國，具足七寶，光明徧滿；又見恆沙，諸佛如來，徧滿空界，樓殿華麗；下見地獄，上觀天宮，得無障礙。此名欣厭，凝想日深，想久化成，非爲聖證，不作聖心，名善境界；若作聖解，即受群邪。

癸九、遙見遙聞

又以此心，研究深遠，忽於中夜，遙見遠方，市井街巷，親族眷屬；或聞其語。此名迫心，逼極飛出，故多隔見，非爲聖證。不作聖心，名善境界；若作聖解。即受群邪。

癸十、妄見妄說

又以此心，研究精極，見善知識，形體變移，少選無端，種種遷改，此名邪心，含受魑魅，或遭天魔，入其心腹，無端說法，通達妙義，非爲聖證。不作聖心，魔事銷歇；若作聖解，即受群邪。

壬三、結害囑護 分三

癸初、示因交互

二、迷則成害

三、囑令保護

今初

阿難！如是十種，禪那現境，皆是色陰，用心交互，故現斯事。

壬二、迷則成害

眾生頑迷，不自忖量，逢此因緣，迷不自識，謂言登聖，大妄語

成。墮無間獄。

壬三、囑令保護

汝等當依，如來滅後，於末法中，宣示斯義，無令天魔，得其方便，保持覆護，成無上道。

辛二、受陰魔相 分三 壬初、具示始終 二、中間十境 三、結害囑護

壬初分二 癸初、始修未破區宇 二、終破顯露妄源 癸初分二 子

初、躡前色陰盡相 二、狀示受陰區宇 今初

阿難！彼善男子，修三摩提，奢摩他中，色陰盡者，見諸佛心，如明鏡中，顯現其像。

子二、狀示受陰區宇

若有所得，而未能用，猶如魘人，手足宛然，見聞不惑，心觸客邪，而不能動，此則名爲，受陰區宇。

癸二、終破顯露妄源

若魘咎歇，其心離身，反觀其面，去住自由，無復留礙，名受陰盡；是人則能，超越見濁，觀其所由，虛明妄想，以爲其本。

壬二、中間十境 分十

癸初、抑己悲生 至十

著有恣淫

癸初分三

子

初、發端現相

阿難！彼善男子，當在此中，得大光耀，其心發明，內抑過分，忽於其處，發無窮悲，如是乃至，觀見蚊蟲，猶如赤子，心生憐愍，不覺流淚。

子二、指名教悟

此名功用，抑摧過越，悟則無咎，非爲聖證；覺了不迷，久自消歇。

子三、示迷必墜

若作聖解，則有悲魔，入其心腑，見人則悲，啼泣無限，失於正受，當從淪墜。

癸二、揚己齊佛

分三

子初、發端現相

阿難！又彼定中，諸善男子，見色陰消，受陰明白，勝相現前，感激過分，忽於其中，生無限勇，其心猛利，志齊諸佛，謂三僧祇，一念能越。

子二、指名教悟

此名功用，陵率過越，悟則無咎，非爲聖證，覺了不迷，久自消歇。

子三、示迷必墜

若作聖解，則有狂魔，入其心腑，見人則誇，我慢無比，其心乃至，上不見佛，下不見人，失於正受，當從淪墜。

癸三、定徧多憶

分三

子初、發端現相

又彼定中，諸善男子，見色陰消，受陰明白，前無新證，歸失故居，智力衰微，入中隳地，迴無所見，心中忽然，生大枯渴，於一切時，沉憶不散，將此以爲，勤精進相。

子二、指名教悟

此名修心，無慧自失，悟則無咎，非爲聖證。

子三、示迷必墜

若作聖解，則眾憶魔，入其心腑，旦夕撮心，懸在一處，失於正受，當從淪墜。

癸四、慧偏多狂

分三

子初、發端現相

又彼定中，諸善男子，見色陰消，受陰明白，慧力過定，失於猛利，以諸勝性，懷於心中，自心已疑，是盧舍那，得少爲足。

子二、指名教悟

此名用心，忘失恆審，溺於知見，悟則無咎，非爲聖證。

子三、示迷必墜

若作聖解，則有下劣，易知足魔，入其心腑，見人自言，我得無上，第一義諦，失於正受，當從淪墜。

癸五、歷險生憂

分三

子初、發端現相

又彼定中，諸善男子，見色陰消，受陰明白，新證未獲，故心已亡，歷覽二際，自生艱險，於心忽然，生無盡憂，如坐鐵床，如飲毒藥，心不欲活，常求於人，令害其命，早取解脫。

子二、指名教悟

此名修行，失於方便，悟則無咎，非爲聖證。

子三、示迷必墜

若作聖解，則有一分，常憂愁魔，入其心腑，手執刀劍，自割其肉，欣其捨壽；或常憂愁，走入山林，不耐見人。失於正受，當從淪墜。

癸六、覺安生喜 分三

子初、發端現相

又彼定中，諸善男子，見色陰消，受陰明白，處清淨中，心安隱後，忽然自有，無限喜生，心中歡悅，不能自止。

子二、指名教悟

此名輕安，無慧自禁，悟則無咎，非爲聖證。

子三、示迷必墜

若作聖解，則有一分，好喜樂魔，入其心腑，見人則笑，於衢路

傍，自歌自舞，自謂已得，無礙解脫，失於正受，當從淪墜。

癸七、見勝成慢 分三  
子初、發端現相

又彼定中，諸善男子，見色陰消，受陰明白，自謂已足，忽有無端，大我慢起，如是乃至，慢與過慢，及慢過慢，或增上慢，或卑劣慢，一時俱發，心中尚輕十方如來，何況下位聲聞緣覺。

子二、指名教悟

此名見勝，無慧自救，悟則無咎，非爲聖證。

子三、示迷必墜

若作聖解，則有一分，大我慢魔，入其心腑，不禮塔廟，摧毀經像，謂檀越言：此是金銅，或是土木，經是樹葉，或是氎華，肉

身真常，不自恭敬，卻崇土木，實爲顛倒。其深信者，從其毀碎，埋棄地中，疑誤眾生，入無間獄，失於正受，當從淪墜。

癸八、慧安自足 分三

子初、發端現相

又彼定中，諸善男子，見色陰消，受陰明白，於精明中，圓悟精理，得大隨順。其心忽生，無量輕安，已言成聖，得大自在。

子二、指名教悟

此名因慧，獲諸輕清，悟則無咎，非爲聖證。

子三、示迷必墜

若作聖解，則有一分，好輕清魔，入其心腑，自謂滿足，更不求進，此等多作無聞比丘，疑誤眾生，墮阿鼻獄，失於正受，當從

淪墜。

癸九、著空毀戒 分三

子初、發端現相

又彼定中，諸善男子，見色陰消，受陰明白，於明悟中，得虛明性，其中忽然，歸向永滅，撥無因果，一向入空，空心現前，乃至心生，長斷滅解。

子二、指名教悟

悟則無咎，非爲聖證。

子三、示迷必墜

若作聖解，則有空魔，入其心腑，乃謗持戒，名爲小乘；菩薩悟空，有何持犯？其人常於，信心檀越，飲酒噉肉，廣行淫穢，因

魔力故，攝其前人，不生疑謗，鬼心久入，或食屎尿，與酒肉等，一種俱空，破佛律儀，誤入人罪，失於正受，當從淪墜。

癸十、著有恣淫 分三 子初、發端現相

又彼定中，諸善男子，見色陰消，受陰明白，味其虛明，深入心骨，其心忽有無限愛生，愛極發狂，便爲貪欲。

子二、指名教悟

此名定境，安順入心，無慧自持，誤入諸欲，悟則無咎，非爲聖證。

子三、示迷必墜

若作聖解，則有欲魔，入其心腑。一向說欲，爲菩提道；化諸白

衣，平等行欲，其行淫者，名持法子，鬼神力故，於末世中，攝其凡愚，其數至百，如是乃至，一百二百，或五六百，多滿千萬，魔心生厭，離其身體，威德既無，陷於王難，疑誤眾生，入無間獄，失於正受，當從淪墜。

壬三、結害囑護

分三

癸初、示因交互

二、迷則成害

三、囑令保護

今初

阿難！如是十種，禪那現境，皆是受陰，用心交互，故現斯事。

癸二、迷則成害

眾生頑迷，不自忖量，逢此因緣，迷不自識，謂言登聖，大妄語成，墮無間獄。

癸三、囑令保護

汝等亦當，將如來語。於我滅後。傳示末法。徧令眾生，開悟斯義，無令天魔，得其方便，保持覆護，成無上道。

辛三、想陰魔相 分三

壬初、具示始終

二、中間十境

三、結害囑護

壬初 分二

癸初、始修未破區宇

二、修破顯露妄源

癸初 分二

子初、躡前

受陰盡相

二、狀示想陰區宇 今初

阿難！彼善男子，修三摩地，受陰盡者，雖未漏盡，心離其形，如鳥出籠，已能成就，從是凡身，上歷菩薩，六十聖位，得意生身，隨往無礙。

子二、狀示想陰區宇

譬如有人，熟寐寢言，是人雖則，無別所知，其言已成，音韻倫次，令不寐者，咸悟其語，此則名為，想陰區宇。

癸二、終破顯露妄源

若動念盡，浮想銷除，於覺明心，如去塵垢，一倫生死，首尾圓照，名想陰盡。是人則能，超越煩惱濁，觀其所由，融通妄想，以為其本。

壬二、中間十境 分十

癸初、貪求善巧 至

十、貪求永歲

癸初 分七

子初、

定發愛求

阿難！彼善男子，受陰虛妙，不遭邪慮，圓定發明，三摩地中，心愛圓明，銳其精思，貪求善巧。

子二、魔遣邪附

爾時天魔，候得其便，飛精附人，口說經法。

子三、客邪投擾

其人不覺，是其魔著，自言謂得，無上涅槃，來彼求巧善男子處，敷座說法，其形斯須，或作比丘，令彼人見，或為帝釋，或為婦女，或比丘尼，或寢暗室，身有光明。

子四、主人惑亂

是人愚迷，惑為菩薩，信其教化，搖蕩其心，破佛律儀，潛行貪欲。

子五、按其言狀

口中好言，災祥變異，或言如來，某處出世；或言劫火，或說刀兵，恐怖於人，令其家資，無故耗散。

子六、出名示害

此名怪鬼，年老成魔，惱亂是人，厭足心生。去彼人體，弟子與師，俱陷王難。

子七、教悟戒迷

汝當先覺，不入輪迴；迷惑不知，墮無間獄。

癸二、貪求經歷

分七

子初、定發愛求

阿難！又善男子，受陰虛妙，不遭邪慮，圓定發明，三摩地中，心愛遊蕩，飛其精思，貪求經歷。

子二、魔遣邪附

爾時天魔，候得其便，飛精附人，口說經法。

子三、客邪投擾

其人亦不覺知魔著，亦言自得無上涅槃，來彼求遊善男子處，敷座說法，自形無變，其聽法者，忽自見身，坐寶蓮華，全體化成，紫金光聚，一眾聽人，各各如是，得未曾有。

子四、主人惑亂

是人愚迷，惑為菩薩，淫逸其心，破佛律儀，潛行貪欲。

子五、按其言狀

口中好言，諸佛應世，某處某人，當是某佛，化身來此；某人即

是，某菩薩等，來化人間，其人見故，心生渴仰，邪見密興，種智消滅。

子六、出名示害

此名魅鬼，年老成魔，惱亂是人，厭足心生，去彼人體，弟子與師，俱陷王難。

子七、教悟戒迷

汝當先覺，不入輪迴；迷惑不知，墮無間獄。

癸三、貪求契合

分七

子初、定發愛求

又善男子，受陰虛妙，不遭邪慮，圓定發明，三摩地中，心愛懸溜，澄其精思，貪求契合。

子二、魔遣邪附

爾時天魔，候得其便，飛精附人，口說經法。

子三、客邪投擾

其人實不覺知魔著，亦言自得，無上涅槃，來彼求合善男子處，敷座說法，其形及彼，聽法之人，外無遷變，令其聽者，未聞法前，心自開悟，念念移易，或得宿命，或有他心，或見地獄，或知人間，好惡諸事，或口說偈，或自誦經，各各歡娛，得未曾有。

子四、主人惑亂

是人愚迷，惑為菩薩，繇愛其心，破佛律儀，潛行貪欲。

子五、按其言狀

口中好言，佛有大小，某佛先佛，某佛後佛，其中亦有，真佛假佛，男佛女佛，菩薩亦然，其人見故，洗滌本心，易入邪悟。

子六、出名示害

此名魅鬼，年老成魔，惱亂是人，厭足心生，去彼人體，弟子與師，俱陷王難。

子七、教悟戒迷

汝當先覺，不入輪迴；迷惑不知，墮無間獄。

癸四、貪求辨析

分七

子初、定發愛求

又善男子，受陰虛妙，不遭邪慮，圓定發明，三摩地中，心愛根本，窮覽物化，性之終始，精爽其心，貪求辨析。

子二、魔遣邪附

爾時天魔，候得其便，飛精附人，口說經法。

子三、客邪投擾

其人先不覺知魔著，亦言自得，無上涅槃，來彼求元善男子處，敷座說法，身有威神，摧伏求者，令其座下，雖未聞法，自然心伏，是諸人等，將佛涅槃，菩提法身，即是現前，我肉身上，父子子子，遞代相生，即是法身，常住不絕，都指現在，即為佛國，無別淨居，及金色相。

子四、主人惑亂

其人信受，亡失先心，身命歸依，得未曾有。是等愚迷，惑為菩

薩，推究其心，破佛律儀，潛行貪欲。

子五、按其言狀

口中好言，眼、耳、鼻、舌，皆為淨土；男女二根，即是菩提涅槃真處；彼無知者，信是穢言。

子六、出名示害

此名蠱毒，魔勝惡鬼，年老成魔，惱亂是人，厭足心生，去彼人體。弟子與師，俱陷王難。

子七、教悟戒迷

汝當先覺，不入輪迴；迷惑不知，墮無間獄。

癸五、貪求冥感

分七

子初、定發愛求

又善男子，受陰虛妙，不遭邪慮，圓定發明，三摩地中，心愛懸應，周流精研，貪求冥感。

子二、魔遣邪附

爾時天魔，候得其便，飛精附人，口說經法。

子三、客邪投擾

其人元不覺知魔著，亦言自得，無上涅槃，來彼求應善男子處，敷座說法，能令聽眾，暫見其身，如百千歲，心生愛染，不能捨離，身為奴僕，四事供養，不覺疲勞，各各令其，座下人心，知是先師，本善知識，別生法愛，粘如膠漆，得未曾有。

子四、主人惑亂

是人愚迷，惑為菩薩，親近其心，破佛律儀，潛行貪欲。

子五、按其言狀

口中好言，我於前世，於某生中，先度某人，當時是我，妻妾兄弟，今來相度，與汝相隨，歸某世界，供養某佛，或言別有，大光明天，佛於中住，一切如來，所休居地，彼無知者，信是虛誑，遺失本心。

子六、出名示害

此名癘鬼，年老成魔，惱亂是人，厭足心生，去彼人體，弟子與師，俱陷王難。

子七、教悟戒迷

汝當先覺，不入輪迴；迷惑不知，墮無間獄。

癸六、貪求靜謐

分五

子初、定發愛求

又善男子，受陰虛妙，不遭邪慮，圓定發明，三摩地中，心愛深入，剋己辛勤，樂處陰寂，貪求靜謐。

子二、魔遣邪附

爾時天魔，候得其便，飛精附人，口說經法。

子三、邪惑事言

其人本不覺知魔著，亦言自得無上涅槃，來彼求陰善男子處，敷座說法，令其聽人，各知本業，或於其處，語一人言，汝今未死，已作畜生，敕使一人，於後蹋尾，頓令其人，起不能得，於是一

眾，傾心欽伏，有人起心，已知其肇，佛律儀外，重加精苦，誹謗比丘，罵詈徒眾，訐露人事，不避譏嫌，口中好言，未然禍福，及至其時，毫髮無失。

子四、出名示害

此大力鬼，年老成魔，惱亂是人，厭足心生，去彼人體，弟子與師，俱陷王難。

子五、教悟戒迷

汝當先覺，不入輪迴；迷惑不知，墮無間獄。

癸七、貪求宿命

分五

子初、定發愛求

又善男子，受陰虛妙，不遭邪慮，圓定發明，三摩地中，心愛知

見，勤苦研尋，貪求宿命。

子二、魔遣邪附

爾時天魔，候得其便，飛精附人，口說經法，其人殊不覺知魔著，亦言自得無上涅槃，來彼求知善男子處，敷座說法。

子三、邪惑事言

是人無端，於說法處，得大寶珠。其魔或時，化為畜生。口銜其珠，及雜珍寶，簡冊符牘，諸奇異物，先授彼人，後著其體。或誘聽人，藏於地下，有明月珠，照耀其處，是諸聽者。得未曾有。多食藥草，不餐嘉饌，或時日餐一麻一麥，其形肥充，魔力持故，誹謗比丘，罵詈徒眾，不避譏嫌。口中好言，他方寶藏，十方賢

聖，潛匿之處，隨其後者，往往見有奇異之人。

子四、出名示害

此名山林，土地城隍，川嶽鬼神，年老成魔，或有宣淫，破佛戒律，與承事者，潛行五欲，或有精進，純食草木，無定行事，惱亂是人。厭足心生，去彼人體，弟子與師，俱陷王難。

子五、教悟戒迷

汝當先覺，不入輪迴；迷惑不知，墮無間獄。

癸八、貪求神力

分五

子初、定發愛求

又善男子，受陰虛妙，不遭邪慮，圓定發明，三摩地中，心愛神通，種種變化，研究化元，貪取神力。

子二、魔遣邪附

爾時天魔，候得其便，飛精附人，口說經法。

子三、邪惑事言

其人誠不覺知魔著，亦言自得無上涅槃，來彼求通善男子處，敷座說法。是人或復手執火光，手撮其光，分於所聽，四眾頭上，是諸聽人，頂上火光，皆長數尺，亦無熱性，曾不焚燒；或水上行，如履平地；或於空中，安坐不動；或入瓶內，或處囊中，越牖透牆，曾無障礙；惟於刀兵，不得自在。自言是佛，身著白衣，受比丘禮，誹謗禪律，罵詈徒眾，訐露人事，不避譏嫌。口中常說，神通自在。或復令人，旁見佛土，鬼力惑人，非有真實。讚

歎行淫，不毀麤行，將諸猥媠，以為傳法。

子四、出名示害

此名天地大力：山精、海精、風精、河精、土精、一切草木，積劫精魅，或復龍魅，或壽終仙，再活為魅，或仙期終，計年應死，其形不化，他怪所附，年老成魔，惱亂是人。厭足心生，去彼人體，弟子與師，多陷王難。

子五、教悟戒迷

汝當先覺，不入輪迴；迷惑不知，墮無間獄。

癸九、貪求深空

分五

子初、定發愛求

又善男子，受陰虛妙，不遭邪慮，圓定發明，三摩地中，心愛入

滅，研究化性，貪求深空。

子二、魔遣邪附

爾時天魔，候得其便，飛精附人，口說經法。

子三、邪惑事言

其人終不覺知魔著，亦言自得無上涅槃，來彼求空善男子處，敷座說法。於大眾內，其形忽空，眾無所見，還從虛空，突然而出，存沒自在，或現其身，洞如琉璃，或垂手足，作旃檀氣。或大小便，如厚石蜜，誹毀戒律，輕賤出家。口中常說，無因無果，一死永滅，無復後身，及諸凡聖。雖得空寂，潛行貪欲，受其欲者，亦得空心，撥無因果。

子四、出名示害

此名日月，薄蝕精氣，金玉芝草，麟鳳龜鶴，經千萬年，不死為靈，出生國土，年老成魔，惱亂是人。厭足心生，去彼人體，弟子與師，多陷王難。

子五、教悟戒迷

汝當先覺，不入輪迴；迷惑不知，墮無間獄。

癸十、貪求永歲

分五

子初、定發愛求

又善男子，受陰虛妙，不遭邪慮，圓定發明，三摩地中，心愛長壽，辛苦研幾，貪求永歲，棄分段生，頓希變易，細相常住。

子二、魔遣邪附

爾時天魔，候得其便，飛精附人，口說經法。

子三、邪惑事言

其人竟不覺知魔著，亦言自得無上涅槃，來彼求生善男子處，敷座說法。好言他方，往還無滯，或經萬里，瞬息再來。皆於彼方，取得其物；或於一處，在一宅中。數步之間。令其從東，詣至西壁，是人急行，累年不到。因此心信，疑佛現前。口中常說，十方眾生，皆是吾子，我生諸佛，我出世界，我是元佛，出世自然，不因修得。

子四、出名示害

此名住世，自在天魔，使其眷屬，如遮文茶，及四天王，毘舍童

子，未發心者，利其虛明，食彼精氣，或不因師，其修行人，親自觀見，稱執金剛，與汝長命。現美女身，盛行貪欲。未逾年歲，肝腦枯竭，口兼獨言，聽若妖魅，前人未詳，多陷王難。未及遇刑，先已乾死，惱亂彼人，以至殂殞。

子五、教悟戒迷

汝當先覺，不入輪迴；迷惑不知，墮無間獄。

壬三、示勸末世

分四

癸初、妄稱極果

阿難當知：是十種魔，於末世時，在我法中，出家修道，或附人體，或自現形，皆言已成正徧知覺。

癸二、以淫成化

讚歎淫欲，破佛律儀，先惡魔師，與魔弟子，淫淫相傳，如是邪精，魅其心腑，近則九生，多逾百世，令真修行，總為魔眷。

癸三、陷魔墮獄

命終之後，必為魔民，失正徧知，墮無間獄。

癸四、悲救報恩

汝今未須，先取寂滅，縱得無學，留願入彼末法之中，起大慈悲，救度正心深信眾生，令不著魔，得正知見，我今度汝，已出生死，汝遵佛語，名報佛恩。

壬四、結害囑護

分三

癸初、示因交互

阿難！如是十種，禪那現境，皆是想陰，用心交互，故現斯事。

癸二、迷則成害

眾生頑迷，不自忖量，逢此因緣，迷不自識，謂言登聖，大妄語成，墮無間獄。

癸三、囑令保護

汝等必須，將如來語，於我滅後，傳示末法，徧令眾生，開悟斯義，無令天魔，得其方便，保持覆護，成無上道。

# 大佛頂如來密因修證了義諸菩薩萬行首楞嚴經（卷第十）

辛四、行陰魔相 分三

壬初、具示始終

二、中間十境

三、結害囑護

壬初 分二

癸初、始修未破區宇

二、終破顯露妄源

癸初 分二

子初、攝前

想陰盡相

二、狀示行陰區宇

今初

阿難！彼善男子，修三摩地，想陰盡者，是人平常，夢想消滅，寤寐恆一，覺明虛靜，猶如晴空，無復羸重前塵影事，觀諸世間，大地山河，如鏡鑑明，來無所粘，過無蹤跡，虛受照應，了罔陳習，惟一精真。

子二、狀示行陰區宇

生滅根元，從此披露，見諸十方，十二眾生，畢殫其類，雖未通

其各命由緒，見同生基，猶如野馬。熠熠清擾，為浮根塵，究竟樞穴，此則名為，行陰區宇。

癸二、終破顯露妄源

若此清擾，熠熠元性，性入元澄，一澄元習，如波瀾滅，化為澄水，名行陰盡。是人則能，超眾生濁，觀其所由，幽隱妄想，以為其本。

壬二、中間十計 分十

癸初、二種無因 至

十、五現涅槃 分三

子初、

標由示墜

二、詳釋其相

三、結成外論

今初

阿難當知：是得正知，奢摩他中，諸善男子，凝明正心，十類天魔，不得其便，方得精研，窮生類本。於本類中，生元露者，觀

彼幽清，圓擾動元，於圓元中，起計度者，是人墜入，二無因論。

子二、詳釋其相

分二

丑初、本無因

二、末無因

丑初

分三

寅初、據

己見量

一者，是人，見本無因。何以故？是人既得生機全破，乘於眼根，八百功德，見八萬劫，所有眾生，業流灣環，死此生彼，祇見眾生，輪迴其處，八萬劫外，冥無所觀。

寅二、謬成邪計

便作是解：此等世間，十方眾生，八萬劫來，無因自有。

寅三、失真墮外

由此計度，亡正徧知，墮落外道，惑菩提性。

丑二、末無因

分三

寅初、據己見量

二者、是人，見末無因。何以故？是人於生，既見其根，知人生人，悟鳥生鳥，鳥從來黑，鵠從來白，人天本豎，畜生本橫，白非洗成，黑非染造，從八萬劫，無復改移。

寅二、謬成邪計

今盡此形，亦復如是，而我本來，不見菩提，云何更有，成菩提事？當知今日，一切物象，皆本無因。

寅三、失真墮外

由此計度，亡正徧知，墮落外道，惑菩提性。

子三、結成外論

是則名為，第一外道，立無因論。

癸二、四種徧常 分三  
子初、標由示墜

阿難！是三摩中。諸善男子，凝明正心，魔不得便，窮生類本。觀彼幽清，常擾動元，於圓常中。起計度者，是人墜入，四徧常論。

子二、詳釋其相 分四  
丑初、心境計常

一者、是人，窮心境性。二處無因，修習能知，二萬劫中，十方眾生，所有生滅，咸皆循環，不曾散失，計以為常。

丑二、四大計常

二者、是人，窮四大元。四性常住，修習能知，四萬劫中，十方眾生，所有生滅，咸皆體恆，不曾散失，計以為常。

丑三、八識計常

三者、是人，窮盡六根，末那執受，心意識中，本元由處，性常恆故。修習能知，八萬劫中，一切眾生，循環不失，本來常住，窮不失性，計以為常。

丑四、想盡計常

四者、是人，既盡想元，生理更無，流止運轉，生滅想心。今已永滅，理中自然，成不生滅，因心所度，計以為常。

子三、結成外論

由此計常，亡正徧知，墮落外道，惑菩提性。是則名為，第二外道，立圓常論。

癸三、四種顛倒 分三

子初、標由示墜

又三摩中，諸善男子，堅凝正心，魔不得便，窮生類本，觀彼幽清，常擾動元，於自他中，起計度者，是人墜入，四顛倒見，一分無常，一分常論。

子二、詳釋其相 分四

丑初、雙約自他

一者、是人，觀妙明心，徧十方界，湛然以為，究竟神我。從是則計，我徧十方，凝明不動，一切眾生，於我心中，自生自死。則我心性，名之為常，彼生滅者，真無常性。

丑二、約他國土

二者、是人，不觀其心，徧觀十方，恆沙國土。見劫壞處，名為

究竟，無常種性；劫不壞處，名究竟常。

丑三、約自身心

三者、是人，別觀我心，精細微密，猶如微塵，流轉十方，性無移改，能令此身，即生即滅，其不壞性，名我性常。一切死生，從我流出，名無常性。

丑四、雙非自他

四者、是人，知想陰盡，見行陰流，行陰常流，計為常性，色受想等，今已滅盡，名無常性。

子三、結成外論

由此計度，一分無常，一分常故，墮落外道，惑菩提性，是則名

為第三外道，一分常論。

癸四、四種有邊

分三

子初、標由示墜

又三摩中，諸善男子，堅凝正心，魔不得便，窮生類本，觀彼幽清，常擾動元，於分位中，生計度者，是人墜入，四有邊論。

子二、詳釋其相

分四

丑初、約三際

一者、是人，心計生元，流用不息。計過未者，名為有邊。計相續心，名為無邊。

丑二、約見聞

二者、是人，觀八萬劫，則見眾生，八萬劫前，寂無聞見，無聞見處，名為無邊，有眾生處，名為有邊。

丑三、約彼我

三者、是人，計我徧知，得無邊性。彼一切人，現我知中，我曾不知，彼之知性；名彼不得，無邊之心，但有邊性。

丑四、約生滅

四者、是人，窮行陰空，以其所見，心路籌度，一切眾生，一身之中，計其咸皆半生半滅。明其世界，一切所有，一半有邊，一半無邊。

子三、結成外論

由此計度，有邊無邊，墮落外道，惑菩提性，是則名為，第四外道，立有邊論。

癸五、四種矯亂 分三

子初、標由示墜

又三摩中，諸善男子，堅凝正心，魔不得便。窮生類本，觀彼幽清，常擾動元，於知見中，生計度者，是人墜入，四種顛倒，不死矯亂，徧計虛論。

子二、詳釋其相 分四

丑初、八亦矯亂

一者、是人，觀變化元，見遷流處，名之為變。見相續處，名之為恆。見所見處，名之為生。不見見處，名之為滅。相續之因，性不斷處，名之為增。正相續中，中所離處，名之為減。各各生處，名之為有。互互亡處，名之為無。以理都觀，用心別見。有求法人，來問其義，答言我今，亦生亦滅，亦有亦無，亦增亦減，

於一切時，皆亂其語，令彼前人，遺失章句。

丑二、惟無矯亂

二者、是人，諦觀其心，互互無處，因無得證，有人來問，惟答一字，但言其無，除無之餘，無所言說。

丑三、惟是矯亂

三者、是人，諦觀其心，各各有處，因有得證，有人來問，惟答一字。但言其是，除是之餘，無所言說。

丑四、有無矯亂

四者、是人，有無俱見，其境枝故，其心亦亂，有人來問，答言亦有，即是亦無，亦無之中，不是亦有，一切矯亂，無容窮詰。

子三、結成外論

由此計度，矯亂虛無，墮落外道，惑菩提性。是則名為，第五外道，四顛倒性，不死矯亂，徧計虛論。

癸六、有十六相

分三

子初、標由示墜

又三摩中，諸善男子，堅凝正心，魔不得便，窮生類本，觀彼幽清，常擾動元，於無盡流，生計度者，是人墜入，死後有相，發心顛倒。

子二、詳釋其相

或自固身，云色是我。或見我圓，含徧國土，云我有色。或彼前緣，隨我迴復；云色屬我。或復我依，行中相續，云我在色。皆

計度言，死後有相，如是循環，有十六相。從此或計，畢竟煩惱，畢竟菩提，兩性並驅，各不相觸。

子三、結成外論

由此計度，死後有故，墮落外道，惑菩提性，是則名為，第六外道，立五陰中，死後有相，心顛倒論。

癸七、八種無相

分三

子初、標由示墜

又三摩中，諸善男子，堅凝正心，魔不得便。窮生類本，觀彼幽清，常擾動元，於先除滅，色受想中，生計度者。是人墜入，死後無相，發心顛倒。

子二、詳釋其相

見其色滅，形無所因；觀其想滅，心無所繫，知其受滅，無復連綴，陰性銷散，縱有生理，而無受想，與草木同。此質現前，猶不可得，死後云何，更有諸相？因之勘校，死後相無，如是循環，有八無相。從此或計，涅槃因果，一切皆空，徒有名字，究竟斷滅。

子三、結成外論

由此計度，死後無故，墮落外道，惑菩提性，是則名為，第七外道，立五陰中，死後無相，心顛倒論。

癸八、八種俱非

分三

子初、標由示墜

又三摩中，諸善男子，堅凝正心，魔不得便，窮生類本，觀彼幽

清，常擾動元，於行存中，兼受想滅，雙計有無，自體相破，是人墜入，死後俱非，起顛倒論。

子二、詳釋其相

色受想中，見有非有，行遷流內，觀無不無。如是循環，窮盡陰界，八俱非相，隨得一緣，皆言死後，有相無相。又計諸行，性遷訛故，心發通悟，有無俱非，虛實失措。

子三、結成外論

由此計度，死後俱非，後際昏瞢，無可道故，墮落外道，惑菩提性。是則名為，第八外道，立五陰中。死後俱非，心顛倒論。

癸九、七際斷滅

分三

子初、標由示墜

又三摩中，諸善男子，堅凝正心，魔不得便。窮生類本，觀彼幽清，常擾動元，於後後無，生計度者，是人墜入，七斷滅論。

子三、詳釋其相

或計身滅，或欲盡滅，或苦盡滅，或極樂滅，或極捨滅。如是循環，窮盡七際，現前消滅，滅已無復。

子三、結成外論

由此計度，死後斷滅，墮落外道，惑菩提性，是則名為，第九外道，立五陰中，死後斷滅，心顛倒論。

癸十、五現涅槃

分三

子初、標由示墜

又三摩中，諸善男子，堅凝正心，魔不得便，窮生類本，觀彼幽

清，常擾動元，於後後有，生計度者，是人墜入，五涅槃論。

子二、詳釋其相

或以欲界，為正轉依，觀見圓明，生愛慕故；或以初禪，性無憂故；或以二禪，心無苦故；或以三禪，極悅隨故；或以四禪，苦樂二亡，不受輪迴，生滅性故。迷有漏天，作無為解，五處安隱，為勝淨依，如是循環，五處究竟。

子三、結成外論

由此計度，五現涅槃，墮落外道，惑菩提性，是則名為，第十外道，立五陰中，五現涅槃，心顛倒論。

壬三、結害囑護

分三

癸初、示因交互

阿難！如是十種，禪那狂解，皆是行陰，用心交互，故現斯悟。

癸二、迷則成害

眾生頑迷，不自忖量，逢此現前，以迷為解，自言登聖，大妄語成，墮無間獄。

癸三、囑令保護

汝等必須，將如來語，於我滅後，傳示末法，徧令眾生，覺了斯義，無令心魔，自起深孽，保持覆護，消息邪見。教其身心，開覺真義，於無上道，不遭枝歧，勿令心祈，得少為足，作大覺王，清淨標指。

辛五、識陰魔相 分三

壬初、具示始終 二、中間十境 三、結害囑護

壬初 分二

癸初、始修未破區宇

二、終破顯露妄源

癸初 分二

子初、躡前

行陰盡相

二、狀示識陰區宇 今初

阿難！彼善男子，修三摩地，行陰盡者，諸世間性，幽清擾動，同分生機，倏然隳裂，沉細綱紐，補特伽羅，酬業深脈，感應懸絕。

子二、狀示識陰區宇

於涅槃天，將大明悟，如雞後鳴，瞻顧東方，已有精色。六根虛靜，無復馳逸，內外湛明，入無所入。深達十方，十二種類，受命元由；觀由執元，諸類不召，於十方界，已獲其同；精色不沉，發現幽秘。此則名為，識陰區宇。

癸二、終破顯露妄源

若於群召，已獲同中，銷磨六門，合開成就，見、聞通鄰，互用清淨。十方世界，及與身心，如吠瑠璃，內外明徹，名識陰盡。是人則能，超越命濁，觀其所由，罔象虛無，顛倒妄想，以為其本。

壬二、中間十執 分十

癸初、因所因執 至

十、定性辟支

癸初 分三

子初、

行盡識現

阿難當知：是善男子，窮諸行空，於識還元，已滅生滅，而於寂滅，精妙未圓。

子二、謬解成答

能令己身，根隔合開，亦與十方，諸類通覺，覺知通溜，能入圓元。若於所歸，立真常因，生勝解者，是人則墮，因所因執，娑毗迦羅，所歸冥諦，成其伴侶，迷佛菩提，亡失知見。

子三、出名警覺

是名第一，立所得心，成所歸果，違遠圓通，背涅槃城，生外道種。

癸二、能非能執 分三

子初、行盡識現

阿難！又善男子，窮諸行空，已滅生滅，而於寂滅，精妙未圓。

子二、謬解成答

若於所歸，覽為自體，盡虛空界，十二類內，所有眾生，皆我身

中，一類流出。生勝解者，是人則墮，能非能執，摩醯首羅，現無邊身，成其伴侶。迷佛菩提，亡失知見。

子三、出名警覺

是名第二，立能為心，成能事果，違遠圓通，背涅槃城，生大慢天，我徧圓種。

癸三、常非常執

分三

子初、行盡識現

又善男子，窮諸行空，已滅生滅，而於寂滅，精妙未圓。

子二、謬解成答

若於所歸，有所歸依，自疑身心，從彼流出，十方虛空，咸其生起，即於都起，所宣流地，作真常身，無生滅解。在生滅中，早

計常住，既惑不生，亦迷生滅，安住沉迷。生勝解者，是人則墮，常非常執；計自在天，成其伴侶。迷佛菩提，亡失知見。

子三、出名警覺

是名第三，立因依心，成妄計果，違遠圓通，背涅槃城，生倒圓種。

癸四、知無知執 分三

子初、行盡識現

又善男子，窮諸行空，已滅生滅，而於寂滅，精妙未圓。

子二、謬解成咎

若於所知，知徧圓故，因知立解，十方草木，皆稱有情，與人無異。草木為人，人死還成十方草樹，無擇徧知。生勝解者，是人

則墮，知無知執，婆吒、霰尼，執一切覺，成其伴侶。迷佛菩提，亡失知見。

子三、出名警覺

是名第四，計圓知心，成虛謬果，違遠圓通，背涅槃城，生倒知種。

癸五、生無生執 分三

子初、行盡識現

又善男子，窮諸行空，已滅生滅，而於寂滅，精妙未圓。

子二、謬解成答

若於圓融，根互用中，已得隨順，便於圓化，一切發生，求火光明，樂水清淨，愛風周流，觀塵成就，各各崇事，以此群塵，發

作本因，立常住解，是人則墮，生無生執。諸迦葉波。並婆羅門，勤心役身，事火崇水，求出生死，成其伴侶，迷佛菩提，亡失知見。

子三、出名警覺

是名第五，計者崇事，迷心從物，立妄求因，求妄冀果，違遠圓通，背涅槃城，生顛化種。

癸六、歸無歸執

分三

子初、行盡識現

又善男子，窮諸行空，已滅生滅，而於寂滅，精妙未圓。

子二、謬解成答

若於圓明，計明中虛，非滅群化，以永滅依，為所歸依。生勝解

者，是人則墮，歸無歸執；無想天中，諸舜若多，成其伴侶。迷佛菩提，亡失知見。

子三、出名警覺

是名第六，圓虛無心，成空亡果，違遠圓通，背涅槃城，生斷滅種。

癸七、貪非貪執 分三

子初、行盡識空

又善男子，窮諸行空，已滅生滅，而於寂滅，精妙未圓。

子二、謬解成答

若於圓常，固身常住，同於精圓，長不傾逝。生勝解者，是人則墮，貪非貪執；諸阿斯陀，求長命者，成其伴侶。迷佛菩提，亡

失知見。

子三、出名警覺

是名第七，執著命元，立固妄因，趣長勞果，違遠圓通，背涅槃城，生妄延種。

癸八、真無真執

分三

子初、行盡識現

又善男子，窮諸行空，已滅生滅，而於寂滅，精妙未圓。

子二、謬解成答

觀命互通，却留塵勞，恐其銷盡，便於此際，坐蓮華宮，廣化七珍，多增寶媛，恣縱其心。生勝解者，是人則墮，真無真執，吒枳、迦羅，成其伴侶。迷佛菩提，亡失知見。

子三、出名警覺

是名第八，發邪思因，立熾塵果，違遠圓通，背涅槃城，生天魔種。

癸九、定性聲聞

分三

子初、行盡識現

又善男子，窮諸行空，已滅生滅，而於寂滅，精妙未圓。

子二、謬解成咎

於明明中，分別精麤，疏決真偽，因果相酬，惟求感應，背清淨道：所謂見苦斷集，證滅修道，居滅已休，更不前進。生勝解者，是人則墮定性聲聞。諸無聞僧，增上慢者，成其伴侶。迷佛菩提，亡失知見。

子三、出名警覺

是名第九，圓精應心，成趣寂果，違遠圓通，背涅槃城。生纏空種。

癸十、定性辟支

分三

子初、行盡識現

又善男子，窮諸行空，已滅生滅，而於寂滅，精妙未圓。

子二、謬解成咎

若於圓融，清淨覺明，發研深妙，即立涅槃，而不前進。生勝解者，是人則墮，定性辟支。諸緣獨倫，不迴心者，成其伴侶。迷佛菩提，亡失知見。

子三、出名警覺

是名第十，圓覺溜心，成湛明果，違遠圓通，背涅槃城，生覺圓明，不化圓種。

壬三、結害囑護

分三

癸初、示因交互

阿難！如是十種禪那，中途成狂，因依迷惑，於未足中，生滿足證，皆是識陰，用心交互，故生斯位。

癸二、迷則成害

眾生頑迷，不自忖量，逢此現前，各以所愛，先習迷心，而自休息，將為畢竟，所歸寧地。自言滿足，無上菩提，大妄語成。外道邪魔，所感業終，墮無間獄。聲聞、緣覺，不成增進。

癸三、囑令保護

汝等存心，秉如來道，將此法門，於我滅後，傳示末世，普令眾生，覺了斯義。無令見魔，自作沉孽，保綏哀救，消息邪緣。令其身心，入佛知見，從始成就，不遭歧路。

庚三、結示超證護持

分二

辛初、先示超證

二、後示護持

辛初

分三

壬

初、諸佛先證

如是法門，先過去世，恆沙劫中，微塵如來，乘此心開，得無上道。

壬二、識盡所超

識陰若盡，則汝現前，諸根互用，從互用中，能入菩薩，金剛乾慧，圓明精心，於中發化。如淨瑠璃，內含寶月，如是乃超十信、

十住、十行、十回向、四加行心，菩薩所行，金剛十地，等覺圓明。

壬三、圓證極果

入於如來，妙莊嚴海，圓滿菩提，歸無所得。

辛二、後示護持

分三

壬初、首明遵古辨析

此是過去，先佛世尊，奢摩他中，毗婆舍那，覺明分析，微細魔事。

壬二、正令諳識護持

魔境現前，汝能諳識，心垢洗除，不落邪見。陰魔銷滅，天魔摧碎，大力鬼神，褫魄逃逝，魘、魅、魘、魘，無復出生。直至菩

提，無諸少乏，下劣增進，於大涅槃，心不迷悶。若諸末世，愚鈍眾生，未識禪那，不知說法，樂修三昧，汝恐同邪，一心勸令，持我佛頂，陀羅尼咒，若未能誦，寫於禪堂，或帶身上，一切諸魔，所不能動。

壬三、叮嚀欽古教

汝當恭欽，十方如來，究竟修進，最後垂範。

戊二、因請重明五陰生滅

分三

己初、躡前請問

二、具答三問

三、

結勸傳示 今初

阿難即從座起，聞佛示誨，頂禮欽奉，憶持無失。於大眾中，重復白佛：如佛所言，五陰相中，五種虛妄，為本想心，我等平常，

未蒙如來，微妙開示。又此五陰，為併銷除，為次第盡？如是五重，詣何為界？惟願如來，發宣大慈，為此大眾，清明心目，以為末世，一切眾生，作將來眼。

己二、具答三問 分三

庚初、答生起妄想 二、答因界淺深 三、答滅

除頓漸 庚初 分三

辛初、標說妄想之由 二、詳示五重妄想 三、總結妄

想所成 辛初 分三

壬初、推原生起元虛 二、判決倒計非是 三、結歸故

說妄想 今初

佛告阿難：精真妙明，本覺圓淨，非留生死，及諸塵垢，乃至虛空，皆因妄想，之所生起。斯元本覺，妙明精真，妄以發生，諸器世間，如演若達多，迷頭認影。

壬二、判決倒計非是

妄元無因，於妄想中，立因緣性，迷因緣者，稱為自然，彼虛空性，猶實幻生，因緣、自然，皆是眾生，妄心計度。阿難！知妄所起，說妄因緣。若妄元無，說妄因緣，元無所有。何況不知，推自然者？

壬三、結歸故說妄想

是故如來，與汝發明，五陰本因，同是妄想。

辛二、詳示五重妄想

分五

壬初、色陰妄想

至

五、識陰妄想

壬初

分三

癸

初、示體因想

汝體先因，父母想生，汝心非想，則不能來，想中傳命。

癸二、引喻詳釋

如我先言：心想醋味，口中涎生；心想登高，足心酸起；懸崖不有，醋物未來，汝體必非，虛妄通倫，口水如何，因談醋出？

癸三、結名妄想

是故當知，汝現色身，名為堅固，第一妄想。

壬二、受陰妄想

分二

癸初、轉想成受

即此所說，臨高想心，能令汝形，真受酸澀。

癸二、推廣結名

由因受生，能動色體，汝今現前，順益違損，二現驅馳，名為虛明，第二妄想。

壬三、想陰妄想

分二

癸初、身念相應

由汝念慮，使汝色身，身非念倫，汝身何因，隨念所使，種種取像，心生形取，與念相應。

癸二、推廣結名

寤即想心，寐為諸夢，則汝想念，搖動妄情，名為融通，第三妄想。

壬四、行陰妄想 分二

癸初、體遷不覺

化理不住，運運密移，甲長髮生，氣銷容皺，日夜相代，曾無覺悟。阿難！此若非汝，云何體遷，如必是真，汝何無覺？

癸二、結名妄想

則汝諸行，念念不停，名為幽隱，第四妄想。

壬五、識陰妄想 分四

癸初、縱奪真妄

又汝精明，湛不搖處，名恆常者，於身不出，見、聞、覺、知，若實精真，不容習妄。何因汝等，曾於昔年，覩一奇物，經歷年歲，憶忘俱無？於後忽然，覆覩前異，記憶宛然，曾不遺失，則此精了，湛不搖中，念念受熏，有何籌算？

癸二、正申喻示

阿難當知：此湛非真，如急流水，望如恬靜，流急不見，非是無流，若非想元，寧受妄習？

癸三、的指滅時

非汝六根，互用開合，此之妄想，無時得滅。

癸四、推廣結名

故汝現在，見、聞、覺、知，中串習幾，則湛了內，罔象虛無，第五顛倒，微細精想。

辛三、總結妄想所成

阿難！是五受陰，五妄想成。

庚二、答陰界淺深

汝今欲知，因界淺深：惟色與空，是色邊際。惟觸及離，是受邊際。惟記與忘，是想邊際。惟滅與生；是行邊際。湛入合湛，歸識邊際。

庚三、答滅除頓漸

此五陰元，重疊生起，生因識有，滅從色除。理則頓悟。乘悟併銷；事非頓除，因次第盡。我已示汝，劫波巾結，何所不明，再此詢問？

己三、結勸傳示

汝應將此，妄想根元，心得開通，傳示將來，末法之中，諸修行者，令識虛妄，深厭自生，知有涅槃。不戀三界。

乙三、流通分 分五

丙初、較供佛之福 二、答獲福之多 三、歎滅惡

之功 四、舉兩利之勝 五、結大眾法喜 今初

阿難！若復有人，徧滿十方，所有虛空，盈滿七寶，持以奉上微塵諸佛，承事供養，心無虛度，於意云何，是人以此施佛因緣，

得福多不？

丙二、答獲福之多

阿難答言：虛空無盡，珍寶無邊，昔有眾生，施佛七錢，捨身猶獲，轉輪王位，況復現前，虛空既窮，佛土充滿。皆施珍寶，窮劫思議，尚不能及，是福云何，更有邊際？

丙三、歎滅惡之功

佛告阿難：諸佛如來，語無虛妄。若復有人，身具四重，十波羅夷，瞬息即經此方他方，阿鼻地獄，乃至窮盡十方無間，靡不經歷。能以一念，將此法門，於末劫中，開示未學，是人罪障，應念消滅，變其所受，地獄苦因，成安樂國。得福超越，前之施人，

百倍千倍，千萬億倍，如是乃至，算數譬喻，所不能及。

丙四、舉兩利之勝

阿難！若有眾生，能誦此經，能持此咒，如我廣說，窮劫不盡，依我教言，如教行道，直成菩提，無復魔業。

丙五、結大眾法喜

佛說此經已。比丘、比丘尼、優婆塞、優婆夷，一切世間天人、阿修羅，及諸他方菩薩、二乘，聖仙童子，並初發心大力鬼神，皆大歡喜。作禮而去。

# 大佛頂首楞嚴經（有科判）功德主名錄

委印文號：108495

六〇、〇〇〇元：「林淑瑛、賴朱罔市、賴俊哲、黃素齡、賴澍鈞、吳宜家、吳冠伶、往生者吳澄岩、

往生者吳碧霞、往生者吳博容、往生者林元全、往生者林卓玉蘭、往生者賴文慶、往生者黃文華、

往生者黃江梅及吳氏、林氏、賴氏、黃氏歷代祖先暨其冤親債主。」

願以此功德普皆迴向，從初禮拜乃至隨順所有功德，皆悉迴向盡法界、虛空界一切眾生。

願令眾生，常得安樂，無諸病苦。欲行惡法，皆悉不成。所修善業，皆速成就。

關閉一切諸惡趣門，開示人天涅槃正路。

以上計新台幣：六〇、〇〇〇元，恭印一、〇〇〇本。

回向：天下和順，日月清明，風雨以時，災厲不起，國豐民安，兵戈無用，

崇德興仁，務修禮讓，國無盜賊，無有冤枉，強不凌弱，各得其所。

祝願法界一切有情，所有六道四生，宿世冤親，現世業債，咸憑法力，悉得解脫。

祝願現生者增福延壽，發菩提心，常隨佛學，勤修精進，利濟群生。

祝願已故者往生淨土，同出苦輪，共登覺岸。

附記：本會接受善信委託，代印經書、佛像，其必要之費用，均經本會審慎評估；

若有結餘，均續作本會之印（購）經書及運費，為施主廣積陰德，歡迎十方大德善加利用。

普為出資及讀誦受持  
輾轉流通者回向偈曰

願以此功德

消除宿現業

增長諸福慧

圓成勝善根

所有刀兵劫

及與饑饉等

悉皆盡滅除

人各習禮讓

讀誦受持人

輾轉流通者

現眷咸安樂

先亡獲超昇

風雨常調順

人民悉康寧

法界諸含識

同證無上道

佛曆二五六三年／西元二〇一九年十一月

恭印：一〇〇〇本

流水號：17191  
書號：CH380-09

## 大佛頂首楞嚴經（有科判）

發行人：簡豐文

出版者：財團法人佛陀教育基金會

地址：100 台北市杭州南路一段五十五號十一樓

網址：www.budaedu.org

E-mail：budaedu@budaedu.org

電話：(〇二)二三九五一一一九八

劃撥戶名：財團法人佛陀教育基金會

銀行名稱：台灣銀行城中分行（請於電匯或轉帳後告知本會用途）

銀行帳號：〇四五〇〇四五九七五〇三（銀行代號：004）

本會經書免費結緣之請取方式如下：

(一) 親臨本會二樓講堂。(二) 利用傳真：02-23965959

(三) 撥打電話：(02) 23951198 分機：11 / 12

(四) 網址：http://www.budaedu.org/books/。(五) 寫信指定：本會法寶流通股。

為提高服務效率，請您嚴謹考量，慎選所需經書；儘量少用電話，多利用文字方式請取，並請詳寫

經書名稱、冊數及收件人姓名、地址、電話、郵遞區號，以減少本會之處理時間；若大量申請，請

註明用途，且避免姓名、地址等文字上書寫之錯誤。

◎本會經書，歡迎翻印（請勿增刪），贈送流通，功德無量。

◎本會交通

※捷運：善導寺站5號出口，至杭州南路右轉，過兩個紅綠燈。

※公車站牌：審計部站→212 / 299 / 232 / 205 / 276 / 605 / 257 / 262

台北商業技術學院→253 / 297 / 237 仁愛路二段→253 / 297 開南商工→208

仁愛路、杭州南路（紹興街）口→630 / 270 / 263 / 245 / 621 / 651 / 37 / 261

行政院新聞局出版事業登記證局版臺業字第三八六九號



